

Э.И.ПОЛЯКОВА

# ЧУЖАН МУ





Э.И.Полякова

# ЧУЖАН МУ

1-4 классъяслы содтöд лыддьöм вылö небöг

---

Лэдзöма

Коми Республикаса йöзöс велöдан да  
вылыс тöдöмлун министерство  
индöд серти



---

Сыктывкар  
Коми небöг лэдзанiн  
2006

Донъяланкыв сетісны

*Е.В.Козлова*, Коми Республикаса гижысь котырön  
веськöдлысь

*А.М.Захаренко*, Шойнатыса шöр школаön веськöдлысь,  
коми кыв да литература велöдысь

Серпасалис **В.А.Клейман**

**Полякова Э.И.**

П 54 Чужан му: 1–4 классъяслы содтöд лыддьöм вылö небöг.– Сыктывкар: Коми небöг лэдзанін, 2006.– 288 л.б.

ISBN 5–7555–0857–7

Эльвира Ивановна – Коми пединститутса велöдысь, педагогика наука кандидат. Сійöс бура тöдöны ичöt войтырöс велöдысьяс. Школаясын öні вöдитчöны Эльвира Ивановнаön дасьтöм небöгъясöн: «Азбука», «Анбур», «Ошкaмöшка», «Читалочка». Небöгъяс дасьтöмысь сылы сетісны Коми Республикаса государственной премия.

Эльвира Ивановналысь ичöt арлыдаяслы сійöм некымын висьт йöзöдісны «Коми му» да «Йöлöга» газетъясын, «Би кинь» журналын.

«Чужан му» небöг – тайö ичöt классын велöдчысьяслы содтöд лыддян. Татчö пыртöма посни войтырлы лыддьöм вылö 103 висьт. Висьтъяссö йитö шöр мöвп – чужан му радейтöм да вөр-ва видзöм. Быд висьт бöрын сетöма юалöмъяс да уджъяс. Найö отсалöны лыддысьысьлы пыдісяннджык гөгөрвоны гижöдлысь шöр мөвпсö.

Чайтам, мый том лыддысьысьяслы воасны сёлöм вылö Ваньö да сылön ёртъяс йылысь висьтъяс. Тайö небöгыс лоас козиён и школаын велöдчысь посни арлыда челядьлы, и велöдысьяслы, и мам-батьлы.

83.3(2Рос-Коми)я71

© Полякова Э.И., 2006

© Клейман В.А., оформление, 2006

© Коми книжное издательство, 2006

ISBN 5–7555–0857–7

*Тайо небөгсө сиа муса мамлы – Михайлова Александра Павловналы. Вылө пукта мамлысь мывкыдлунсө, эскана сёрнисө, кыпыд руа оланногсө. Пёся аттьоала сійёс вит ныв-ни быдтём-сөвмөдöмысь, восьса сёлöмысь, став вöсна тöждысь.*

*Бурён казтьыла и ассым батьёс – Михайлов Иван Ивановичёс. Мам-батькөд Шойнаты сиктын олöмыс да челядьдырся воясыс вöліны медся шудаёсь!*

Дона лыддысысь, тэ кийн «Чужан му» небөг. Быд мортлөн эм чужан му, көні сійё шуө медводдза кыв, вöчö олöмас медводдза воськов. Тайо небөгсыс тэ тöдмалан коми зонкалөн чужанін йылысь.

Кызрас грездын олöны Ваня нима зонкалөн пöль-пöчыс. Бать-мамыскөд сійё вит арöсөдз олöма сәні жö. Öні олö Сыктивкарын, но окотапырысь ветлывлö чужанінас.

Сямлунсө сөвмөдны Ванялы отсалöны олöмаджык йöз: медводз, дерт, пöль-пöчыс да бать-мамыс, а сэсса и школаын велöдысьяс. Авъя да киподтуя войтыр сөвмөдöны зонкалысь вежöрсө, отсалöны шедöдны тöдöмлун, гөгөрвоны коми йöзлысь оланногсө да тöждсө. Вочасөн сійё заводитö казавны пармалысь мичлунсө, озырлунсө. Верстьö йöзкөд вөрöд ветлігөн зонка гөгөрвоö, вежөртö вөр-ваыслысь аслыспөлöслунсө да гусяторьяссö.

Чужан му йылысь тöдöмлунсө сөвмөдöмын тöдчана пайыс Ваня бать-мамлөн. Зонка унатор тöдмалö Сыктивкарын олiгөн. Тöдöмлуныс нöшта

на паськалө Москвао да лунвыв саридз дорө ветлөм  
бөрын. Юркарын детинкалөн, дерт, ыджыдджык  
позянлуныс, медем төдмавны олөм йывсьыс.

Велөдысьяс да матыс йөз индөны Ванялы весь-  
кыд да ошкана туйвизь. Висьтьяс лыддигөн тэ  
казялан челядьлыс и бурнога олөмсө, и кутшөмкө  
тырмытөмтор, Ванялыс майшасьөмсө. Зонка  
олөмын быд тшупөд – сийө мыйкө выльтор казялөм  
да гөгөрвоөм.

Небөгсө лыдды мөвпалөмөн, тэрмасьтөг. Быд  
висьтлыс шөр мөвпсө отсаласны тэныд гөгөрвоны  
небөгын сетөм юалөмъяс да серпасъяс. Сидзкө,  
висьтсө лыддьөм бөрын эн вунөд вочавидзны  
юалөмъяс вылө да вөч содтөд сетөм уджъяс. Найөс  
вөчигөн тэ верман вөдитчыны наука сяма не-  
бөгъясөн да челядьлы дасьтөм энциклопедияөн.

Ме кута лача, мый Ваня да мукөд геройыс лоө-  
ны тэныд радейтана ёртъясөн. Налөн оласногыс,  
вөчөмторъясыс отсаласны тэныд пыдисянджык  
донъявны олөмсө. Менам висьтьяс, чайта, озыр-  
мөдасны вежөртө да кыввортө, сетасны бур мыв-  
кыдлун. Ме көсъя, мед тэ лоин Чужан мутө  
видзысьөн, ловъя вөр-васө радейтысьөн да гөгөрво-  
ысьөн. Мед олөмыд, дона лыддысьыс, вөлі кы-  
пыдөн да шудаөн. Төд – олөмыд ас саяд. Бура ве-  
лөдчы да бөрийы колана туйвизь. Ло вежавидзысьөн  
да дзоньвидзаөн.

Сиа тэныд, менам муса лыддысьыс, быд  
бурсө!

*Эльвира Ивановна*



## «Я» шыпас.

Бать-мамыскөд Ваня оліс карын кык жыръя патераын. Луннас сійө детсаддын, а рытьяснас гортас. Радейтліс зонка ворсны чачаён да видлавны серпасалөм небөгъяс.

Ванялөн мамыс, Валентина Михайловна, небыд съөлөма да нюмсера ань. Сійö пыр меліа сёрнитліс пыскөд да бурö велөдіс. Некор эз горөдлыв. Мамыс Ванялөн вөлі медся мичаөн: гөгрөс чужөма, чангыльтчыштөм ичөтик ныра, пөим рөма кудриа юрсиа. Тушаыс ичөтик, вөсныдик. Сійö велөдө школаын. Рытъяснас век дасьтысьö урокъяс кежлө. Öні со пукалө пызан сайын да мыйкө гижө кыз тетрадьö. Дерт, уджсö помалөм бөрын сійö лыддяс Ванюш пысылы радейтана мойд. А öні некор.

Ванялөн батыс, Николай Иванович, уджалө инженерөн. Сы вөзйөм-висьталөм серти карын кыпөдөны уна судта выль керкаяс. Батыс шөркодь тушаа да статья, сук съөд юрсиа да лөз синма, кузьмөсіник лөсьыд ныра да съөд уска.

Удж вывсьыс локтөм бөрын батыс тшөкыда уджавлө компьютерөн. Личкыштас колана ногөн – öзъясны бияс да серъяс. Ванялы съөлөм вылас воö компьютерыс. Талун сійö пөттөдзыс видзөдіс вежласьыспөртмасьысь уна сикас серсö. А сэсся муніс ворсны кубикъясөн. Быд кубик мичмөдөма серпасөн да шыпасөн.

– Мамук, тайö нө кутшөм шыпас? А тайö кутшөм? – көсйö төдны быд шыпаслысь нимсö дзоля Ванюк.

Мамыс быд серпас орччөдө колана шыпаскөд: арбуз – «а», мач – «м». Со и артмис «мам» кыв. Сэссия кубикъяс отсөгөн тэчисны «баб» кыв.

– А өні тэч бабыдлысь нимсө, – тшөктис пиыслы мамыс.

Ваня зіля корсис нель шыпас да тэчис: «Т» «а» «н» «а».

– Мамө, батьө! Видзөдлөй, бабыдлысь нимсө тэчи! Лыддьөй!

Мамыс ас кежсьыс лыддис тэчөм кывсө да нюммуніс.

– Ванюш, ме тэныд шуа кывсө: Таня. Тайө кывъяс «нь» шыыс кылө небыда. А небыдлунсө шыыслысь колө петкөдлыны «я» шыпасөн.

Ваня вештіс бокө арбуз серпаса өти кубик. Зіля корсис яблök серпасаөс. Ас кежсьыс мөвпаліс: «Яблök – тайө «я» шыпас». Зонка вежис кыв помысь «а» шыпассө «я» шыпасөн.

– Мамук, а өні лыддьы артмөдөм нимсө, – нюмдіс зонка.

Мам да пи өттшөттш лыддисны: Таня.

– Молодеч тэ менам, – ошкис писө мамыс. – Регыд ачыд нин мөдан лыддьысьны. Öні ассыд нимтө тэч.

Зонка тэрыба корсис колана кубикъяс да тэчис «Ваня» кыв. Вильыш синмөн

видзöдліс батыс вылö. Сэссия кубикъяс пöвстысь бöрйис нельöс да шыасис батыс дінö:

– Батьö! Лыдды кывсö.

Батыс кусöдiс компьютерсö, матыстчис пиыс дорö да кубикъяс вылö индалöмөн лыддис: «Коля».

Ваня сетчыштiс батыс дорö, топöдчис вына морös бердас...

1. Кызди тэ чайтан, мыйла пöчыслысь нимсö тэчигөн Ванялөн артмис öшыбка?

2. Кызди мамыс велöдiс вöдитчыны «а» да «я» шыпасъясөн?

## **Медводдза артасьöм.**

Талун шойччан лун, вöскресенньö. Ванялы оз ков мунны детсайдйö, пöттöдзыс узис. Татшöм луннад мамыслөн пыр нин дась пöжас.

– Иван Николаевич, чеччы. Мамыд со радейтана пувъя пирөгтö пöжалiс! – садьмöдiс писö батыс.

Пиыслы сьölöм вылас воис батыслөн ыждöдлöмыс, верстыö морт дінö моз шыöдчöмыс. Восьтiс Ваня кельыдлöz синсö,

видзөдліс батыс вылө. Оз мамыс моз мелі гөлөсөн сёрнит батыс. Көть и чорыдджыка шулывлө, но некор оз горзы.

– Бур асыв! – шыасис батыс дінө пиыс.

– Бур асыв! – видзаасис пиыскөд батыс. – Мыссы, пасьтась.

Мамыс вөлі сёян вежөсын. Гөрд рөмагырысь дзоридзьяса халатыс нөшта на мичмөдіс сійөс.

– Иван Николаевич да Николай Иванович, сёйны, – кыліс көзьяйкалөн гөлөсыс.

Чөскыда сёйөм-юөм бөрын батыс чупнитіс-окыштіс мамсө: аттьө пө вердөмсьыд. Пызан сайысь чеччигөн Ванюк эз жөвунөд аттьөавны мамсө.

Ваня ворсыштіс гораа журган машинанас, сэсся пуксис видлавны серпаса небөгъяс. Кытсюрө надзөн да нюжйөдлөмөн лыддышталіс. Батыс любөпырысь видзөдліс пиыс вылө да корис ас дінас.

– Бура нин тай лыддысян! Вай талун ми тэкөд артасьны велөдчам, – ышөдіс писөбатыс.

– Кымын арөс тэныд тырис? – юалис сійө.

– Вит! – радпырысь вочавидзис зонка да петкөдліс витнан чуньсө.

– Бур! А өні сьөкыдджык задача. Кывысюся. Юралы мамыс ньөбис нель марка, а Сашалы кык маркаөн унджык. Колө

төдмавны, кымын марка ньобис мамыс кыкнан пиыслы.

Ванялөн торъя альбомын уна сикас марка вөлі чукөртөма. Сійө перйис шкапысь альбомсө да восьтіс. Өти чукөрө пуктіс нель марка, мөдө – квайтөс. Лыддис кыкнан чукөрсыйс марка лыдсө. «Мыйла нө эськө мамыс Сашасө кедзөвтөма? Өти писө радейтө, а мөдсө кедзөвтө, – жугыля мөвпыштіс ас кежсьыс зонка. – Ме кө эськө юки маркатө өтмындаөн».

Детинка өти марка вуджөдіс орчча чукөрас. Сэссия лыддис кыкнанладорсьыс да радпырысь висьталіс:

– И Юралөн, и Сашалөн вит! Со кызди колө вөлі вөчны мамыслы! – личаліс сьөлөмыс зонкалөн.

Батьыс малыштіс писө паськыд кипыдөснас да шуис:

– Мед инө тэ ногөн либө лоө, Ваньө. Но задачаад и унджык, и этшаджык вермас лоны. А ёртыдкөд, дерт жө, колө өтмындаөн босьтны...

Тадзи лои медводдзаысь артасьөма.

1. Кызди Ваня велөдчис артасьны?
2. Кутшөм вежавидзана кывъясөн сёрнитіс пиыс бать-мамыскөд?
3. Кужан-ө тэ вежавидзана сёрнитны?

## Том космонавт.

Быд асыв Ваня нимкодпырысь мунліс садикö. Сэні уна сикас чача, ёртъяс. Мукöддырйиыс сідзи ылалас ворсöмнас, мый гортас мунöм йылысь весиг вунлывлö.

Öтчыд рытнас пиысла воис батыс. Челядь ворсисны ывлаын. Ваня кавшасьöма вöлі панераысь вöчöм ракета вылö. Сійö зэв сьölöмсяньыс и кинас, и кокнас да и шыалöмнас петкöдліс космосö лэбöм.



Зонка и збыльысь чайтіс, мый төвзё мөд планета вылö. Сэні öд ставыс мөдпөлос. Сёрнитöны тшöтш жö ас ногыс. Кутшöм тайö сьölöм кыпöдана здук! И мыйла буретш тайö здукас сійöс торкисны?!

– Ванюк! Тэла локтісны! – шуис Зоя Николаевна.

Детинка неокотапырысь матыстчис батыс дорö да мөдіс шуавны төдтöм кывъяс. Батыс нинöм эз гөгөрво. Пиыс мөдліс весиг кинас отсасьны-öвтчыны, но весьшөрö.

– Тэ нö мый, пиук? – серökтыштис батыс. – Ме тай нö ог гөгөрво, кутшöм кыв

вылын тэ сёрнитан? Вай жö тэ, Ваньö, сёр-  
нит гөгөрвоана!

Ваня кинас öвтчöмөн ас ногыс мыйкö  
висьталіс. Батьыс гөгөрвоис: виччысьлы пö,  
а ме котöртла на. Сэссия зонка том чибö моз  
ризöбтіс ракеталань. Пуксис да бара мöдіс  
жургыны-лэбны. Жургöм шы лönис, да  
пиыс котöртіс батьыс дорö.

– Со и гортö вои! Лэбалі ме, батьö, зэв  
ыліті. Вöлі мöд планета вылын. Велöді выль  
нога сёрни. Тэ öд кывлін? Öні со ас ногөн  
нин бөр сёрнита!

Гортас Ваня рытивбыд висьталіс выль  
планета йылысь. Кужис висьтавыны и сы  
йылысь, кызди олöны, пасьтасьöны, уджа-  
лöны да велöдчöны мöд планетавывса  
олысьясыс. Бать-мамыс кывзісны том  
«космонавтöс» да шензисны, кутшöм уна  
нин тöдö налөн пиукуыс.

1. Лöсялö-ö висьтыслы нимыс?

2. Мövпышт, мый висьталіс Ваня мöд планета  
вылö ветлöм йылысь?

3. Кутшöм планетаяс тэ тöдан? Мый верман  
висьтавыны на йылысь?

## Мыйысь пасьмуні ва доз?

Ваня шоныда пасьтасис да котөртис ывлаө. Вөлі гажа төвся лун. Муыс вевттьысьёма гөн кодь небыд еджыд эшкынөн.

Зонкаөс шензьөдіс ывлавывса мича серпасыс. Матыстчис төдса гөп дорө. Но мый нө тайө? Неважөн на сәні вөлі ва, а талун йи югъялө! Йи пасьталаыс сюрс киньөн ворсөдчө синтө ёрана шонді. Йиын ачыс шондіыс!

Лов шысө пыкөмөн Ваня пидзөсчанясис «шонді» бердас да дыр видзөдаліс дзирда серпассө. Йи веркөсыс югъяліс-пөртмасис. Зонка нюммуніс: төв воөма!

Гортас мам-батыс эз виччысьны писө татшөм водз. Ваня мездорас пыртис дона козин – мичасьыс-мича йи пласт. Сійө көсьис гортасаясылы петкөдлыны йиыслысь мичсө.

– Мамө! Батьө! Видзөдлөй: йиас шонді тыдалө!..

Ваня колис йиторсө бать-мамыслы, босьтис дадь да котөртис Вова ёртыс дінө. Ёртыскөд сійө оліс өти керкаын. Найө ветлісны өти садйө. Гашкө, и өти школаын мөдасны велөдчыны. Кык ёртолөн өшинь ув йөрас дасьтөма вөлі пөвйысь неыджыд чом. Шойччан лунъясө найө радейтлісны ворсны ас вөчөм оланінас.

– Вова, зіля пасьтась! Ывлаас төв! Босьт дадьтө да исласьыштам, – ылькнитана рад-лунөн гораа сёрнитіс шемөсмөм Ваня.

Исласьөм бөрын ёртъяс пырисны асланыс чомйө. Татчө неважөн на кольлісны ва тыра стеклө банка. Выль пөв шемөсмис Ваня: стеклө дозйыд потөма. Ва пыддиыс кольөма дозйыс кодь жө йи. Пажын дырйи зонка висьталіс бать-мамыслы лоөмтор йылысь:

– Батьө! Бара нин кодкө миян чомйын пакөсьтитчөма! Ми кольлім ва тыра стеклө доз, а сійөс кодкө пасьнитөма-жугөдөма. Доз пыддиыс – йи тор.

– Тайө Көдзыд Пөльыс кынтөма ватө. Ваыд өд кынмигас паськалө. Со и поткөдөма банкатө, – стөчмөдіс батьыс.

1. Мыйөн шензьөдіс Ваняөс төвся луныс?

2. Мыйла потөма ва тыра стеклө дозйыс?

## Часі.

Быдса төлысь нин зонпосни лун-лун радпырысь исласьөны кыр йывсянь. Төрыт на ёртъясыскөд Ваня ризъяліс-котраліс, ворсіс

лым мачөн, исласис. Зонка горш косьмёмсё такөдіс гөн кодь небыд да чөскыд лымсё апышталөмөн. Асывнас кыліс киргана гөлөс:

– Мамук! Менам мыйкө горшөй доймө... Юрөй висьө...

Мамыс пуктыліс пиыслы киняулас градусник – жар кыптөма.

– Он мун талун детсайдйө, пиук. Ме врачөс корла, – көсйысис батыс.

Луннас воис врач, видзөдліс висьысьлысь горшсө.

– Ёна тай кынмөдчөмыд. Ковмас шонтысьны да курыд бурдөдчан юны, – велөдіс врач. Сэсся гижис лекарство да висьталіс мамыслы, мый колө вөчны.

Мөд лунө мама-пия мунісны больничаө горш бурдөдны-шонтыны. Еджыд халата нывбаба пуксьөдіс зонкаөс улөс вылө. Сэсся голя дінас матыстіс мыйкө ки кодь кузьөс да гөгрөс помаөс. Пызан вылас пуктіс чача кодь стеклө доз, вөсни коска. Вылыс паськыдладорас вөлі лыа. Татшөм дивө кодь чачасө зонка медводдзаысь на аддзө!

– Шонтысян вит минут, – велөдіс врач.

Лыаыс ньөжйөник пондіс лэччыны вөсни коскөдыс. Ваня дыркодь видзөдіс стеклө доз



вылө. Доз улысладорас лыаыс пыр вочасөн содіс. Кор став лыаыс киссис вылысладорсыыс, кыліс врачлөн гөлөс:

– Талун кежлө тырмас. Аскиөдз!

– Мамук, а кызди нө эськө врачыс төдіс индөм кадсө? – мудералис Ванюк. – Чача кодь дозсө нө мыйла сійө вайліс? Медым ме ог повзыы бурдөдчөмсыыс?

– Пиук, посни лыаа дозйыс – сійө асылспөлөс часі. Врачьяслөн. Зэв стөча петкөдлө кадсө: вит минут, дас, дас вит, – гөгөрвоөдіс мамыс.

– А ме чайті, мый тайө ворсантор, – сьөлөмсянныс серөктіс зонка. – Гашкө, повзяс пө бурдөдчигад да, чачаөн ылөдла... Ме өд абу полысь рөдысь!

1. Мыйөн шензьөдіс зонкаөс бурдөдчанинын лыа дозйыс?

2. Кызди өні төдмалөны кадсө?

## **Пустыняса быдмөг.**

Колис кык вежон. Ванюш бурдіс да радпырысь муніс детсадйө. Сылөн гажыс бырөма нин и ёртъяссыыс, и воспитательницасыыс.

Ваня нимкодя чолөмасис Зоя Николаевнакөд да матыстчис өшинь дорө. Паськыд өшинь вылын сулалісны быдмөгъяс. Висьтөдзыс зонка тшөкыда лелькуйтліс мича дзоридзьяссө. Воспитательница и өні тшөктіс зонкалы киськавны быдмөгъяссө. Ванюш окотапырысь босьтчис уджө. Босьтіс ва тыра доз да мөдіс тэрмасьтөг киськавны, мед оз жө солькъяссы ваыс бокө. Со фикус, со бегония... А со мыйкө вильтор. Ванюш татшөм быдмөгсө эз на аддзыв.



– Зоя Николаевна, а тайө нө эськө мый? – индіс сійө турунвиж кыз петас вылө.

– Тайө кактус. Быдмө жар муясын. Васө юө да дыр кад чөж ас пытшкас видзө. Та вөсна сійөс гежөда колө киськавны.

Рытнас Ваня ошйысьөмөн висьталіс мамбатьыслы шензьөдана виль быдмөг йылысь. Сэсса корсис небөг тыра шкапысь колана энциклопедия. Челядьлы дасьтөм да мичаа серпасалөм небөгысь позьө лыддыны быдсяма быдмөг йывсьыс. Мамыс казяліс пыыслысь төдны көсйөмсө да лыддис кактус йылысь. Вөлөмкө, кактусыд пустыняса

быдмөг. Бура жарсө терпитө-пыкө. Пусты-  
няөд ветлысь-мунысьясид кактус отсөгөн  
мездысьлөмаось горш косьмөмысь: быдмөг  
сьөмөснас көтөдлөмаось вомнысө.

1. Мый выльсө төдмаліс Ваня кактус йылысь?

2. Кутшөм быдмөг да дзоридз эм гортад да  
школаад?

3. Төдмав унджык аслад радейтана быдмөг  
йылысь да лөсьөд висьт.

## Шоколад кампет.

Ванялөн бать-мамыс кадысь кадө ньөб-  
лісны пиыслы юмовтор, но өлөдлісны: унасө  
оз позь сөйны – пиньыд водз сісьмас.

Аслас нимлун кежлө мамыс ньөбөма  
шоколад кампет да саймовтөма шкапө. Өти  
рытө, чачаөн ворсігөн, зонка казяліс мича  
көрөбка. Төдіс – юасьтөг босьтны оз позь.  
А вывті нин окота вөлі видлыны юмовторсө!  
Кызд нө пыкан тайө окоталунсө?

Ванюш гусьөн осьтіс көрөбкатө, босьтіс  
сэтысь өти кампет да сөйис. Көрөбкасө  
осьтлігөн казяліс: быд кампетлөн аслас  
торья жыр кодь. Өти жыр лои куш. А сэтшөм

чөскыд вөлөма! Сэссия тыртөммис мөд жыр,  
коймөд...

Воис мамыслөн нимлун. Талун сийө  
торъя нин мича: кельыдлөз рөма платтьоа,  
вом дорсө мавтөма. Пельпом вылас шевк-  
мунөма кудритчыштөм юрсиыс.

– Валюш, менам мусаой! Чужан лунөн  
тэнө! – чолөмалис сийөс верөсыс, мыччис  
югъялысь баситчантор да окыштіс.

Мамыс өшөдіс морөсас да пеляс батыс-  
лысь козьналанторсө. Видзөдліс рөмпөш-  
танө – мича! Ванялөн тшөтш жө дасьтөма  
козин – уна рөма кабалаысь вөчөм дзоридз  
тыра ваза.

– Мамук! Ме тшөтш чолөмала тэнө!  
А тайө тэныд, детсайдйын ачым вөчи, – шуис  
зонка да содтіс: – Зоя Николаевна неуна  
отсыштіс.

Мамыс пөся кутыштіс писө да пуктіс  
дона козинсө медся тыдаланаинө. Сэссия  
куимнанныс пуксисны пызан сайө пирөгөн  
да кампетөн чай юны. Батыс восьтіс кам-  
пет көрөбкасө да казяліс: джынйыс тыртөм.

– Вот дивөыд! – нем виччысьтөг пиыс  
дорө шыасис сийө. – Миян патераө шыр тай  
овмөдчөма. Тэ моз жө кампет радейтө ...  
Лоө нальк\* дасьтыны!

Батыслысь чорыд сёрнисө кылөм бөрын  
Ванюшлөн ёна мөдіс пессыны сьөлөмыс.

Рытнас зонка дыр эз вермы унмовсьны, кыліс ассьыс сьёлөм тіпкөмсө. Налькйö быттö веськалөма сылөн кийс да оз вермы мездьсьнысö. Асывнас мамыс казяліс: пиыс жугыль, абу варов. Детсадйö писö колльөдігөн батыс гөгөрвоис зонкалысь майшасьөмсö.

– Батьö-ö, нальктö нö тэ эн на дасьты? – нормөм гөлөсөн шыөдчис зонка.

– Эг на. А мый нö? – нюмъевтіс батыс.

– Көть э-э-эськө мед ме-е ог ше-е-д налькъяс... – мөмъялөмөн шуыштис пиыс.

– Коді гусьөн сёйис кампетсö, сійö и шедас,– чорыда төдчөдіс бать да шпынь-муніс.

– Эн вöч, батьö, нальктö,– корис Ваня.– Верма өд ме сэтчö шедны... Юасьтөг сэсся некор нинөм ог вөрөд!

– Бур сёрни тэа-меалөн артмис. Ставыс ладмас,– такөдіс писö батыс.– Сөмын төд, пиук: синмыд ачыс мыжтö висьталö.

1. Кыдзи тэ гөгөрвоин батыслысь нальк дасьтыны көсйөмсö?

2. Гөгөрвоөд сёрникузяыслысь вежөртассö: «Синмыд ачыс мыжтö висьталö».

## Выль телефон.

Өтчүд, детсадыысь локтөм бөрын, Ваня пыригмозыс жө казяліс выльтор: камод вылас сулаліс телефон.

– Ура-а-а! Миян выль телефон! – радліс зонка.

Сійө пырысьтөм-пыр кватитіс трубкасо да мөдіс горзыны: «Алло-о! Алло-о-о!» Но воча гөлөс эз кыв. Дум вылас уси Вова ёртыс. Найө важөн нин вөліны телефонаось. Зонка тэрыба пасьтасис да че-пөсйис ывлаө.



– Вова, миян тшөтш эм телефон! – любөпырысь юөртис ёртыслы Ваня да мыччис кабалатор вылө гижыштөм телефон номерсо.– А тэныд кызди позьө звөнитнысө? Ме пыр жө триньөбта!

Вова ризөдіс-котөртис гортас, телефонас өдйө бергөдліс колана лыдпасъяс.

– Алло! Вова, тайө тэ?! – радліс Ванюш телефон триньөбтөмлы.– А өні тэ меным звөнит!..

Батыс недыр кывзыштіс пиыслысь телефоннас триньгөмсө. Сэсся шыөдчис:

– Ваньö! Могтöгыд öд телефон пырыд оз сёрнитны-больгыны. Кöсьян пöч-пöльдыкöд сёрнитыштны? Со номерыс – звöнит! Кор найöс карын гöститыштны.

– Найö öд ылын олöны, – некыдз эз эскы пиыс. – Кыдз нö кыласны менö сы ылнася-ныыс?

Ванюш бергöдліс-гöгрöдліс батьöн индöм лыдпасъяс. Недыр мысыт кыліс пöчыслысь тöдса гөлöссö: «Алло!»

– Алло! Бабук, видза олан! Тайö ме – Ваня! А тэ, бабö, кылан менö?

– Кыла, Ивук, кыла!.. Чолöм! Гажöй нин быри тэысь, донаöй!..

– Миян, бабук, выль телефон!

Варовитісны пöч-пöльыскöд и бать-мамыс. Батыс шуис «Аддзысьлытöдз, мамö!» да пунктіс трубкасö.

– Пöчыд Берба лун кежлö кöсйö воыны миянö, – юөртіс сйö.

Кутшöм шуда вöлі талун Ванюш: телефон пыр сйö сёрнитіс и ёртыскöд, и пöчыскöд. Муса бабыс кык лун мысыт кöсйысис воыны на ордö.

1. Мыйысь öлөдліс батыс писö?

2. Кыдзи колö сёрнитны телефон пыр?

## Тувсовъя ваын «пыртчӧм».

Лунъяс лоины шоныдджыкӧсь, га-  
жаджыкӧсь. Яръюгид шонді вочасӧн  
сывдіс-нюліс лымсӧ. Шоръяс сяльгисны-  
тэрмасисны юлань. Дзользисны лэбачьяс.  
Гӧгӧр кыліс тулыслӧн шы.

Тулыс воӧмкӧд и йӧз виччысьӧны кы-  
пыд ру да радлун.

– Ваньӧ, ӧд аски нин Берба лун. Бабыд  
воас. Вай ю дорӧ лэччылам бербала, – корис  
писӧ батьыс.

Батя-пия мӧдӧдчисны Сыктывлань.  
Гӧгӧр артмалӧмаӧсь сӧніка ва гӧпьяс. Юыс  
вежсьӧма, берег дорыс лӧзӧдӧма нин. Не-  
дыр муныштӧм бӧрын вуджисны шор. Бать-  
лы синмас шыбитчис тшын рӧмӧн лӧзалысь  
шорбокса берба.

– Ваньӧ, со бербаыд! Матын эськӧ, да он  
на босьт...

Ваня видзӧдаліс гӧгӧр. Сэсся звиркнитіс-  
чеччыштіс сӧнік вомӧныс да эджык во –  
коскӧдзыс дзумгысис шорас.

– Ы-ы-ш! Ба-а-атьӧ-ӧ-ӧ!! – горӧдіс пов-  
зӧм детинка. – Отсав меным! Батьӧ!!

Бать чепӧсйис пиыслань, тшапкис пель-  
помӧдыс да лӧптис васьыс. Дерт, эз куж  
виччысьны татшӧмтортӧ батьыс. Кӧтасьӧм  
кычипи кодъ пиыс ставнас тіраліс, кӧдзыд-

сыыс зяткакылісны пиньясыс: «Бр-р-р!  
Кө-ө-өдзыд!»

– Ваньё, оз позь миянлы көтасьём пась-  
көмнад нюжмасьны! Зіля гортлань! Ме ко-  
торта, а тэ вөтөд! – тшөктіс бать.

Зонка кывзысис. Сылы ковмис зіля уджав-  
ны ки-кокнас. Ордйысигмоз регыд кадөн  
батя-пия воисны гортаныс. Маа пось чай  
юём бөрын Ваня пырис шебрас улө. Бать  
некымынысь матыстчыліс пиыслань. Май-  
шасис: мед көть эськө оз жө висьмы...

– Тувсов ваыс, пиук, пөръяліс тэнө.  
Ачыд өд аддзылін: выліас лымъя, а уліас –  
ва визувтө. Татшөминас буретш тэ и  
веськалін, – варовитіс пиыскөд бать да шмо-  
нитөмөн содтіс: – Талун, Берба лун водзвы-  
лын, тэ «пыртөма» лоин!

1. Кутшөм могөн батя-пия мунісны вадорө?

2. Кутшөм вьльтор тэ төдмалін берба-баля\*  
йылысь? Төдмав, мыйла тайө быдмөгсө йөзыс  
шуоны вежаөн\*.

## Берба луно.

Берба луно Ванюкös чуксалис тöдса гөлös:

– Эз-ö кöть нин висьмы сёшайтöй?

Иву-у-к!

Зонка восьтис синсö, видзöдлис: сы до-  
рын пукалö пöчыс.

– Бабук! Муса бабукöй воöма! Видза  
олан! – радлис зонка да топыда сывйштитис  
пöчсö.

– Вои, дитюк, вои! Гажöй нин бырис  
тиянысь, – варовитис пöч. Сэсся шогпырысь



содтіс: – Сөмын тэ пө тай көдзыд ваө  
вөйлөмыд?.. Эн-ө, дитяөй, висьмы?..

– Ми өд батыөкөд ордйысьөмөн ризөдім!  
Ме весиг пөсявлі, – нюмъөвтис зонка.

– Но инө чеччы. Берба лунөн тәнө! Тән-  
сьыд радейтана пувъя пирөгтө да рыська  
шаньгатө вайи.

– Бабук, а тэ збыльысь кылін менсьым  
сёрнитөмсө телефон пырыд? – юалис Ваня.

Пөчыслөн вөлі кутшөмкө пытшкөсса  
мичлун. Ваня радейтліс видлавны пөль-  
пөчыслысь томдырся да өнія карточкаяссө,  
орччөдны найөс. Том дырйиыс пөчыс мича  
вөлөма. Аслас куим челядь да вит пөчөн  
шуысь вөсна майшасьөмысь, дерт, чужөмыс  
чукрасьыштөма, пөрысьмыштөма. Но вөра-  
сыс томлөн кодь на – пельк да тэрыб. Дзор-  
мыштөм юрсисө кутөма сынанөн. Тшөка  
вылас неыджыд пудпас. Сійө нөшта мич-  
мөдө пөчыслысь гөгрөсіник чужөмсө.

Ванюк радейтліс пөчыслысь меліасьөмсө,  
виччысис-нюжмасис шоньд эшкын улын:  
мед пө менө мөдысь чукөстасны. Пөчыс  
малыштис зонкалысь рудов шыльыд юрсисө,  
чеччы нин пө.

Пызан шөрас мича вазаын син гажөдісны  
берба-баля росъяс. Войбыднад найө нөшта  
на пашкыртчөмаөсь. Шонді водзас кажит-

чоны торъя мичаён, енэж рёмаён. Мамыс ваяліс пызан вылө чөскыд сёян-юан. Ставныс пуксисны пызан сайё.

– Ставнытө чолөмала Берба лунён! – шыасис пызан сайын пукалысьяс дорө пөч.– Тайё луныс – ловзян пас. Быд ловъя лов нимкодпырысь виччысьё выль олөмлысь ловзьёмсө. Со и вөр-ваын тыр өдөн нин шыалө тулыс! Олөмад тай ставыс овлө: и шогыс, и долыдлуныс. Аддза ме тiянөс дзоньвидзаён – тайё меным ыджыд радлун. Мед гажа тулысыс ваяс сөмын долыдлун, ловзьөдас-мичмөдас, том йөз, тiянлысь олөмтө!

Рытнас пөч варовитіс Ванякөд, висьталіс Берба лун да Ыджыд лун праздникяс йылысь. Важысянь гажөдчывлөмаось тайё тувсовъя праздникяс дырйиыс. Водігөн нин пөчыс өлөдіс-велөдіс зонкаөс:

– Ивук, бать-мамыдлысь кывтө вуджны оз позь. Кыдзи найё шуоны-велөдоны, сідзи и колө вөчны. Видз, дитя, ассыд бур нимтө да мывкыдлунтө!

1. Мый тэ төдмалін Ванялөн пөч йылысь?
2. Мый гөгөрвоис зонка Берба лун йылысь пөч кывъясысь?
3. Төдмав унджык тувсов праздникяс йылысь.

## Этнография музейын.

Кык вежон чөж Ванялөн пöчыс оліс карын. Сійö казяліс внукуыслысь сөвмөм-быдмөмсö, донъяліс унджык тöдны көс-йөмсö. Субöтаö куимөн – пöчыс, мамыс да Ваньö – шуисны ветлыны карса этнография музейö.



Сэні вöлі уна важ эмбур. Унаöс на пиысь Ваня адзис медводдзаысь. Зонка сулаліс юрсö чатöртөмөн да дзоргис джаджъяс вылö. Тані зымвидзисны шонді кодь самöваръяс. Найö дзирдалісны-ёрисны мичлуннас музейö локтысьясöс. Торъя нин мичаöсь самöвар вевтясыс. Найö койисны югöрсö пötөлököдзыс. Оз öд прöста шуны: «Самöвар – мича ичмонь\*».

Ванялы синмас шыбитчис медся паськыд самöварыс. Сійö сулаліс быттьö кыз рушкау баруня. Самöвар дорö матыстчөм бöрын зонка адзис ассьыс чужөмсö да нюммуни:

– Вот дивöйд! Самöварыс тай рөмпöштан кодь!

Неуна ас вылас видзöдыштөм бöрын бара шыасис пöчыс дорö:

– Бабук, а кыдзи нө татшөм самөварнас чайсө пузьөдөны?

– Пөльыдкөд мян татшөм жө самөвар вөвлі, – казтыштіс важ олөмсө пөч. – Кисьтам вөлі васө самөвар тырыс да вевттям. Трубаас суюм өзтөм сартас либө суюмөд, сөсся шом. Суюмөд сотчигас өзіяө шомыс да өдйө пузьөдө васө.

Ваня казяліс самөвар увсьыс розьяс.

– Бабук, а тайө розьясыс нө мыйла?

– Сәті сынөдыс ветлө, бурджыка шомыс сотчө.

– Сьөкыд тай вөлөма важөн чайтө пузьөдөмыд, – шензигтыр шуис зонка. – Öні ми ватө газ вылын чайникын пузьөдам.

– Да, öні дивъя мянлы овнытө. Тшайтө и газөн, и токөн позьө пузьөдны. Но важөнтө самөварөн пузьөдөм тшайыд чөскыдджык вөлі!

1. Кыдзи важөн пузьөдлөмаөсь чай вылө васө? Кыдзи öні пузьөдөны чайсө?

2. Мыйла важ йөз шулөмаөсь: «Самөвар – мича ичмонь?»

## Пеша би да лампа.

Музейын вöлі быдсяма дозмукыс да уна сикас мукöд кöлуй. Öти джаджыйысь Ваня казяліс некымын лампа.

– Бабук, а кызди ломзöдлісны татшöм лампаяссö? – кöсийс гөгөрвоны Ваня.



– Со стеклöа лампа, – шуис пöчыс. – Стеклöсö лэптан – сэні петель.\* Петеляс чуткан би, пуктан стеклöсö, и лампаыс бура вöлі югзöдö керка пытшкöстö.

– Бабук, мыйла нö эськö петельыс öзйö?

– Лампа пыдöсыс со кутшöм паськыд. Сэтчö кисьтöны карасин. Петельыс кыскö карасинсö, кöтасьö. Петельыслөн помыс сотчö, а биыс стеклö пытшкад бура ломалö, югзöдö керкатö. Позьö и гижны, и лыддысьны.

– Видзöдлы, бабук, татшöм пöнарыс öд тэнад эм жö Кыззраскад! – радпырысь шуис зонка да индіс стенмын öшалысь пöнар вылö.

– Да, ме татшöм пöнарнад карта-гид югдöдлі, – казытыштис важся кадсö пöчыс.

Зонка казяліс важиник вор да копырт-чөмөн видзөдліс сійөс.

– Тайö нө тшөтш керка югдөдөм вылө? – шензис Ваня.

– Важөн йөзыс овлөмаось и сиська биөн. А кодлөн эз вөв сиськыс, ломөдлісны пешаын\* сартас.

– Сідзкө, тайö – пеша?! – юрсө гогнитіс Ваня.

– Да, тайö пеша вор, а со пешаыс – кос сартас кутан. Важөн косьтасны вөлі пес чурка, юкласны вөсни бедьяс вылө – лоө сартас. Сартассө крукалөны пешаө, öзтөны помсө. Ворйө кисьтөны ва. Сартасыс вочасөн сотчө да югдөдыштө керкатө. А сотчөм помыс усьө пеша ворьяс.

Ваня дыркодь чөв оліс. Видзөдіс пеша вылө, лампаяс вылө. Сэссия чатөртіс юрсө вывлань да видзөдліс югыда öзьян люстра вылө. Ас кежсьыс мыйкө мөвпаліс.

– Со тадз важөн, дитюк, югдөдлісны оланінсө. Öні өд, майбырөй, быдлаын сяр-видзө югыд би!

1. Кыдзи важ йөз вөдитчывлісны лампа биөн да пешаөн?

2. Мый йылысь ас кежсьыс мөвпаліс Ваня?

3. Кыдзи кокньөдө ток би йөзыслысь олөмсө öнiя кадө?

## Чум дорын.

Чумсö Ваня аддзывліс сöмын небöг серпасъясысь. И со музейын – збыль вöчöм чум.

– Бабö! Мамö! Тайö нö и эм тундраса чумыд?



– Да, Ивук, тайö ылі войвывса йöзлөн оланін. Көр куысь вöчöма, – вочавидзис пöч. – Воча вокöй том дырйиыс войвылын көръясöс видзлöма, татшöм чумын и овлöма.

– Позьö оз чум пытшкөссö видзöдлыны? – шыасис Ваня музейса уджалысь дінö.

Воча кыв пыдди нывбаба восьтіс чумсö. Зонка пидзöсчанясис да кыйкнитіс-видзöдліс чум пытшкас. Со пöвъясысь вöчöм узьланін да джаджъяс. Узьланінын көр куысь вольпась да эшкын. Джаджйын тасьтіяс да пусян дозмук.

Зонка син водзö сувтіс бушкала көдзыд төв.

– Оз өмөй нө йөзыс кынмыны татшөм чумас көдзыд төвнас? – эскытөма юалис дентинка.

– Көр вольыс өд кык пөвста. Өдзөс пыддыыс көр ку жө. Көдзыд каднас пач ломтөны.

Зонка видзөдліс вывлань да чуймис: кузь бедьяс сувтөдалөма, а йылас – розь.

– Бабө, мыйла нө вылас розьсө кольөмаөсь?

– Тайө – мокота розь\*. Пачсө ломтігөн сәті тшыныс петө, – гөгөрвоөдіс пөч.

– Со исласян пу дадь! – индіс зонка чум дорын сулалысь аслыспөлөс дадь вылө.

– Ивук, тундраад өд көръясөн ветлөны. Өтилаысь мөдлаө ветліг-муніг көр видзысьясыд разьөны чумсө да тэчөны татчө – дадь вылас. Стөчджыка кө, тайө – нарт\*, – лабутнөя сёрнитіс пөчыс. – Босьтөны сьёрсьыс став эмбурсө да мунөны сәтчө, көні көръясыслы тырмымөн эм көрым.

Ваня матыстчис мамыс дорө, коді буретш видзөдаліс войвывса олысьяслысь паськөмсө.

– Ванюш, со войвывса йөзыдлөн паськөмыс – көр куысь вурөм шоньд малича да пими. Ме татшөм паськөма йөзсө Изьваө ветлігөн аддзывлі.

– Мамө, а чумтө тшөтш аддзылін?

— Эг, пиук, чумтö ме тэ моз жö медвод-  
дзаысь аддза!

Ваня дыр на сулаліс чум дорын. Сы син  
водзö сувтіс ылі тундраса серпас. Зонкалы  
окота лои ветлыны войвылын олысь дядь  
дорас, олыштны чумас да апавны тшына  
сынöдсö либö пукавны нартын да төвзы-  
ны паськыд тундраті...

1. Кутшöм выльтор тэ төдмалін войвылын  
олысьяс йылысь?

2. Мый төдмалін чум йылысь? Мыйла көр  
видзысьяс олöны чумын?

## **Кыдз пу.**

Кык вежон сайын на пöчыс окотапырысь  
воис карö, а талун нуöдчö нин бөр аслас  
Кыдзрас грездас. Аслад оланіныд тай мед-  
ся на муса. Пöльыдлы пö гажтöм öтнаслы,  
да и кад воöма гөбöчсьыс картофельсö  
көйдыс вылö лэптыны.

— Ваньö, вай жö ми тэкöд пöчтö грез-  
дöдзыс колльöдам,— шыödчис пи дорас  
батьыс.— Отсасыштам. Пöльыдкөд варо-  
витыштан.

Ванялы пöч-пöль ордас ветлöмыс да грездас олыштöмыс – медся ыджыд радлун. Пиыс унаысь кывліс мамыслысь карса олөм ошкөмсö. Сикт дорсьыд карад, дерт, кокниджык овнытö: ватö оз ков пыртны, песнад оз ков ноксыны. Но Ванялы мусаджык аслас чужан грездыс.

Эз ков дыр виччысьны зонкаöс. Здук мысти сійö дась нин вöлі туйö.

– Вай жö пуксьыштлам, мед ставыс ладмас, – корис туйö петтöдз мунысьясöс пöчыс.

Куимөн сöлісны еджыд «жигулиö» да мөдөдчисны чорыд веркөса туйөд неыджыд грездлань. Тайö грездыс сьөлөмөдзыс йиджөма Канев рөдвужыслы.

Бөрö колис Сыктывкар. Ылісянь тыдовтчис пöч-пöль керка дорын сулалысь пашкыр ыджыд кыз пуыс. Ваня синмын дзирдыштіс радлун. Тайö кыддыс быд волігөн шензьөдіс зонкаöс аслыспөлөслуннас. Кыддыс да пöч-пöльлөн керкаыс өткодь арлыдаöсь. Коркө важөн пöльыс сувтөдлөма керкасö. Сійö жö онас и пуктылөма керка дорас нэриник вужъя кыз пусö. Колины вояс. Дзоля быдмөг сетчис вывлань, воысь воö паськөдіс ассьыс вожъяссö.

Öні кыз пу улас лөсьөдөма лабич да пызан. Ыджыд рөдвужнас гажа рытъясö чукөртчывлөны пашкыр пу улас.

Кыз пу тшапитчысь ныв моз некымынысь онас вежлө ассьыс паськөмсö. Жар гожöмын пулөн веж корйыс видзлө шойчысьясöс шондi сотöмысь. Зэригөн кыддзыс овлө аслысьяма лэбулөн. Ловъя морт кодъ тайö пуыс! Лөнъ лунö веж коръяснас кыддзыс варовитö-шöпкөдчö зонкакөд. Зэра кадö быттö мысьсö сöстөм ваён да сынасьö. А төла лунъясö сийö скöра дзуртö, дöz-мөмпырысь броткö-сёрнитö.

Зонка мелiа видзöдлiс бабыс вылö, нюммунис, малыштiс сылысь кисö.

– Бабук, со миян кыздз пуным тыдовтчис! Аддзан?

1. Мый серти тöдчö Ванялөн кыззнас нимкодясьöмыс?

2. Кутшöм сьöлөмкылөм тэнад чужис висьтсö лыддьöм бöрын?

## Буско. 6

Кильчö вылын куйлiс Буско да шонтiс гож водзын сьöд нырсö. Ныриса да сюсь пеля понйыд ылiсянь кылiс машина жургöмтö. Пон звиркнитiс-котöртiс локтысьяслы воча.

– Буско! Донаой тэ менам! Чолөм! – малаліс ёртсө Ваня. – Гажыд бырис меысь?

Буско нимкодъысла уськөдчис пөчыс дорө, исалыштис сылысь сумкасө: мый пө чөскыдсө вайин? Чеччыштис зонкалы морөсас, нюлыштис чужөмсө, никсігтыр легөдіс бөжсө.

Ванялөн өні на син водзас өти гожся лун. Мишө ёртыс локтис сы дорө эз өтнас. Морөс бердас сійө кутис дзоляник ёкмыль – кычи-



пи. Гөгрөсіник синма, ичөтик ныра. Тапикасис тайö ёкмылыыс керка пытшкын ошпи моз, велөдчис сёйны-юны.

– Бур пөрөдаа пон – лайка. Мед видзас керканымөс. И гожөмъяснас внукъяслы ёрт лоö, – ошкис Мишөлысь ловъя козинсö пöльыс.

Ванялы зэв муса лои кычипиыс. Буско ним сылы сетіс. Карö овны вуджигөн зонка синва сорөн корис и кычипиөс босьтны сьөрсьыс.

– Мед олас миянын, быдмыштас да мөдас овмөс видзны. А тэ быд волігөн кутан аддзысьлывны аслад ёртыдкөд, – кывкөрталис пöльыс.

Та бөрти колис кык во. Буско ёнмыштöма, быдмöма, вежөрсялöма. Көзьяин моз со видзö керка-карта, бур ёрт моз колльөдлө гортсаясöс вөрö, вадорö. Пон оз лэдз йөрö төдтөм пемөстө. Сюся видзөдө и ветлысь-мунысь бөрся. Төдө бурөн локтысьöс да пакөсьт вайысьöс. Төдтөм мортöс эргө-өлөдö: «Эн лысьт юасьтөг нинөм вөрөдны!» Көрсюрö и увтыштлас код вылө кө, но некор оз пурсьы.

И кыдзи он гажтөмтчы татшөм муса да вежөра понсьыс?! Сиктса мукөд понъясысь Буско, гашкө, эз торъяв аслас мичлуннас. Гөныс сьода-еджыда, морөсыс да бөж йы-

лыс еджыд. Ачыс неыджыд, төлка синма, кузь вöсньыдик кока, сувтса пеля, бöжыс көлачөн гартовтчöма. Понлы медся муса – чöскыд лы. Вильöдигас эргö-радлö: чöскыд пö! Сёйö ставсö, мый пуас-дасьтас пöчыс. Радейтö и юмовтор.

Буско кизь кодь смоль съод синнас видзöдiс Ваня вылö: «Воин, карса ёртöй? Эн на вунöд?» Пон «кутыштлiс» сiйöс воддза лапанас – корис карса гöснеч. Ваня перйис зепсьыс кампет:

– На, Буско! На-а! Служит!

Зонка вылöджык лэптыштіс чöскыд-торсö. Пон сувтіс бөр кок вылас. Со и кампетыд Буско вомын.

– Вод! – кыліс батыслөн чорыд гөлöс.

Пон кывзысьöмөн нюжöдчис кильчö пос вылö. Вöчасян керкасянь мыччысис пöль.

– Карсаяс тай воöмаöсь? Локтöй, локтöй! Таттянтöгыд мен гажтöм нин вöлі... И тьöзöйд тшöтш воöма?! Чолöм!

Буско чеччис, матыстчис пöльлань.

– Туплясь, Буско! – шмонитiгтыр тшöктiс понлы пöль.

Буско водiс мышку вылас, вывлань лэптiс нельнан коксö да мöдiс туплясьны öтарö-мöдарö. Ставлөн серамыс петiс.

– Менам карö ветлiгкостi со мыйö велö-дöма Бускотö! – ошкыштіс верöссö пöч да

матыстчис пон дорö. – Велалöма тай, небось, кывзысьны да тшöктöм серти быдтор вöчны.

– Миян Бускоыд кывзысьысь да тöлка! Бур ёрт сйö дай овмöс видзысь! – ошкыштис тшöтш понсö кöзьяиныс.

1. Кызди веськалис кычипи Канев семьяö?

2. Кутшöм кывъясөн серпасалöма висьтас понсö?

3. Кызди тэ гөгөрвоан пöльлысь кывъяссö: «Буско – кывзысьысь, тöлка пон. Бур ёрт дай овмöс видзысь»?

## Киподтуя пöль.

Кыздрас грезд сулалö гажайнын. Öтар боксяныыс кузя нюжöдчöма кыддза рас. Мöдар бокас шыльквидзö паськыд видз. Водзынджык – гулыд яг. Грездсянь неылын визувтö алькöс берега ляпкыдик Льяю.

Тайö гажайнас зэв нин важөн воöма Кулöмдiнысь да овмöдчöма Ваньöлөн ыджыд пöльыс. Бур вöралысьөн вöвлöма, му вöдит-лöма. Киподтуя мортыд пуысь да сямöдысь вöчасьлывлöма. Вужъясьöма тайö муса Кыздрас грездас и Ваньöлөн Иван пöльыс.

Чужомсянныс аслас радейтанаинас и олө. Сөмын совхоз котыртигөн карын өти во велөдчөма. Уна во уджавлөма выль овмөс лосьөдигөн. Со и өни уджтөгыс оз овсы сылы.

Ваньөлысь пөльсө – Иван Трофимовичөс – сиктсаясыс шуөны Трөш Иванөн. Грездас быдөн сийөс төдөны. Весиг матыс грездаяс волывлөны сы дорө могөн: кодкө



корё чуман вёчны, кодлыкё колё чер пу лосьодны, мёска-кёзаа йёз корёны курантё вёчны.

Ваня пырис пёльыслён вёчасян керкаё. Сылы синмас шыбитчис сямёдысь да пуысь вёчём кёлуй.

– Пёльё, тайё нё тэ ачыл вёчин? – шемёсмис зонка.

– Нинём вёчём дорысь тайё век нин удж, – висьтасис пёль. – Татшём чуман-пестерыл мортыдлы ёд зёв коланатор вотчагад. Сямёдтё, сартастё да рос-нёртё ме водзвыл запта тёв кежлас. Кузь тёвнас со и вёчася...

Пёль пыркнитис пидзёс вывсьыс ёгсё, сувтис Ванякёд орчён.

– Аттё, мокасьтё! Кутшёма нин быдмёмыд! Тэ, тьёзё, регыл нин менё панъян! – шмонитыштис пёльыс. Сэсся топёдыштис муса внуксё морёс бердас.

Ёні зонка казалис пёльыслысь лосьыл мыгёрсё. Сёмын юриис сылён дзормёма нин, геждёмма. Уджалёмсьыс кийс сарёгёссьёма. Синмыс омольтчёма: уджалігас ёчкиасьлывлё.

Пёльыс пёрчис ёчкисё, петис посводзас. Ёзтис чигарка да кыскыштис некымынысь. Ваня видзёдалис пуысь да сямёдысь вёчём уна сикас дозмук.

– Пöльö! Со тайöс тэ жö öмöй вöчин да серпасалін? – индiс детинка джоджын сулалысь ыджыд куд вылö.

– Тайö тэнад ыджыд пöльыдлөн на вöчöмторйыс, менам батьöлөн. Танi видзлöмаöсь вöччан кöлуй: чышъян, вышивайтöм ки чышкöд, платтьö-сарапан. Ыджыд пöльыд вундалöмөн серöдлöма да серпасавлöма и öшинь куричтö, и печкан кöлуйтö, и дозмуктö. Видзöд, öнöдз на ыджыд кудсьыс красказыс абу вушйöма!

Кызкö мöд ногөн нин видзöдалiс Ваня ыджыд пöльыслысь да Иван дедыслысь вöчöмторъяссö. «Оз öмöй дедыс мудз уджалöм-вöчасьöмсьыс? Лун-лун зiльöвöчö то аслыс, то йöзлы. Кроликъясöс нöшта дöзьöритö», – мövпалiс зонка. Пöльыс быттьö кылис пытшкöсса юалöмсö внуказыслысь да панiс сёрни:

– Окотапырысь кö уджалан да радейтан ассьыд уджтö, некор он мудз. Менö сямöдөн да пуөн вöчасян уджас велöдiс батьö. Тэнад батьыд со карсянь неылö керка да пывсян кöсий лэптыны. Василей дядьыдлөн Кöрткерöсас кык судта ас вöчöм керка зымвидзö. И тэ ачыл быдмыштан да быдторйö на велалан.

1. Мый шемөсмөдiс Ваняөс пöльыслөн вöчасян керкаын?

2. Кутшөм мортөс шуöны киподтуяөн? Эм-ö тiян сиктын (грездын) киподтуя йöзыс? Висьтав на йылысь.

3. Кутшөм лача кутö пöльыс? Мый тэ гөгөрвоин сы висьталöмысь?

## **Ваня ветлис бөрйысьны.**

Шоныд тувсов лунъясö карын кутiсны дасьтысьны бөрйысьсөм кежлö. Карса уличаясысь Ваня казялис тыдаланаинö öшлөм гөрд кумач вылын гижөдъяс. Коми войтырöс чуксалiсны волыны бөрйысьнинъясö.

Удж бöрын батыс пукалис диван вылын да лыддис газет. Телевизор пыр петкöдлiсны верстьö йöзöс. Ставныс сёрнитiсны гөлöсуйтөм йылысь.

– Батьö, а мый нö сэтшөм гөлöсуйтöмыс? – шыасис батыс дiнö пиыс.

– Аски гөлöсуйтанiнас миянкöд ветлан и ставсö ачyd аддзылан, – кöсйысис батыс.

йöзыс öта-мöд вылас горзöны ыджыд гөлöсөн. Но бөрйысян лунö артмис ставыс мöдног. Куимөн мöдöдчисны Культура керкаö. Сэни кыліс мыла сьыланкыв, ворсіс музыка. Вузасисны и чöскыдторъясөн, и небөгъясөн. Пырисны ыджыд жырьö, көни кузь пызан сайын пукалісны йöз. Нюмсера нывбаба видзаасис бать-мамыскöд да сетіс налы кабала.

Батя-пия пырисны ичöтик жырьö, гөлöсуйтан кабинаö. Батьыс лыддис кабалаысь гижöдсö да варовитіс пиыскöд:

– Тадзи ми тэкöд, Ваньö, «гусьөн» гөлöсуйтам, юралысьöс бөръям. Тани со гижöма некымын мортлысь ним-вичсö. А ми тайö йöз пытшысьыс бөръям медся бурсö.

Гөлöсуйтан кабаласö батя-пия лэдзисны гөрдөн эжöm джуджыдкодь ящикö.

Культура керка сцена вылын гажöдчисны. Йöктіс-сьыліс зонпосни котыр, сэсса гудök шы улö сьылісны олöма аньяс. Гажöдчис-йöктіс енбия\* войтырыс. Ставлы вöлі долыд тайö бөрйысян лунас.

Гортаныс мунігөн паныдасис Ванялөн воспитательницаыс. Видзаасисны.

– Талун Ванюш гөлöсуйтны ветлöма?! – казяліс зонкалысь шудөн ломалысь синсö Зоя Николаевна да шыасис сы дінö.

Ваня видзёдліс бать-мам вылас да лабут-  
нёя шуис:

– Да! Ми талун гөлөсуйтім да бөрйим  
медся бурсө!

1. Мый тёдмаліс Ваня бөрйысьём йылысь?

2. Кыдз тэ чайтан, мыйла колёны бөрйысьёмгьяс?

## **Салдат рок Победа лунё.**

Май өкмысөд лун. Карса уличаяс мич-  
мөдөма гөрд дөрапасьясөн\*. Кылёны война  
кадся сыланкывьяс. Асывсянь йөз тэр-  
масьёны сыктивкарса Куслытөм би дорө.  
Тайё местаыс дона уналы. Гранит плитаяс  
вылын усьём фронтовикъяслөн нимьяс.

Бать-мамыскөд Ванюш матыстчис Кус-  
лытөм би дорө. Копыртчылөмөн пунктис дзо-  
ридз. Быттё му пытшяньыс кыліс сьөлөм  
тіпкөм кодь шы да нор музыка. Зонка  
сюся видзөдаліс олөма йөзөс, войनावывса ве-  
тераньясөс. Морөсаныс налөн өшаліс-  
дзирдаліс уна сикас медаль да пас.

Карса өти улич вылө сувтөдөмаөсь сал-  
дат пусянін. Томиник салдатьяс гөсти-  
төдісны быдөнөс асланыс анькытша рокөн.

Ветлысь-мунысь окотапырысь матыстчывліс пусянін дорö: колö пö видлыны салдатъяслысь пуöмторсö.

– Мамö! Батьö! Ме тшöтш кöсъя видлыны салдат роксö, – корис Ваня.

Дуль петмöныс зонкалы колö анькытша пöсь рокыс. Матыстчис сьöрсьөн-бöрсьөн сулалысьяс дорö да сувтіс медбöрас. Öта-мöд вылас видзöдлывлöны шемöсмöм бать-мам: кыз налөн пиныс анькытш роксö мöдас сёйны? Гортас мырдөн сорөн кык-ö-куимысь сöмын и паньыштлас выя роктö.

Еджыд халата салдат мыччис Ванюклы көрт тасьті тыр руалысь рок, сетіс пань да сьöд нянь чöлан. Зонка азыма сёйис пöсь роктö. Здукөн и кушмис көрт тасьтіыд. Öчередын сулалігөн казяліс: унаөн мöд пöv матыстчывлісны пусысь дорö. Быдөнлы сетлісны содтöд.

– Ок и чöскыд жö вöлöма салдатъясыдлөн сёяныд! – шешмунліс зонка. Пöвар вылö видзöдлөм бöрын гусьöник юаліс батыслысь: «Гашкö, сетасны меным тшöтш содтöдсö?»

– А вай жö, Ваньö, матыстчылам! Ёна тай ошкан да, ме тшöтш сёйышта тэкöд, – гогнитіс юрнас бать.

Салдат шпыннялігтыр содтіс Ваня тасьтіö öти дар, мыччис и батыслы тасьті тыр рок.

– Аттьö! Зэв чöскыд сёянөн вердінныд! Бура велалёмныд пусьыны-вердчыны! Победа лунөн тіянös, салдатъяс! – ошкис том зонъяслысь кужанлунсö батыс.

Гортлань восьлалігөн бать варовитіс пиыскöд.

– Томуловыдлы\* колö ичötдырсянныс дасьтысьны салдатад. Тэ коддьöмыслы роктö колö уна на шмуткыны-сёйны. Кылан, подполковник Иван Николаевич? – шмонитыштіс вöвлём салдат.

Батыс вылö видзöдліс пиыс да салдат моз шуис: «Кута сёйны роктö!» Долыда восьлаліс: öд талун медводдзаысь на ывлаын сёйис анькытша пöсь рок. Чöскыд роксö видлöма лои салдат тасьтіысь Победа лунö!

1. Мыйла зонкалы сьölём вылас воис салдат рокыс?

2. Кутшöм лача кутö пиыс вылö батыс? Кыдзи тэ гөгөрвоин батыслысь висьталёмсö?

## Юны позьтём ва.

Неважён вөлі детсадкөд янсөдчан лун. Школаө пыртөдз нөшта куим төлысь колис. Ванюшлөн бать-мамыс пыр удж вылынөсь, а сійө өтнасөн олө. Мустөммисны и ворсанторъяс, и небөгъяс. Батьыс көсйысис писө нуөдлыны Сыктыв юбердса вөрө. А виччысигад кадыс зэв ньөжйө мунө.

Шойччан лунө асывсяньыс батьыс тшөктис пиыслы:

– Ваньө, көмась-пасьтась. Ветлам тувсовъя вөрсө видзөдлыны.

Ванялөн волыса неыджыд ноп, батьыслөн ыджыдджык. Мышнопъяс батьыс пуктис сёянтор, пөрт, истөг. Мөдөдчисны туйө.

Пыдөстөм лөз енэжыс сөстөм, шондйыс мелі. Туйясыс сьөдөдөмаөсь. Гөгөр письтөмаөсь шоръяс да тельгөны-нуөны ассыныс васө Сыктыв юө. Вадор пөлөн да туйяс бокө быттьө кисьтөма медводдза дзоридз – вижъюр. Батя-пия нимкодьясьөны мича тувсов серпасөн, морөс тырнас лолалөны сөстөм сынөднас.

Воисны раскө. Тані шыаліс тулысыс! Воөмаөсь лэбачьяс да нимкодьясьөны шоньдылы, ловзысь олөмлы. Зонка нюмъөвтіс,

быттё чолёмасис дзользысь лэбачь-  
яскөд.

– Вай жё пуксьёмөн шойччыштам тайё  
шор бокас,– шыасис батыс.– Кывзыштам  
ловзьём пармалысь кыпыд горсё. Ок и ра-  
дейта ме вөр-ваыслысь тувсовъя шыалёмсё!  
Тэ, Ваньё, кывзышт: кутшөм ясыда кылё  
ловтё вөрзьөдан да олан рутё кыпөдан быд  
пөлөс шыыс...

Зонка пельөдз воис уна сикас гор: и вөрса  
шорлөн бузгөмыс, и веж корлөн шөп-  
көдчөмыс, и лэбачьяслөн дзользьөмыс. Ваня  
видзөдліс визувтысь шорлань.

– Батьё, вай чайтё пузьөдны татысь васё  
гумовтам.

– Татысь васё огё босьтөй, Ваньё,– юрсё  
довйөдлөмөн шуис батыс.– Тайё шорас  
веськалө гудыр ваыс да карса няйтыс.

Ваня шогпырысь видзөдліс шорлань.  
Казяліс: збыльысь, ваыс гудыр.

– Батьё, сідзкө, лым сылігад ми татшөм  
гудыр ва и юам?

– Карад юөм вылө ватё дасьтөны-  
сөдзөдөны, медым мортлы эз веськав не-  
кутшөм висьөм.

Дыркөдь мөвпаліс Ваня шор бокас. Сылы  
лои гөгөрвоана, мыйла тулыснас и юкмө-  
сын, и кранын ваыс абу сөстөм. Öні кутіс

бура төдны, мыйла батыс кран помас пук-  
тивлө пробка кодь ва весаланторсө. Дум  
вылас уси чужан грездыс. Мыйлакө пөль-  
пөчыслөн юкмөсас ваыс век сөдзсьыс-сөдз!  
И вөрса шоръясас ваыс пыр сөстөм, югыд!

– Ваньө, тэнад, буди, горшыд нин  
косьмө? Вай тэрыбджыка восьлалам. Вөрса  
шорсьыд гумовтам сөдз васө да пузьодам  
чайтө.

Неуна нуръясьыштөм бөрын батя-пия  
мөдөдчисны водзө.

– Ме бура гөгөрвоа тэнсьыд, пиук,  
көсьйөмтө. Аслад мөвпнад тэ важөн нин  
Кыздрасын. Регыд нин вотөс петас, пөль-  
пөчыдлөн град выв пуктасыс мөдас быдмы-  
ны-пуритны. Тэ сэні зэв колана морт лоан:  
отсыштан пөль-пөчыдлы и ёг турунсө ве-  
сыштны, и корось перйыны. Гожөм шөрнас  
и меным шойччан лунъяс сетасны. Сэки  
кыкөн вуграсьыштам! Кадыс кө лоө, гашкө,  
лунвыв саридз дорөдз ветлам. Мамыд ёна  
нин сэтчө нуөдчө.

1. Кутшөм шоръясысь оз позь юны васө?
2. Мый йылысь мөвпаліс Ваня шор бокас?
3. Кыдзи батыс гөгөрвоис пиыслысь мөвпсө  
да көсьйөмсө?



## Гожом чуксалö.

– Ванюк, чеччы! – кыліс пöчыслöн мелі гөлöсыс. – Талун сэтшöм бур луныс! Шондыс пöжöмөн-пöжö. Гожöмыс чуксалö: «Чеччы нин, Ивук!»

– Чечча, бабук, чечча! – тэрыба петіс аслас вонйысь Ваня. – Ми талун Мишөкөд сёрнитчим вуграсьны ветлыны. Сійö эз на волы?

– Буретш со и локтö, – пöч казяліс локтысьöс.

– Мишö-ö! Тэ здук виччысьышт. Ме сёйышта, – шыасис Ваня ёртыслы восьса öшиньöд.

Зонка сёйис пачын пöжöм выя рок, шаньгаөн юис йöв да котöртіс ывлаö.

Тöрытсьянь нин кык ёрт дасьтісны шатинъяс, корсисны нидзув да пучöй. Öні зіля восьлалісны тöдса туйöд вадорö. Со и вуграсьянін. Ытва бöрад Лыаюыс öні шойччö, тэрмасьтöг шлывгö-визувтö. Зонкаяс дасьтісны пукаланін – кер помъяс. Кок дорас пунктісны нидзув доз. Пысалісны вугыраныс нидзув да мөдісны виччысьны.

Зонкаяслөн табъясыс пондісны лöня кывтны визув ньылыдыс. Ёртъяс надзöникөн восьлалісны бöрсяньыс. Насьянь ылöкодь нин колис нидзув дозныс.

Кык ёрт гоз-мөдысь чөвтлісны вугыръяснысö. Быд кыйсьысьлы медся нимкодь здук – виччысьны медводдза чери! Кадыс муніс, а чери эз сёй.

Друг ю вылын уркнитіс. Лыаю шөрö öдйö петіс мотора пыж да матыстчис че-

лядь весьтö. Пыж бöрся ваис гыалис, и гы-  
ясыс ыджыд öдөн кучкалисны лыа берегö.

– Ок, тэ, мустöм пыж, чери повзöд-  
лысь! – скöрысь шуис Мишö.

Зонкаяс лöга видзöдлисны ылыстчысь  
пыж вылö. Сэк кості гыис швачнитіс бе-  
регö да пöрöдіс нидзув дознысö. Кык ёртлы  
быть ковмис мунны гортас. Самтöгыд че-  
ритö öд он кый...

1. Мыйла ёртъяслөн эз артмы вуграсьöмыс?
2. Лосьöд висът вуграсьöм йылысь.

## Вильыш Прошка.

Каньтöгыд сиктад некыдз оз позь овны.  
Пöль-пöчлөн Мурка каньныс пöрысьмис,  
дыша мöдіс кутавны шыртö. Шуисны быд-  
тыны сылысь Прошка нима каньписö.

Каньпиыс пушыд тупыль кодь, пашкыр  
бöжа. Ачыс рудіник, морöсыс да лапаясыс  
еджыдикöсь, кузь уска. Би киньясөн ворсö-  
югъялö лöz синмыс. Ёсь йыла пельнас пыр  
сюся кывзысьö: оз-ö көнкö шыр шарödчы.  
Кокыс тэрыб. Лэчыд гыжнас тшапнитас –  
он бара мездысь!

Прошка зэв збой да вильыш. Төв ныр моз котралё пельёсысь пельёсö, дзугö джодждорасö, быдтор исалö-видлалö. Сылы пыр сюрöма кутшöмкö ворсантор. Паччөрсянь джаджйö чеччыштас да дурö дозмукөн. Шкап вылö кавшасяс да нявзö-корö: «Лэдзöй менö татысь». Пач костысь став шпалерсö парсалöма ёсьгыжнас. Ковмас кö ывлаö петны, пуксяс öдзöс дорö да нявзö: «Няв! Лэдзöй менö!»



Каньпи бура төдö кöза лысьтан кад. Рытнас пöч пырö гортас лысьтысян дозйөн. Прошка котöртö нин сёян доз дорö: «Кисьтышт меным чöскыд йöвсö». Кужö мудеравны да меліасьны. Кылас кö кыйöм черилысь чöскыд дуксö, ниртчö-бергалö кыйсьысь дорын, корö чöсмöдыштны кыйдöснас. Кыдз нö он сет бур нога корысьыдлы? Калбастортö кö сылы сетан, тэрыба тяпкөдас-сёяс. Мургыштас-аттёалас, мыссяс да нюжөдчас паччөрö.

Каньпилы сёлöм вылас воö мелі сёрнитöмыд. Сёрни панысьлы веськыда синмас видзөдö, быттё гөгөрвоö висьталöмсö. Ваня, дерт, радейтö вильшасьысь Прошкаöс. Сійö

водтөдас каньписö пидзöс вылас, малалö, корö мойдыштны. А каньпи куняс синсö, сюркнялас ас улас пушыд бöжсö да кургö-мойдö.

Кöть и вильыш каньпиыд, гажöдö сийö мортыдлысь оланногсö, бурдöдö доймöм сьölöмсö да шогсö.

1. Мыйысь быдөн радейтöны Прошкаöс?
2. Лöсьöд аслад кань (каньпи) йылысь висьт.

## Ёртасьöм. ●

Буско сюсь синмөн видзöдлывліс вильыш Прошка вылö. Дурысь каньпи корсюрö и пон вылад уськöдчывліс да ёсь гыжнас сатшкысьліс. Лабутнöй пон эз вөрöд кага руа каньпитö.

Быдсяма виччысьтöмторйыс жö овлö Прошкаыскöд. Ывлаö нин вölöм петöма сийö да вильшасьö-котралö. А Буско сы вылысь синсö оз лэдзлы. Прошка потшöс вылö звирк чеччыштіс, бөр лэччис. Кильчö пос дорö матыстчис да мöдіс бергавны-котравны ляпкыдик пельса гөгөр, а сэнi пыдöсас ва. Пельсасö джынвийö вевтөн вöлі тупкöма.

Ышмысь Прошкаыдлы и пельса вылад ковмёма кавшасьны. Друг кыліс лёкысь нявөстөм: каньпиыд пельса пытшкас усьёма. Буско уськөдчис мездыны каньпиөс, кватитіс вомнас вильышпозтө да перйис пельса пытшсьыс. «Йёюк! Кытчө оз ков кавшасян! Ва пельсаө өд он жө пыр! Ва пельсаад и пөдны вермин!» – быттёө видыштіс мывкыдтөм каньпиөс Буско.



Пöльыскöд Ваня тайö каднас вöліны вöчасян керкаынöсь. Кылісны каньпились гора нявзöмсö да тэрыба петісны ывлаö. Кильчö бокын сулаліс брöд ва каньпи да лапйöдліс синсö. Буско нюліс Прошкалысь кöтасьöм гөнсö да мыйкö эргыштлывліс. Велöдіс-дивитіс, буракö, кывзысьтöм пемöстö.

Зонка босьтіс каньписö мездорас, малыштіс. Ки пыдöснас сійö бура кыліс ичöt ёртыслысь сьölöм тіпкöмсö.

– Буртор тэ вöчин, Буско! – ошкыштіс понсö кöзяин. Сэсся пöльыс матыстчис Ваня дорö.

– Ивö, кор сюсьджыкыс велöдö бөбджыксö, тайö ёртасьöмөн жö шусьö...

1. Кутшöм неминуча суис вильыш Прошкаöс?
2. Позьö-ö Бусколысь да Прошкалысь пöч-пöль ордын öтувья олöмсö шуны ёртасьöмөн?
3. Кывлін-ö тэ пемöсьяслөн ёртасьöм йылысь? Висьтав сы йылысь.

## Кызди Кузьпель асьсö бурдöдiс. ☺

Пöльлөн вöли нöшта öти радейтана удж – кроликъясöс дöзьöритöм. Кокни сьөлöм вылас, кор быдтасъясыс бура сөйöны, оз висьны.

Öтчыд пöльыскöд верд-чигөн Ваня казялис: Кузьпель эз матыстчы сөян до-рас.

– Дедö, Кузьпельыд мыйлакö оз сөй. Висьмöма, буракö,– шогпырысь сёр-нитис Ваня.

Пемöсьяслөн висьöм – содтöд сьөлöм дой. Пöльыс босьтис висьысь кроликтö мездорас да петкöдiс йөрö.

– Висьöм тай босьтöма тэнö,– малыштис сийöс пöль.– Менам öд бурдöдчанторйыд абу... Мун йирсьышт. Гашкö, и бурдан на...

Ваня кылис пöльыслысь сьөлöм нюкыр-тана шогсö. «Колö кызкö бурдöдны кро-ликсö»,– мөвпалис зонка. Сэссия йөр боксыс корсис турунаин, нетшкыштис веж коръя турунсö да вайис кроликлы.

– Кузьпельöй, донаöй! На сөйышт... Тэ öд бурдан... Дай ёнман на...



Кролик вөрөдыштіс уснас. Исыштіс турунсө. Сэссия недыр мысыт нурьясыштіс веж туруннад.

Аскинас Ваня бара петкөдіс Кузьпельсө йөрө. Кроликыд ачыс нин мөдіс корсьны бурдөдчан турунсө. Турунаинас бура дыр йирсис, мурчкис-сөйис. Зонка радысла некытчө оз инась: «Кузьпельыд бурдіс! Ме өд шуи: бурдас! Бурдөдчанторйыд, пөльө, миян йөрын вөлөм и быдмө!»

– Йөр бокад тай и вөлөма аптекаыд! Кроликыд ачыс корсис бурдөдчан турунсө! – тшөтш жө радліс пөль.– Тадзи жө овлө и вөрса пемөсьясыдкөд. Висьмасны кө найө, асьныс и корсясны пармасьыс бурдөдчанторсө.

1. Кутшөм шог суис пөльөс?
2. Кыдзи бурдөдіс асьсө Кузьпель?
3. Кыдз тэ гөгөрвоан «Йөр бокад вөлөма аптекаыд»? Мый сэтшөмыс «вөрса аптека»?

## **Мелі кывйыд быдөнлы лөсялө. ●**

Куим во нин пөль-пөчөс вердө чөскыд йөлөн Люся нима көза. Сыөдз видзлөмаөсь и мөс, и кукань. Пөрысьладорыд тай сэссия сьөкыд лоөма турунтө дасьтыны.

Люсюкыдлы оз ков ылөдз йирсынытө ветлыны. Йөр пөлөныс и сюрө сылы туруныс. Талун көзаыд пөтөма нин. Сулалө шор бокас да көзьякасө виччысьö: кор пö нин йөртас аслам оланінö?

Пöчлөн парникас на уджыс эз вöv помалöма. «Вай жö Ивöс кесйөдлышта. Коркө öд ковмас жö көза видзан уджнас тöдмасьны», – ас кежсьыс мөвпаліс пöч.

– Ивук, на босьт гезторсö да йөрт Люсюктö гидас.



Ваня таөдз эз на йөртлы көзатö. Но тшöктісны кө, быть вöч. Босьтіс гезтор, домаліс көзаөс да мөдіс кыскыны гортланьыс. Көзалы мыйлакө татшөмторйыс эз во сьөлөм вылас. Сійö лёкысь довкйөдліс юрнас, көсйис мынтөдчыны гезсьыс.

«Гашкө, пöчлысь мыйкө пасьтыштла? Мед Люсюкыс пöчөн чайтас», – воис зонкалы мудер мөвп. Ваня ризөдіс гортас, пасьталіс пöчыслысь идрасян халатсö, чышьянасис. Збоя матыстчис көза дорö да мөдіс корны гидö:

– Мун гортö, Люсюк! Кодлы ме шуа?!  
Гортö!

Кöза суюя видзöдлис кöзайка кодь пась-  
кöма морт вылö. Сэссия зэлöдчис, вöчис  
воськов да бара сувтовкерис.



– Он öмöй кыв? Сюра мөмöt! Зіля гортö! –  
тракйис-кыскис кöзаöс скöрмөм зонка.

– Люсюк! Донаöй менам! Лок зіля гидö.  
Лю-у-у-сюк! Лю-у-у-сюк! – керка дінсянь  
кыліс пöчлөн мелі гөлöсыс.

Кöза кыліс тöдса гөлöстö, вочавидзис  
«Ме-е-е!» да тэрыба котöртіс гортланьыс. Эз  
ковмы тай мöдысь корны ни кыскыны сійöс.

Меліа шуөм «Люсюк» кывйыс вөлі гөгөрвоана пемөслы: колө тэрмасьны гортө, лысьтысян кад воис.

1. Мыйла көза эз кывзысь зонкалысь?

2. Кызди тэ гөгөрвоан татшөм шусьөг: «Мелі кывйыд быдөнлы лөсялө»?

### **Зепта гач.**

Шонді рытлань нин вөлі нөрөвтчө. Пөч петіс көзасө лысьтыны. Ваня чуксалис ассьыс сьөлөм кыпөдысьсө – Прошкаөс. Каньпи пыді жырыын чеччалис ыджыд рөмпөштан водзын. Сійө аддзө ас кодьыс жө каньпиөс да көсйө ськөд дурыштны. «Тайө өд тэ ачыл асьтө аддзан», – сёрнитіс каньпикөд зонка.

Каньпи люг-лег вөчис бөжнас. Сэссия пондіс өтарө-мөдарө чеччавны да кутавны ассьыс бөжсө. Ваньөлөн весиг серамыс петіс. «А мый? Велөдны кө и каньпиөс Буско моз быдтор вөчны!» – мөвпыштіс зонка. Сійө корсис көв, помас көрталіс кабалаысь вөчөм тупыль. Прошкалөн радыс! Кытчө тупыль – сэтчө и чеччыштас!

Дзуртыштіс өдзөс – пырис пөч.

– Ивук, тэ Юрий Куклачөв моз нөшта на и велөдан тайө вильышпозсө? Сідз нин быдлаө чеччалө да ставсө парсалө! – өлөдіс дурөмысь пөчыс.– Вай жө пасьтав ассьыд джинсы гачтө. Ветлам вежань\* дорад да нуыштам выль лысьтөм йөвсө.

Зонкалөн өкмуніс сьөлөмыс, кор кыліс выль гач йывсьыс.

– Бабук, ме... ме выльсө... – мудеритіс-пыксис зонка.– Выль гачсө ме видза, мед оз няйтчы да косяссьы...

– А мый сійөс видзнысө? Вежаньыд өд эз на аддзыв тэнө тайө гачнас! Зіля пасьтась!

Ваня гөрдөдіс пель йылөдзыс. Петаліс ывлаө да вайис косяссьөм гачсө. Ковмис пөчыслы висьтавны лоөмтор йывсьыс.

...Тайө вөлі карысь воөм бөрын мөд рытнас. Мишө ёртыс корис Ваняөс дзебсясьөмысь ворсны. Мамыс писө унаысь велөдіс: ывла вылад важджык паськөмнад ворс. Но өд выль джинсы гачсө некод на эз аддзыв!

– О-о-о! Тэнад выль джинсы! – дзик пыр казялісны мича паськөмтө зонпосни.

Ворсісны нельөн. Ваня дзебсис сарай да пес чипас костө. Сэтысь петігас и лои тайө виччысьтөмторйыс. Выль гач мышкыслөн отар бокыс чашнитчөма. Лестукөн өшйөма!

«Вот тэныд и выль гач! Мый нө кута вöчны косясьсöм гачнас? Мамöй öд эз тшöкты тайöн ворсны. Важ гачнад пö уджав да ворс. А ме?..» – шогсис зонка.

Ваня котöртіс гортас, пöрччис косясьсöм гачсö. Бур, мый гортас некод эз вöв. «Вура косясьсöминсö – бöр вылькодь лоö!» – воис детинкалы мöвп. Босьтіс суниса ем да вурыштіс некымынысь. Видзöдліс: вурöм туйыс мисьтöм лоöма. «Вылькодь гачыд тай эз артмы! – майшасис зонка. – Видасны таысь менö. Дзеба!» Петкөдіс косясьсöм гачсö сарайö да суйыштіс важ көлуй видзан шкапö.

...Пöчыс кывзис тайö висьталöмсö да мыйкö мöвпыштіс.

– Ивук, эз öд ков дзєбны киссьöм гачтö, а дзик пыр и висьтавны меным... – видыштіс внуксö пöчыс. Сэсся содтіс: – Часлы, мыйкö ми тэкöд öтлаын мöвпыштам.

Дум вылас пöчыслы уси татшöм жö рöма важмöм джинсы гач.

– Тайö гачсö тэ новлін куим во сайын. Ме со мыськалі да пункті шкапö. Чайті, гашкö, коркö ковмас на. Со и ковмис!

Пöч вундыштіс важ гачысь лестук да вурыштіс косясьсöминас зєп. Лои зєпта джинсы гач. Быттьö сідзи и вөлöма!

1. Мыйысь Ваня «гөрдөдiс пель йылөдзыс»?
2. Кызди лой вильмөдөма косясьсөм гачсө?
3. Кызди тэ донъялан Ванялысь вөчөмторсө?

## **Бурдөдчан лапкор. Ө**

Пөль-пөчлөн керкадорса йөрас быдмө уна пөлөс град выв пуктас. Пөчыскөд Ваня петiс йөрө морков весавны. Мездiсны морковсө өг турунысь, а рытланьыс шуисны киськавны.

Зонка кык дзоля ведраөн котөртiс шордорө вала. Борйөд мунiгөн сийө крукасис да тiмбыльтчис боквыв. Ведраяс клюн-клён быгыльтчисны.

– Ойя! Ба-а-бук! Кокөй доймис! – ойзiс Ваня.

Лэптiс гач коксө да повзис: пидзөсас гырды чутъяс.

– Энлы, Ивук, лөня пукав. Ме котөртла бурдөдчанла.

Пөч ветлiс вадорысь каян туй бокө да вайис паськыд коръя турун.

– Вай жө, дитюк, бурдөдчан лапкорсө доймөминад пуктам. Эн шогсьы! Öдйө бурдан.

Дой вылас ляскис паськыд лапкорсö, топыда гартіс пидзössö. Регыд лөнис дояиныс, а лун-мөд мысти көртөдсö разисны нин.

– Лапкорйыд тэнö татшөм öдйössö бурдөдіс, – гарыштіс пöч. – Мөдысь кө дойман, сійö бара отсалас-мездас. Лапкорйыд векджык туй бокрын быдмө.

1. Кутшөм турун отсөгөн Ваня бурдөдіс доймөм коксö?

2. Кутшөм нөшта бурдөдчан турун тэ төдан?

3. Мыйла висьтыс шусьö «Бурдөдчан лапкор»?

4. Кыдзи лапкорсö шуоны рочөн? Мыйла тадзи шуöмаось?

## Зэра лунö.

Пыдөстөм лөз енэжын дзирдаліс шонді. Гожся шоньд луннад зонпосниөс кыскö вадорö.

...Челядь гажаа бузөдчисны ваын, ризъялісны-котралісны Лыаю пөлөн. Гежөда нюжөдчывлісны пось лыа вылө. Зонпоснилысь долыд здуксö торкис мурөбтөм. Ваня видзөдліс енэжö: на весьтö öшійома сьод кымөр. Ывлаыс пемдіс, шуштөммис.

Кыпөдчис төв. Мисьтөм кымөр дзоньнас тупкис енэжсө.

Челядь котыр уськөдчис гортланьыс. Ваня повзис жө гым-чардсьыд. Сійө тэрыба пырис гожъян жырьё да дзевсис вонъяс. Керкаө котөрөн пырис пөчыс, ки чышкөдөн тупкаліс рөмпөштан да самөвар. Керка пытшкыс ставнас югзыліс. Сэссия чорыда швуч-швач сяркнитіс гым, быттьө енэжас мыйкө потіс. Ошиньё, керка вевтө мөдісны швачөдны зэр тусьяс. Кыліс валөн тельгөм-визувтөмыс. Недыр мысьт кутіс көшысь моз кисьтны. Жөлөб помысь ыджыд шыён бузгис пельсаө войтва.

– Тайё зэрыс ёна колө и вөр-валы, и град выв пуктаслы. Морков да лук зэртөгьыд дзикөдз нин косьмөмаось вөлі, – нимкодясис пөчыс. Сэссия петіс гожъян жырьё да водіс внукуыс діно вонйө.

Радейтіс Ваня пөчыслысь мойдөмсө кывзыны. Тайё здукас сійө бара корис:

– Бабук, тэ өд уна мойд төдан. Вай мыйкө висьтав меным...

– Но инө кывзы. Висьтала ме тэныд Йиркап йылысь.

...Зэв нин важөн овлөма Йиркап. Бур вөралысьөн вөлөма. Ачыс багатырлөн кодь паськыд пельпома, зэв вынйөра. Ёртась-

лөма Вöрсакөд, и сийö отсавлөма весиг унджык звер-пöтка кыйны.

Вöрсаыд абу лөсявлөма Васакад. Öтчид найö тышö воасны. Повтөм Йиркапыд мездас Вöрсатö неминучасыд. Бур вöчөмсыыд Вöрсаыд индас том мортыдлы вöрысь ас пусö: «Тайö пуас тэнад, Йиркап, и ыджыд лов-эбöсыд, и олөмыд. Вöчан кө ас пусыд лызь, сийö лоас ньöвйысь на тэрыб!» Но Вöрсаыд öттшöтш и öлөдас зонтö: «Сöмын тöд: ас путö кө пöрөдан, ачыд ассыд олөмтö помалан...»

Уна во Йиркапыд вöралөма, пыр вайлөма кыйдöстö. Но воысь воö пыр этшаджык мөдөма вöралысьыдлы шедны звер-пöткаыд. Йöзыд мөдөмаöсь тшыгъявны. Ыджыд сьөлөма Йиркапыдлы жальöсь лоöны ас грездса йöзыд. Тшыгъялысь йöзтö мездөм могысь мунөма вöрад, кералөма ас путö да вöчөма тэрыб лызь.

Лоöма Йиркапыд медся вынийöра вöралысьөн. Ни öти звер абу вермывлөма пышйыны сыысь. Лызьыс ачыс лэбөдö-нуö сэтчö, көнi унасыс-уна звер-пöткаыс. Тöждысысь Йиркапыд став кыйдөссö тшыгъялысь йöзыдлы сетавлөма-разөдлөма. Тшыглы кулөмысь найöс мездөма.

Пöся аттьöавлөмаöсь лышкыд Йиркаптö бурторсыыд. Но вөлөмаöсь ас грездас и лөк

да вежалысь йӧз. Колӧ пӧ эськӧ кыдзкӧ Йиркапсьыд мынтӧдчыны. Ӧти нывбаба-тун\* и велӧдӧма юктавны Йиркаптӧ нямӧд мыськалӧм ванас. Сэки пӧ сылӧн и бырас вын-эбӧсыс, вошас лызьыслӧн ӧдыс.

Тшыкӧдӧм ватӧ юӧм бӧрын том вӧралысьыд мӧдӧдчӧма кыйдӧсыдла. Воӧма сійӧ зэв джуджыд да паськыд Сімдор ты дорӧдз. Тыыс вевттысьсӧма нин вӧлӧм вӧсни йиӧн. Тӧвзьӧма лызя Йиркапыд йи вывтӧйд. Кень кодъ вӧсни йиыд и трачмунӧма-потӧма. Том зонмыд дзумгысьсӧма кӧдзыд ваас. Эбӧстӧм мортыд пондылӧма на кыпӧдчыны йи веркӧсас, но тшыкӧдӧм вӧснаыд нӧшта на сьӧктаммӧма сійӧ. Йиркапыд мездысьсӧма эськӧ лызьсьыд, мый вынсьыс шыбитӧма кыркӧтшланьыс. Лызьыс сатшӧма нэмӧвӧйся пожӧм пуӧ. А ачыс Йиркапыс вӧйӧма джуджыд йирас\*...

Со кутшӧм легенда воис миянӧдз бур вӧралысь йылысь. Ӧнӧдз на пожӧм пуылысь мырсӧ йӧзыс шуӧны Йиркап мырийӧн, — помалис асьыс висьталӧмсӧ бабыс.

Ваня пыдисянь ышловзис. Сы син водзӧ сувтис Йиркап-багатыр.

— Оз вӧлі ков эськӧ Йиркапыдлы юны тшыкӧдӧм ватӧ, — жальпырысь шуис зонка

да нормом синмон видзодліс бабыс вылө.—  
И мыйла лөкъясыс омольтоны бур йөзсө?

Керкаын бара лои пель чунөдана лөнь.  
Ясыда кыліс, кызди керка вевтянь төпкис  
войтвайс: «Төп-төп... Төп-төп...»

— Бабук, висьтав нөшта код йылысь кө  
либө мойдышт,— сьөлөмсяньыс корис Ваня.

— Ладнө, Ивук, ме тэныд мөдысь вись-  
тала Шыпича йылысь,— көсйысис бабыс.

1. Кызди висьтас петкөдлөма зэра-гыма повед-  
дясө?

2. Кутшөмон Ваня адзис легендаысь Йир-  
капөс? Мыйла «пыдісянь ышловзис» детинка?

3. Мый төдмаліс зонка Йиркап йылысь?

## **Рытъя өшкамөшка.**

Гожъян жырыын зэвтөма кык вон. Зэрөм  
бөрад Ванялы зэв чөскыда узьсис. Мыйон  
садьмис, тэрыба петіс вонсьыс, очсыштіс...  
Жырыын вөлі ыркыдкодь. Пөчыс пукаліс  
лабич вылын да кысис.

— Бабук! Бур асыв! Мыйкө тай нө талун  
ыркыд... Гашкө, пачтө ломтам да шонтыш-  
там жыртө?

– Кутшөм пач тэ тшөктан ломтыны? – синсө мудера читкыртөмөн юалис пөч.

Детинка видзөдліс гөгөрбок – пачсө тайö жырсъыс эз аддзы.

– Мыйла нө эськө тайö жыръяс пачтө эн тэчлөй? Кирпичыд өмөй эз тырмыв? – дивуйтчис зонка.

– Тайö керкасө ми пөльыдкөд важөн нин лэптылім. Весиг тэнад батыд эз на вөв. Керка лэптигөн сэки быдөн вөчлісны төвъян да гожъян жыр. Жар гожөмнад тай быдөн ыркыдін корсьоны, – кысигмозыс варовитіс пөчыс.

– А вонъяд кутшөм лөсьыд, бабук! – небыдика шуис Ваня.

– Талун зэрө... Пырам төвъян жырйө, сэні шоныд!

Төвъян жырйыс вөлі кык вежөса\*. Ыджыдджык вежөсас сулаліс паськыд вома пач. Пачыс белитөма. Пачводзсө торйөдөма пөвъясөн да шпалеритөма. Артмөма сөян дасьтан торья вежөс.

Ваня тэрыба кайис паччөрө да корис пөчсө:

– Бабуш, тэ өд төрыт көсйысин: аски пө бара мойдышта... Мойдышт, бабук!

...Висьтала инө ме тэныд Шыпича йылысь. Шыпичаыд ыджыд көлдунөн вөлөма,

комион кө – тун. Сійө пыр тунавлөма лектор, вөвлөма рөзбойникон. Лек вөчөмнас да гусясьөмнас ена и дөзмөдлөма коми йөзтө. Йөзыс эськө и кыпөдчылөмаось сылы паныд, видлөмаось сійөс и вины, и вөтлыны Коми муысь. Но Шыпичаыд век мынлөма. Сылөн став выныс да вежөрыс вөлөма вөняс.

Унаысь тышкасьлывлөмаось Шыпичаыдкөд коми йөз: бытшкавлөмаось шыпуртөн\*, керавлөмаось черөн, нөшавлөмаось көрт нөшөн. Рөзбойникыд пыр ловйөн кольлөма. Велөдөма комиясөс өти пөрысь пөль: керыштөй пө сылысь вөнсьө да орийөдлөй уна пельө.

Тышыс пансьөма Эжва дорын. Шыпичаыд буретш вөлөм вуджө Эжвасө. Коми войтыр паныдаласны-кытшаласны лектунтө. Орөдасны сылысь кимөститчан\* вөнсьө, нөшта кераласны уналаті. Сөмын та бөрын вынтөммас Шыпичаыд. Усяс сійө ваас да и пөдас...

Вот тадзи, Ивук, важ йөзыд венлөмаось лек тунөс!

– Тадз сылы и колө! Меным ньөти абу жаль Шыпича-рөзбойникыд! – чорыда кывкөрталіс зонка.

Рытланьыс сөмын дугдіс зэрны. Пөчыскөд Ваня петіс ывлаө.

– Бабö, бабö! Видзöд, кутшöм мича öшка-  
мöшка петöма!

Пöчыс видзöдліс юлань. Сэні гажаа  
пöртмасис öшкамöшкалөн уна рöма мегы-  
рыс. Öти помнас сійö мыджсьöма Лыаюö,  
мöднас – кыддза раскö.

– Кутшöм вылын талун öшкамöшкаыс!  
Аски, Ивук, лоö мича лун, – эскöдіс бабыс. –  
Шуöны тай: рытья öшкамöшка мичаммöм  
водзын.

1. Мый Ваня тöдмаліс Шыпича йылысь? Мый-  
ла зонка шуис:

«Тадзи сылы и колö!»

2. Кыдзи пöчыс тöдмаліс аскиа бур поводдя  
йылысь?

3. Кутшöм гожся серпас усис тöд вылад? Сер-  
пасав öшкамöшкасö.

## **Ёг турункöд венласьöм.**

Ванялөн пöчыс вöдитö уна сикас град выв  
пуктас. Ас кадö мездö найöс ёг турунысь,  
мудйö. Воис картофель мудъян кад. Карысь  
воисны отсасысьяс – Ванялөн бать-мамыс.

– Мися, веськыд ки пыдöсöй лунтыр  
лудö. Ас кежысь мöвпала: кодкöдкö лоö

топыда киасьны, — локтысьяслы воча петіс пöльыс. — Локтöй-пырöй! Картопель мудъян кад кежлö буретш воисны...

Картопель градъяс кузьöсь. Зэра лунъяс бöрад öдöбтöма-петöма корйыс. Көнсюрö картопельсьыс кузьджыка йөн петöма.

— Кыкысь куранавлі, а ёг туруныд век жö петöма. Ивук, талун тэныд ковмас йөнмыскöд венласьны. Вай жö отсышт картопельдыдлы, дитюк, — шыасис пöчыс вну-кыс дорö.

Ваня гөгөрвоис ассьыс могсö. Сійö мездіс картопельсö горш йөнмысь, зіля нетшкис ёг турун.

— Ванюш, тэ эн тэрмась, — шыасис пи дінас мамыс. — Йөнтö колö вужнас нетшкыны. Коляс кө вужйыс му пытшкас, зэрöм бöрад йөнмыс выльысь петас. Пöдтас картопельтö...

Мамыс нетшыштіс йөнсö да петкөдліс пиыслы кузьысь-кузь вужсö. Ваня тэр-масьтөг мөдіс вужнас перьявны веж йөнсö. Зонка весаліс ёг турунысь картопель визьяс, а бать-мамыс сы бөрся мудйысисны.

1. Мыйла колö град выльысь нетшкыны ёг турунсö?

2. Кыдзи тэ отсасян бать-мамыдлы быдтыны град выв пуктассö?

## Иван лун паныд.

Гожомын грезд гөгөр шувгө-вежөдө кыддза рас. Сэтысь быд во чегъялөны корось.

– Иван лун өд матысмө. Кыдз пу коръяд тырвыйё нин чукөрмис (нин) морттө веськөдан выныс. Вай жө корось чегъявны ветлам, – чукөстис эня-пиаос пөчыс.

– Ветлам, – пыр жө көсйысис зонка. – И Бускотө тшөтш босьтлам!

– Бускотө ковмас керка видзны кольны. Батыдкөд пөльыд көсйө кыйсьыны ветлыны, – кайтыштис пөч.

Понсө колисны видзны пемөсьясөс. Сёрнитігтырйи куимөн мөдөдчисны раскө. Со и кыддза рас. Гөгөр сулалөны еджыд кока веськыд кыдзьяс. Зэрнас мыссьөмаось, сөстөмось.

Пөч видлаліс кыдз пу корсө да мыйкө шөпкөдыштис.

– Тэ нө, бабуш, кодкөд шөпкөдчан?

– Ме вежа кывъясөн шыөдча пу дінас. Мед оз лөгась миян вылө пуыс, сетас вынэбөс, вөтлас пывсиганым висьөмсө, – сёрнитис пөч. Сэсся содтис: – Корйыс абу нин сира. Позьё нин коросьтө перйыны.

Пөчыс да мамыс пуртөн тэрыба чилсьөдлісны веж коръя кыдз пу вожьяссө.

Ваня тшөтш отсасис. Сійö чегъяліс том кыдзьяс вылысь нюдз вожъяссö. Пöчыс велöдіс внуксö:

– Ивук, колö бөрйыны сöмын шылъыд коръя вожсö. Гöна коръя вожтö, дитюк, эн чегъяв.

Куимыдлөн артмис вель ыджыд чукөр. Пöчыс нюжöдіс куим вöсни гез. На вылö тэчисны чегъялём кыз ву вожъяссö. Артмис куим нöб: кык ыджыдджык, öти ичöt.

– Ванюш, тэ пукышт нöб дорас, а ми пöчыдкөд матыс рассö кытшовтам, кольём вося чödъяинсö видзöдлам.

Ваня кольчис видзны нöбъяс. Сы гөгөр бергалісны-дзизгисны номъяс. Зонка öвтчис, вöтлаліс найöс ас дорсьыс. Друг неылын кыліс кутшöмкö шы: кодкö быттöкö мусö парсалö.

– Кöин! – вирдыштіс юрас омöль мөвп.

Зонка эз тöд, мый вöчны: горзыны али пышйыны? Кывзысьыштіс... Шыыс лөнълас, а здук мысьт бара нин кылö. Ваня педзыштіс места вылас да полөмпырысь бара чөвтіс синсö кустлань. Куст пөвстысь мыччысис кодлөнкö суетса сьöd пельыс. Ваня чур-чермуні. Сылөн лигышмуніс вирййыс. Ачыс эз тöдлы, кызди артмис: «Ма-а-мө-ө-ö!!»

«Ав! Ав!» – кыліс увтыштөм шы. Кустысь зонкалань уськөдчис Буско.

– Ак тэ, повзьөдчысь! – личалис сьөлөмыс детинкалөн. – Кыдзи нө тэ миянөс аддзин? Эк тэ, керка видзысь!

Буско радысла котрالیс өтарө-мөдарө, исасис мыр дорын, парсалис пу дорысь вутшсө да мөдіс увтны. Увтчөм шыө матыстчисны пөчыс да мамыс.

– Буско тай миян дорө воөма?! – чуймис пөч. – Кок туй сертиным корсьөма миянөс!

Буско кыккоқйыв уськөдчис төдса вөр туйөд.

– Вай жө и ми мөдөдчам гортлань. Со өд куимыдлөн мыйта чегьялөма лои. Уна и корөсь миян артмас! – вашьяліс пөчыс.

Ваня некодлы эз висьтав вөрын повзьөм йылысь. Полис: серамыв лэптасны.

1. Кутшөм кадө дасьтөны корөсь?
2. Мыйла пөч сёрнитіс кыз пуыскөд?
3. Кутшөм виччысьтөмтор лои раскын корөсь чегьялігөн?

## Пывсяныд зэв коланатор.

Пывсян! Кутшöма тэ колан войвыв мортыдлы! Лысьöмтö небзьöдан да быдлаті бурдöдан!

Кольöм во гожöм кык вок, Николай да Василей, лэптисны бать-мамыслы виль пывсян. Водзвыв вöлі дасьтöма кер да плака. Вайисны матысса вöрысь нитш. Некымын лунöн вокъяс тшуписны срубсö.



Пывсянсö лэптан лунö воис отсасьны Володя суседыс. Грездаяс сійöс Ён Володяөн шуисны. Воис тшöтш и Ваня батылөн ёртыс – Дөрöш Öльöксан. «Стрöйбаыд öд абу öтка удж. Öтувъя уджыд öд ёнджыка содö...», – варовитіс сійö. Нывбабаулов нитшкасисны. Ваньö да Мишö нитшсö ваялісны, чаг-ёг весалісны да сотісны.

Важ пывсянкöд орччөн зымвидзис виль пывсян. Кык вок некымын лун вöчисны пытшкöс уджъяс. Пöльыскöд Ваньö ветлöдліс ыбъяс, муяс да вадор пöлөн. Найö

корсисны пывсян горйö изъяс. Пöльыс велöдiс внуксö: «Бура бöрйы изтö. Ковтöм изйыд пывсянад кольмöдас». Кыкнад корсисны-бöрйисны сöмын колана изъяс.

...Раскысь воём бöрын Ваня пырысьтöм-пыр ваялiс пывсянö ва. Чуткисны би.

– Пывсян ломтысигкості вай жö корöсьтö тэчам. Выль корöсьөн талун пывсям! – гажаа нюмдiс пöч.

Сарай звöз вылын вöчалiсны-тэчисны корöсь. Ванялөн батыс тшöтшöдiс дiнъяссö да кöртавлiс гозйөн. Артмис комын гоз.

– Ас кадö ми талун чегъялiм, бур корöсь артмис, – радлiс пöч да вордiс:\*

*Выль корöсьлы бура косьмыны,  
Миянлы дзоньвидзалун кутны,  
Ванюшлы корöсь корйыс моз розъявны,  
Ыдждыда быдмыны да сөвмыны.*

Медводз пывсисны мужичöйяс. Пывсян пытшкыс сöстöм, пипуысь вöчöма, оз сьöдöд. Пачыс сетö кос жар.

– Пывсяныд миянлы, пöрысь йöзыдлы, медся нимкодясянтор, – варовитiс пöль. – Торйөн нин арнас, кöдзыд тöвнас да висигъясөн ёна лöсялö корöсясьсöмыд.

Батыс Ванялөн койыштіс гор вылас ва.  
Пывсянын ымраліс чөскыд корөсь көр. Ло-  
лыштан-апыштан пөсь сынөдсө – шонавлө  
морөсыд и ки-кокыд.

– Пывсянад медколанаыс – корөсь да  
пөсь ру. Вай жө нөшта коя. А тэ, Ваньө,  
зільджыка корөсясь, – төдчөдыштіс батыс  
да мыччис пиыслы чөскыд көра небыд  
корөсь.

– Тадз жө и тэнө, Коля, ичөт дырйиыд  
вөлі пывсьөдам, дзоньвидзалун корам, –  
сёрнитіс пөль да босьтіс Ваня киысь  
корөсьсө. – Часлы, дедыс тэнө швачөдыш-  
тас:

*Кокөй, кокөй, котөрт  
Иван пөльыс ордө,  
Таттян пөчыс ордө!  
Кокөй, кокөй, пышыы  
Чөдгя-пувгя ягө,  
Чөскыд тшакла раскө!*

– Пывсян жарөн! – видзаалісны пывсьөм  
мужичөйясөс мам да пөч.

– Аттьө! Ок и бура жө ми корөсясим!  
Став висьөмсө вөтлім! – шпынняяліс банйөм  
чужөма Ваня.

1. Мыйла мортлы колö пывсяныс?
2. Мыйла нимкодъпырысь пывсис Ваня?
3. Кутшöм корöсясян вордкыв тэ нöшта кывлiн?
4. Кызди тэ гөгöрвоан татшöм шусьöг: «Öтувъя удж ёнджыка содö»?
5. Кызди тэ донъялан пывсян лэптан уджсö?

### **Вöрса компасьяс.**

Парма-ягид козьналö мортдылы ассьыс озырлунсö. Колö сöмын видзны сийöс да кужöмөн вöдитчыны. Бур гожöмнад и вотöсыд, и тшакыд эм. Сöмын эн дышöдчы да вотчы.

Воис гожöм шöр. Та кадö вотöсыд кисьмылö нин.

– Валя, Ванюш! Вай озъя нöрысöдз ветлам, оз вотыштам, – нуödчис пöчыс.

Куимөн восьлалiсны пода туйöd нöрыслань\*. Татысь пöчыс быд во уна оз вотлывлö. Таво некод на абу волöма татчö. Кисьмöм тусьясыс гырысьöсь, сiдзи и вöйысьöны вомад. Ваня видлiс öти тусь. Ок, кутшöм чöскыд, юмов! Неуна сёйыштöм-чöсмасьыштöм бöрын мöдiс вотчы-

ны. Өти тусь, мөд, коймөд... Зонка видзөдліс аслас чуманө да казяліс еджыд бока некымын тусь.

– Мамө, а мыйла нө оз тусьясыс джын-  
выйө еджыдось? Со өтарыс кисьмөма, а  
мөдарыс еджыд на, – вотөс вылө индөмөн  
юасис Ваня.

– Озйыд вочасөн кисьмө, – варовитіс ма-  
мыс. – Шонді водзас сійө водзджык гөрдөдө,  
а вуджөраинас – сөрөнджык. Көні шонді,  
сэні и луньюгыд. Оз кө веськав вотөсад  
шонді югөрыс, сійө сөрөнджык кисьмө.

– Лунвывладорас тай бурджыка кись-  
мөма озйыд, – содтіс пөч да пуксис кыз пу  
улө. – Ивук, пуксьыв вуджөр улас. Тані  
шондіыс омөльджыка пөжө.

Ваня пөсялөма. Яй бердас ляскысьөма  
дөрөмыс. Шапка улас чепөсйыштөма ньы-  
лөм. Сувтовкерис, видзөдліс гөгөрбок. Сы  
водзын воссис мичаысь-мича серпас. Ок и  
лөсьыд жө, майбырөй, вөрад! А сынөдыс  
кутшөм сөстөм! Куимнанныс чөла пука-  
лыштісны-шойчыштісны, кывзісны парма-  
лысь аслыспөлөс сьылөм-мойдөмсө.

– Бабуш, а ме төда, көні лунвылыд, –  
читкыртліс синсө Ваня да индіс лунвыв-  
лань.

– Стөча висьталін, – ошкыштіс пөчыс. –  
Озйыд вермө мортыдлы индыны лунвыв да

войвыв. Вөрса компаснад вермас лоны и кыз пу. Видзөдлы кызды вылас. Лунвывладорас пуыс пашкырджык, пучерыс\* шылды да сөстөм еджыд, а войвывладорыс этшаджык увъя, абу шылды.

Гортлань восьлалігөн пөч индаліс мукөд сикас «компасьяс» да висьтавліс на йылысь. «Сідзкө, вөрад нырвизьсө воштысьдылы пыр эмөсь индөд-пасьяс», – мөвпаліс зонка.

Вөр туй бокысь казялісны лөп чукөр: көрт тувъя плакаяс, тыртөм краска дозьяс, ковтөм эмбур.

– Со кытчө став ковтөмторсө кодкө ваялөма?! А сө дивө тай! – шай-паймуніс пөч. – Оз жө эськө ков вөр-ватө тадзсө омөльтны. Вөрыд өд мянөс вердысь-юктөдысь! Видзны сійөс колө...

1. Кыдзи вөрын позьө төдмавны лунвыв да войвыв?

2. Кутшөм «вөрса компасьяс» йылысь висьталіс пөчыс Ванялы?

3. Кыдзи тэ гөгөрвоан пөчлысь висьталөмсө: «Вөрыд өд мянөс вердысь-юктөдысь»?

4. «Вөр-валөн тэ бур ёрт» юрним серти дасьты висьт.

## Мудер лэбач.

Сёрнитігтыр куимён мунісны ордым-лань\*. Жбыръялісны лэбачьяс. Дугдывтөг кыліс налён сьылөмыс. Ваня кежыштіс вөрланьё: гашкё, тшак сюрё. Сійё ылісянь казяліс өтчүкөрё петём мичаысь-мича тшаксё. Найё артмөдө-маось шензьөдана сер-пас: еджгов подъяось, паськыд гөрд юраось. Юр веркөсас синтө гажөдісны еджыд чуть-яс. Зонка нимкодя-сьыштіс тайё мичнас.



– Мамё, со мыйта мича тшакыс петёма! Но тайё сёйны позьтём тшак, оз позь вотны, – зонкалы төд вылас уси детсадйын воспитательницаыслён вись-талөмыс.

– Да-а, тайё гут кулан тшак. Мичыс сылөн пөръялана, – стөчмөдіс мамыс да содтіс: – Омөля на зэрис, эз на пет сёян тшакыс.

Көнкё ылын кыліс көкөм: «Кук-ку! Кук-ку!»

– Кылан, мамё? Тайё көк көкө. А ме төда: сьылөм сертиыс лэбачсё нимтөны көкөн, – ошйысис аслас төдөмлунөн пиыс.

Зонкалы окота лои матысянджык кывыштны лэбачыслысь көкөмсө.

– Мамө, гашкө, матын тасянь көкыдлөн позйыс? Вай видзөдлам! – нуөдчис пиыс.

– Ванюк, өдвакө сюрас миянлы көкыдлөн позйыс. Сійө өд некор оз вөч позсө, – төдчөдіс мамыс да водзө висьталіс: – Көкыд – зэв мудер лэбач. Тулыснас корсьө кольк тыра лэбач поз. Сэссия өти кольк жугөдө да чөсмасьө. А жугөдөминас пунктө ассьыс кольксө. Со тадзи йөз лэбач позйын и чужө көкпиыд.

Ваня ышловзис. «Кутшөм чорыд сьөлөма тайө лэбачыс! Кыдз нө вермас ассьыс дзоля көкписө сетны мөд лэбачлы?» – дивитыштіс ас кежсьыс позтөм көкөс зонка.

1. Кутшөм гусятор зонка төдмаліс көк йылысь?
2. Мый тэ верман содтөд висьтавны позтөм көк йылысь?

## **Кодзувкоткар.**

Асъя сөйөм бөрын пөль чукөстіс Ваняөс:

– Вай тэа-меа талун ветлам вөрө. Меным колө сямөд кульыштны, пач ломзьөдантор

төв кежлас дасътыштны. Өти сайын нин и  
пес чипаснымос видзөдлам. А тэ, Ивө, чу-  
мантө босът. Гашкө, вотөстор сюрыштас.  
Зэртөгыд тшакыд абу на пө тай петөма...

Пөльыскөд  
Ваня тэрмасътөг  
восьлаліс чуку-  
ля-мукуля вөр  
туйөд. Зонка  
ошйысьөмпы-  
рысь висътавліс  
вөрса пасъяс  
йылысь.



– А со и нөшта өти вөрса пас – кодзув-  
коткар, – шуис пөль да индіс лыс емысь  
тэчөм ыджыд чукөр вылө. – Тайө кодзув-  
котъяслөн оланіныс, лыскысь тэчөм кар.

Ваня дыр видзөдіс жуысь кодзувкотъяс  
вылө. Өтияс тэрыба котөртісны чукөрлань-  
ыс, мөдъяс сөмын на мөдөдчөмаөсь кытчөкө  
гортсяныс.

– Ок и уджачөсь жө кодзувкотъясыд, –  
дивуйтчигтырйи шуаліс пөль. – Видзөд,  
кыдзи найө тэрмасьоны весавны вөрсө да  
бурдөдны пуяссө. Найө бырөдөны вөрсъид  
уна гут-гагөс. Көні эм кодзувкот оланін, сәні  
и вөрыс сөстөм.

Зонкалы окота лои видзөдлыны олані-  
ыслысь пытшкөссө. Сійө босътіс бедь, вөчис  
воськов чукөрлань.

– Тэ, зонмө, эн торк тайё уджач гагъ-  
ясыслысь олөмсө!– өлөдіс пөль.– Розьтор кё  
артмас позъяс, зэр мөдас веськавны сэтчө.  
Зіль котырыслысь кос емысь вөчөм оланінсө  
көтөдас. Вөрыд мөдас шогсыны-бөрдны,  
вермас и висьмыны...

Ваня пыр жө шыбитіс бедьсө да нөшта  
видзөдліс сэтшөм колана гагъяс вылө.  
Казяліс места вылас жөдзысь некымын ко-  
дзувкотөс.

– Кодзувкотъясыд ас костаныс юкөны  
уджсө: өтияс корсьөны сёян, мөдъяс видзө-  
ны оланінсө. Аддзан найөс? – ошкис бур  
вөчысьясөс пөль.

Пес чипас дінө нуөдысь векни туйөд  
мунігчөж пөльыс варовитіс, велөдіс внуксө:

– Кодзувкотъясыд өд и морттө бурдөдө-  
ны. Тайё гагъяссъыс вөчөм зырасянторйыд  
өдйө бурдөдө висян ки-коктө. Корсюрө и ми  
пөчыдкөд зырасьыштлывлам.

1. Мыйла оз позь пазөдны кодзувкоткаръяссө?

2. Мый тэ содтөд төдан кодзувкотъяс йылысь?

## Лёкгаг коли бөжтөг. ♡

Вөрбокса эрд вылын сулаліс кык пес чипас. Өти чипасыс пöлынътчыштöма. Пöль содтöд пыкліс сійöс да пуксис шойччыны.

– Карад тіянлы, майбыр, оз ков пес вöснаыд тöждысьны. Патераыд век шоныд! – ошкис Ванялысь карса оланінсö пöльыс. – Бать-мамыд тэнад со буртор жö вöчисны миянлы: пестö пилитісны-поткөдлісны, тэчисны, мед неуна косьмыштас. Дөрөш Өльöксаныд төлөдзыс көсйысис ваявны. Пессыд, другö, сиктад оз позь ордчынытö!



Ваня казяліс: мыр вылын шонді водзас вөрзъывтөг нюжвидзис кузь бөжа виж гаг. Гортас зонкалөн вöлі уна сикас чача-гаг. А тані – ловъя лёкгаг! Детинка лов шысö пыкөмөн, надзöник матыстчис да тшапнитіс бөжөдыс. Но мый нö тайö? Гагйыд саймовтчис-пышйис лөп чукөрлань, а зонка киö колис сöмын сылөн бөж помыс!

– Дедö! Кыдзи нö öні гагйыс кутас овны бөжтөгыс? – синва сорөн шуаліс детинка. – Ме öд эг көсйы дойдны сійöс!

– Эн шогсы сы вöсна, – такöдiс зонкаöс пöльыс. – Лёкгагыд ассыс бöжсö кольö мездысьöм могысь. Сылы öд ассыс ёнджык да наянджык вöрса олысьясысь ковмывлö пышйыны. Бöж колигас сiйö пöрйöдлö кутысьсö. Татшöм нин сылөн олöмыс... А бöжыс лёкгагыдлөн бара на быдмас, дзык важ кодыс лоö!

1. Кутшöм гусятор зонка тöдмалiс лёкгаг йылысь?

2. Аддзылiн-ö тэ лёкгагсö? Кутшöм сiйö?

3. Коми йöз уна ногөн шуöны тайö гагсö: *лёкгаг, ёсьбöж, кузьбöж, яшшöр, дзодзув, кузей, пажгаг, сiсьгаг, сiсьпугаг*. А тiян сиктын кыдзи тайö гагсö шуöны?

## Чöдъяин.

Пес чипассянь Ваня вöчис некымын воськов да веськалiс вотöсаинö. Танi некод на абу вотчöма: чöдйыс вöли сьöд!

– Дедö-ö! Ме чöдъяин аддзи! – горöдiс зонка.

– Вотчы, вотчы зiля! – кылiс воча кыв. Лöсталiсны кисьмöм тусьяс. Ваня пеш-

кылясис-өктіс вель уна вотос. Бура и чосмасис чоскыдджык тусьяснас. Чуньясыс лозодомаось, копрасьомсьыс коскыс нин мудзис. Модіс пидзосчаньон октысьны. Чуманыс вочасон съоктаммыштис.

– Ивө-ө-ө! Став чодсө нин, пөди, эмаинсьыд вотін?! Со мыйта сувйөма! Ёна тай тэ вотчынысө тэрыб вөлөмыд! А мам-батыд пыр на кага туйө пуктоны, – ошкис внуксө пөльыс.

Вөрысь бөрсө мунігөн Ваня бара матыстчис төдса кодзувкоткар дінө: нөшта на пө видзөдла уджач гагъяссө. А найө ставныс кытчөкө вошөмаось-дзевсьөмаось!..

– Дедө! Кытчө нө кодзувкотыс вошөма? – шензигтыр юасис зонка.

– Кодзувкотыд өд бура төдө поводдя вежсьөмтө. Сідзкө, регыд зэрмас... Со кымөр таланьө матыстчө, аддзан? Вай тэрыбджыка восьлалам гортланьө.

Рытнас ставон азыма сөйисны чөдъя йөв.

– Талун Иван миянөс чөсмөдлө вотөса йөвнад! – ошкыштис внуксө пөльыс.

– Сьөлөм бурмытөдз панялі выль вөлөгатө. Ок и чоскыда жө ужнайтім! Сө пасибө тэныд, Ивук! – аттьөалис пөчыс.

Ванялы чоскыдджык жө кажитчис ас вотөмторйыд.

1. Мыйла аслыс Ванялы сьёлём вылас воис чöd  
вотöмыс?

2. Мый серти пöльыс тöдмаліс зёрмём йыв-  
сьыс?

### **Пельсаын олысь «вакуль».**

Войнас зэрыштöма. Асывсяньыс лöz  
енэжын ни öти кымөр чир нин оз тыдав.  
Поводдяыс быттö тöдö – челядьлы воис  
купайтчан кад. Жар гожся луннад грездса  
унджык зонпосниыс вадорынöсь.

Талун челядь мыйлакö дыр сёрнитісны  
вöрса да бубуля йылысь. Ёна и повзöдлісны  
öта-мöднысö.

– Сё збыль! Менам пöчöй висьталіс, мый  
Гöгрöс тыын пö вакуль олö! – родыштöмөн  
шуис Мишö.

– Пөръясьö тэнад пöчыд. Повзöдчöны  
гырысьясыд, мед ты дорас чери кыйны  
ог мунöй, – збоякодь сёрнитіс Ваня, эз  
кöсйы сетчыны Мишөлөн мойд сяма сёр-  
нили.

Рытъявыв зонпосни разöдчисны горта-  
ныс. Туй вылын Ваня паныдасис пöчыскöд  
да мамыскöд.

– Ванюш, ми вежаньыд дорö ветлам. А тэ ассыд уджтö вöч: кисьякав öгурчи да помидор, – велöдiс писö мамыс.

Керка вевтувса ворга пом весьтын сула-  
лис пельса. Зэр бöрад ванас тырöма. «Мед-  
водз кисьякася. Сы  
бöрын нин котöртла  
Мишö дорö», – мövпа-  
лис зонка. Босьтiс вед-  
ра, гумовтiс пельсаысь  
ва. Друг кодкö быльк-  
нитлис-мыччысьлис  
пельсасысь да бөр  
шлöpкысис ваас. Пов-  
зьöмысла детинкалөн  
синмыс кöш кодь лои: «Тайö тай вакульыд  
миян пельсаö овмöдчöма! Гöгрöс тысьыд со  
грездöдз нин локтöма...»



Ведраяс лэбзисны керка пельöсö. Тэрыб  
чань моз Ваня котöртiс керка сайö, корсис  
дзесьянiн. Сэсся котөрөн кайис сарайö да  
дзесис пöдвöлöкаö. «Татысь, гашкö, оз ад-  
дзы!» – зонка саймовтчис корöсь тыра сёр  
сайö. Ки-кокыс лигышмунöмаöсь.

Колис час-мöд. Ваняöс каньпи казялис,  
матыстчис. Кыкыдлы гажаджык нин лои.  
Гортсаяс казялöмаöсь Ванялысь вошöмсö да  
корсьöны.

– Эз-ө вадорад бара лэччы? Көні нө эськө татшөм сёрнас ветлөдлө? Иву-у-ук! Донаой! Көні нө тэ? – төждысьөмөн горөдіс пөч.

– Ва-а-нюш! Тэнө тай ме пыр велөда: сёрөдз эн гуляйт... Кытчө нө вошин? – тіралан гөлөсөн шуышталіс мамыс.

– Со тіян пыдди пуктанторныд! Ведра керка пельөсө ляскөма, и удж помассьөма! – скөрыськодь сёрнитіс батьыс.

– Тані мыйкө неладнө, – мудер синъяссө читкыртліс пөль. – Прошкаыд пөдвөлөкаын со нявөстіс.

Бать кайис сарайө, кывзысьыштіс. Медводз кыліс кышөдчөм шы, а сэссия и пиысылысь чирөм гөлөс:

– Батьө-ө! Ме тані... Пельсаад ва-а-куль овмөдчөма!..

– Кутшөм вакуль? – вом тырнас гажаа нюмдіс батьыс. – Талун вель ыджыд сир меным шеді. Ловъя сирсө пельсаад ме и чөвті!

1. Кутшөм виччысьтөмтор лоис Ванякөд?

2. Вөвліс-ө тэкөд кутшөмкө виччысьтөмтор?

Висьтав сы йылысь.

## Вуграсьом.

Рытсаяныыс батя-пия сёрнитчисны ветлыны вуграсьны Гёгрёс ты дорё, мед пё вакульсьыд он мёд повны. Садьмисны водз асывнас. Видз вывті восьлалігён лысваыс мыськаліс батя-пиалысь кёмнысё. Батьыслы тёд вылас усис видз вылын уджалёмыс:

– Со тані ми коркё пуктывлім турун. Вёлён ме кыскавлі турун юръяс. Пёчыхд сюртліс, куртліс юр бёр. Пажын кадё олёмаджыкъяс шойчёны, вёрса чай юёны. Ми, зонпосниыд, купайтчам-уялам... Сира гезйён васьыд он кыскы! Ок и гажа жё кад вёвлі!

– Батьё, кутшём нё эськё вёрса чайыс?

– Ты дорас ми тэкөд инё видлам вёрса чайтё, – кёсйысис батьыс.

Воисны ты дорё. Шуисны медводз пестыны бипур да чай пузьёдны. Батьыс велөдіс писё өти тувйён өзтыны бипур. Ваянлён артмис тайё: биыс гажаа ыпнитіс. Зонка вайис тыысь ва. Мётыр\* вылө өшөдісны пёрт.

– Чай пузигкостыс ветлам вай, пиё, вөрва заваркаыдла. Ты боксьыс медводз корсям ми тэкөд сэтөр. Комиясыд өд пузьёдөм ватё век сэтөр корйён гёрдөдлісны. Позьё и пув кор содтыны.

Ваня видзёдаліс ты гөгөрсө. Ваыс пёртмасис шонді водзас уна рөмөн. Вөлі чуймөдана чөв-лөнь. Сөмын кылыштіс би-пурлөн трачкөдчөмыс...

– Ваньё! Чайыд дась! Лок туруна чайсө юыштам! – корис писө батыс.

Ваня чурснитіс гоз-мөдысь юанторсө, акнитіс.

– Збыль тай чөскыд вөлөма вөрса чайыд! – чуймис зонка да весиг синсө куньліс.

Сэтөра чай юөм бөрын заводитісны вуграсьны.

– Черийдлөн пө юрыс пыдын. А ми тэкөд видлам сійөс кыскыны. Сідз өд? – гогнитіс юрнас батыс да мыччис пиыслы вугыр шатин.

Ваня синсө эз вештыв таб вывсьыс. Колис недыр кад. Со и вөрзбыштіс табйыс да йөктыштіс ва веркөсын. Зонка лэптыштіс шатинсө вывлань. «Мыйкө шедіс!» – радліс зонка. Но мыйлакө бара дум вылас уси төрытья лоөмторйыс: «Колөкө, вакульыд самасис?»

Вугырө пысасьөма гөрд бокъяса съөд визя ёкыш! Тайө Ванялөн медводдза чери. Съөлөмыс ломаліс радлунөн. «Колө та йылысь висьтавны Мишөлы», – мөвпаліс нин сыкөд аддзысьлөм йылысь детинка.

Лунтырнад зонкалы шедіс квайт дзир-далысь кельчи да пань кузя куим ляпапи. Батьыслы шедіс некымын гырысь ёкыш да паськыд ляпа, өти ыджыдкодь сир. Пажын бөрас петіс уна геб-ном. Ваня өвтчис сы гөгөр бергалысь юрсигусьясысь.

– Уна геб-ном петіс, юрсигусь мөдіс лэбавны – зэрмыны көсйө,– юөртіс бать.– Гортлань мөдөдчам. Тырмымөн нин талун шеді. Тэа-меалы мойвиис! Аски пөчыд чөскыд черинянь пөжалас!

Видз вывті восьлалігөн Ваня казяліс: энэжыс мөдіс визьөн-визьөн пөртмасьны.

– Ваньё, видзөд, кыдзи востымасьё! Шуёны: востымыс\* кө пө мича – бара на зэрмас. Мед зэрыштас – тшак петас.

Рытгорулыс зэрмис. «Батьёй тай збыль төдөма зэр йывсьыс»,– төд вылас уси зонкалы лунся сёрниыс.

1. Мыйөн чөсмасис Ваня батьыскөд чери кыйигөн?

2. Мыйла вөлі любө кыкнан вуграсьысьыслы?

3. Кыдзи батьыс төдіс зэр матыстчөмсө?

4. Мый серти йөзыс төдмалёны зэра поводдясө?

## Дона гоб.

Коми мортыдлөн сьёлöмыс бурмö сöмын парма-вöрын. Тані сьлөн и сёян, и ломтас. Тані сійö тыр морöснас лолалö сöстөм сынödөн.

Кьдзрассянь неылын грездсалөн эм радeйтанаин – гулыд яг. Асывнас тані кыпыд да лөнъ. Ясыда кылö яглөн лов шыыс. Шувгöны кузь пожöмъяс, мойдöны помась-лытöм кузь мойд.

Яг бокті тельгö-визувтö тэрыб шор, нуö васö Лыаюö. Ваыс тайö шорас сöдз, кöдзыд. Уна вотчысьöс да кыйсьысьöс юктöдліс тайö шорыс аслас чöскыд көра ваөн!

Шоныд зэр бöрын ягас петлывлö уна тшак. Батыс синнас видзöдліс вывлань: пожöм йывъясыс быттö пыкöмаöсь енэжсö. Яглөн мича серпасыс кыпöдіс батя-пиалысь ловсö.

– Тшакыд эськö кока да, оз тай ачыс лок чуманад, – шмонитіс бать. – Кытшов-тыштам, пиук, ягсö. Гашкö, татысь дона гоб сюрас.

Ваня восьлаліс батыскöд орччөн да видзöдіс кок улас. Друг син улас уси пемьдгöрд ёкмыль. Копыртчис да вом тырнас нюмдіс: нитш вылас зымвидзис банйöм тупöсь кодъ тшак.

– Батьё! Со кутшөм тшак меным сюри! – чиктыліс нимкодъысла детинка.

– Сюсь синмыд тай медводз чөскыд тшаксө казяліс, – ошкис писө батыс. – Тайё, Ваньё, медся дона тшак – еджыд гоб. Пуртнад вунды подйөдыс. Зэр бөрад татчө тшакыд выльысь на петас.

Ваня чилснитіс-вундіс гоблысь кызіник подсө. Видзөдліс еджыд вундөминсө, инмөдліс бан бокас, весиг малыштіс. Сэссия вөлисти пуктіс чуманас.

– Тайё тшакыд эз өтнас быдмы. Вай жө матігөгөрсъыс корсъяшт мукөдсө, – тшөктіс батыс.

И збыль, некымын воськов вөчөм бөрын зонкалы сюрис мөд татшөм жө вөрса дивө.

1. Мый выльсө төдмаліс Ваня тшак вотөм йылысь?

2. Коми муын еджыд гобсө уна ногөн шуоны: *белөй гриб, дона гоб, яг выв тшак, му тшак, еджыд мусюр, кыз ошжюр, роч гоб, кыз кок*. А кызди тэ тайё тшаксө шуан?

3. Кутшөм тшакъяс тэ төдан? Лөсьөд тшак вотөм йылысь висът.

## Вөрса мича прöшви.

Төдны зільысь мортыд вөрөд ветліг-мунігас казавлө сэтысь уна гусятор. Быд лэбач-пөтка и гут-гаг олө аслас олөмөн. Налөн оласногыс топыда йитчөма вөр-вакөд.



Ванялөн батыс ичөтсянныс радейтліс ветлыны вөрөд. Подөнтө ветлігөн уна сикас серпас аддзылан вөрсыйд! Некод тані оз тэрмөдлы. Апа вөрса сөстөм сынөдсө лунтыр – он пөтлы!

Лун шөр кадө тыра пестерөн да чуманөн бая-пия петісны ягысь. Со и грездө нуөдысь ордым.

– Шойччыштам, нуръясьыштам тані, Ваньө, – чукөстіс писө батыс да пуктіс пестерсө коз пу улө.

Чөскыд жө вөлөма мудз бөрад выа нянныд да пувъя ваыд! Ваня нюжөдчис небыд нитш вылө. Юр весьтас – лөзысь-лөз енэж. Синсө куньөмөн куйлыштіс. Тшактө корсигад ёна мудзсьөма. Том мортыдлөн тай регыд и бырө мудзыд. Восьтіс синсө, видзөдліс орччөн сулалысь ляпкыдик коз

пуяс вылө. А сәні прөшви кодь мичаысь-мича серпас! Тайө чераньлөн уджыс, сійө кыёма татшөм мичаторсө. Везйыс уна рөмөн югъяліс-вераліс шонді водзас.

– Батьө, кутшөм лөсьыда чераньыслөн везйыс артмөма! – индіс аддзөмтор вылас детинка. – А кызди нө пырыс тыдалана везйыс чераньясылөн артмө?

– Нопъя черань увйысь увйө вуджигөн клей кодьөс лэдзө. Сійө чорзьө-кынмө, оз оръясь, – висьталіс чераньлысь гусяторсө батыс.

Ваня сувтіс да кокчунясьөмөн видзөдліс черань везсө:

– Со гутыс сибдөма везъяс!

– Тадзи и куталө чераньыд гут-гагтө, вердө асьсө. Öні сійө миянысь дзевсьөмөн кыйөдчө.

Зонка синнас корсьыштіс прөшви кыысьсө, но эз аддзы.

1. Кутшөм гусятор зонка төдмаліс черань йылысь?

2. Кызди чераньыс судзөдө аслыс сөянсө?

## Көні дзебсясьö йөлöгä?

Шойччыштöм бöрын батя-пиалөн öдйöджык восьлавсис. Вуджисны вöрса прöсек. Воис важ пес керас.

– Ваньö! Тайö керасас пувйыс бура быдмö. Тэ воём пувсö вотышт, сёйышт. Сöмын некытчö татысь эн мун! – велöдiс писö батыс. – А ме тэрыба кытшовта лэч туйöс\*.

Батыс колис пестерсö да чумансö пиыс дiнö, вошис пуяс саяс. Восьсаинын пувйыс пев пом кодь быдмöма. Муговгöрдөн дзирдалiс вотöсыс. Мукöд розсьыс дзонь китыр позьö чукöртны.

Ваня тэрыба вотiс гырысь пувсö. Сэссия пуктiс чумансö. Видзöдлiс гөгöрбок: оз-ö тыдав батыс. Öтнаслы шуштöм лои. «Кöть эськö öдйöджык нин батьöй мед локтас. Вөр шöрас öтнамöс колис! А оз кө бöрсö аддзы ме дорö туйсö? Гашкö, вошис нин?» – мөвпыштiс зонка. Синваыс весиг кутiс доршасьны.

– Э-э-э! Ба-а-атьö-ö-ö! – вөр тырнас горöдiс Ваня.

Кыськö ылысь сылы воис воча горödöм: «Батьö-ö-ö!». Ваня чуймис. Кывзыштiс чöвлөнъсö. Сэссия выльысь горödиc батысö. Кысянькö пыдiсянь воис бөр сийö жö горödö-

мыс. Здук-мөд мысыт матынкодь зонка кыліс батыслысь төдса гөлөссө:

– Коді нө тані вөрсө шызьөдө?

Ваня котөртис батыслы воча:

– Батьө, көні тэ сы дырасө ветлін? Мый-ла меным воча эн шыась? А ме... Ме чайті – вошин тэ... , – эз на эскы зонка.

Батыс бурөдіс писө:

– Ме өд шуи тэныд: кытшовта вөрсө да бөр воа тэ дорө. Оз ков повны ас вөрад. Тані некытчө вошнысө.

– Код нө эськө ме моз жө вөрас горзіс: «Батьө»?

– Тэ йөлөгакөд, тыдалө, сёрнитөмыд. Ассыд жө горөдөмтө кылөмыд. Ме өд вель ылын вөлі. Горзөмыд меөдз эз во. Гөлөсыд паныдасис ягса пуясыскөд дай бөр бергөд-чис тэлань.

Батыс ошкыштіс писө тэрыба вот-чөмсьыс. Ая-пия мөдөдчисны вөр туйөд: водзас – батыс, бөрас – пиыс.

– Со кутшөм гажа вөрыс! Ас вөр-ваад пө быд пу нюмъөвтө! Ме өд, пиук, көсья, ме-дым тэ меным вөлін вөр-ваті ветлысь бур өртөн!

Да, шуштөм, дерт, вөлі Ванялы бать-төгыс. Но сійө венласис полөмыскөд. Öні зонка збоя восьлаліс төдса вөр туйөд. Сы водзын муніс зумыд воськола писькөс вөралысь. Тайө вөрас сійө төдіс быд туй!

1. Мыйла вöрын кылö йөлöга шыыс? Кывлін-ö тэ йөлöга шысö? Висьтав: кöні да кор?

2. Мыйысь позьö ошкыны Ваняös? Кутшöм мөвпгъяс майшөдлісны сійös вöрын?

3. Кызди тэ донгъялан батя-пиалысь ёрта-сьöмсö?

### **Видз выв мич.**

Грездсянь неылын шыльквидзис видз. Уна сикас рөмөн гажөдö сійö синтö гожеся кадö! Со вöсни кузь кок йылас копрасьö жыннян турун\*. Тані жö гөрд биторгъясөн öзйышталö бобöнянь. Көнсюрö лөз синсö лапйөдлö мылөдвуж\*. Гажаа довйөдлöны еджыд юрнас катшасингъяс. Гөгөр лэбалöны-дзизгöны мазіяс, корсьöны дзоридзысь юмов нёнялантор. Небыд төвру вайö чöскыд көр.

– Кутшöм мича виддзыс! – нимкодясис мича серпаснас мамыс.– Гожöмыс быттьö чукөртöма став мичлунсö! Дзоридзгъясыс быттьö ошйысьöны öта-мөд водзас. Быдөн на пиысь көсйö лоны медся тшапөн!

Гожеся мича серпасөн нимкодяссьöм бöрын эня-пиа мөдөдчисны корсьны бур-дөдчан турун. Пода туй нуөдіс эжмөм му

бокты. Тані кӱдзлывлӱмаӱсь анькытш. А ӱні дзоньнас вевттысьӱма еджыд чута эшкынӱн.

– Ванюш, ми тӱкӱд вотыштам бурдӱдчан катшасинсӱ. Со сійӱ быдмӱ му пӱлӱныс, бокинджык. Оз шыбитчы синмад, абу пашкыр. Выныс тайӱ дзоридзыслӱн пытшкас, – велӱдис писӱ мамыс. Сӱсся петкӱдлӱс колана быдмӱгсӱ. Эня-пия кӱрзинаӱ чукӱртӱсны бурдӱдчан катшасинсӱ.

– Мамӱ, мича дзоридзсӱ тшӱтш жӱ ӱктыштам, – нуӱдчис пиыс видз шӱрлань.

– Лок инӱ нетшкыштам и мич вылӱ. Важӱн ми катшасинсӱ юркытш\* вылӱ чукӱртлӱм, – дум вылас усис мамыслы ичӱтдырыс.

Ваня бӱрӱйс видз вывсӱыс зумыд заа мичасӱыс-мича катшасинсӱ. «Мед и гортсаяс аддзыласны тайӱ виддзыслысь мичсӱ», – мӱвпалӱс пӱль-пӱч йывсӱыс зонка.

1. Мыйӱн торъялӱ бурдӱдчан катшасин мича дзоридзысь?

2. Кутшӱм буртор вайӱ тайӱ дзоридзыс мортлы?

3. Кужан-ӱ тӱ торӱӱдны кыкнан сикас дзоридзсӱ? Серпасав найӱс.

4. Кутшӱм серпас позьӱ дасьтыны тайӱ висьт серти?

## Пожөмлөн паспорт.

Пөль-пөч керка дорын быдмисны пуяс.  
Ыджыдысь-ыджыд кызд, пашкыр льөм да  
дзоляник пелысь гажөдісны өшинь увсө.

Шемөсмөдан мича льөм пуыс тулыснас!  
Еджыд кудриа юра ичмонь кодь сулалө,  
мичнас ышнясьө. Дзоридзалан каднас пу-  
сянь өвтө аслысьяма чөскыд көрөн. Чөскыд  
көрсө апыштөм могысь ветлысь-мунысь  
ньюжмөдлөны воськовсө.

Керка йөрын вужьясис-овмөдчис нөшта  
өти пу – пелысь. Сійө сёр арын торья нин  
мича ярьюгыда өзьялан гөрд розьяснас.  
Ваня бура помнитө батыслысь пашкыр  
юра ляпкыдик пелысь пу мөдлапөлысь  
вайөмсө.

Уна во нин өшинювса град помас быдмө  
өтка пожөм. Тайө пуыс сайөдіс шонді  
югөрсө град выв пуктаслы. Пөльлы эськө  
жаль вөлі пуыс, но нинөм он кер.

– Коля, карад мунтөдз вай жө пөрөдам  
пожөмсө да пескө пилитам, – корис отсөг  
вылө писө.

Пилаөн өрөдісны пулысь дінсө.

– Часлы, видзөдлам пуыслысь пас-  
портсө, – шуис дедыс да чукөстіс Ваняөс.

Пөльыс ки пыдөснас чышкыштіс пили-  
төминсө да сюся видзөдліс.

– Ивö, аддзан кытшъяссö вундассыс? Тайö – вогögöрся пасъяс. Пожöмыдлön быд во содö кытшыс. Тэ öд, тьöзö, артасьнытö кужан нин? Лыдды сьömössяньыс\* кытш лыдсö.

Ваня эскытög видзöдліс пöльыс вылö: гашкö, шмонитö да. Сэссия видзöдліс шпын-нялысь батыс вылö.



– Лыдды, лыдды, пиук! Тöдмалан, кор ме школасö помавлі.

– Öти, кык, куим, нель ... – заводитіс лыддыны зонка.– Дас сизим!

– Сідзкö, дас сизим во быдмöма пожöмным,– кывкöрталіс пöль.– Артмö, дас сизим во сайын нин тэ мунлін бать-мам сойборд увсьыд...

– Сідз тай,– ньылыд муніс батыслы пиыс.

Ваня выль пöв лыддис пожöм пуыслысь вогögöрся кытшъяссö да мöвпаліс ас кежсьыс: «Вөлöмкö, со кыдзи позьö тöдмавны пожöм пуыдлысь арлыдсö. Пожöмыдлön, сідзкö, эм аслыссяма паспорт – быдман пас».

1. Кутшөм пуяс быдмисны пöль-пöчыслөн öшинь улас?

2. Кыдзи зонка велаліс тöдмавны пожöмлысь арлыдсö?

## **Вежань ордын.**

Ванялөн Катьö вежаньыс олö грезд катыд помас. Сійö косіник, тэрыб сёрниа, нюмыд чужöмбана, ур кодь пельк. Грездса олöма нывбабаяскöд тшöкыда ветлывлö сывны клубö. Верöсыс висьöдчывлöма, водз кувсьöма. Öтка олөм олö, но шудтöмөн асьсö оз лыдды. Видзö-дöзьöритö ыж да чипан. Быд удж на ачыс вöчö. «Сьölөм вылад кө воö уджыд, верман вöчны», – шулывлö вежань.

Пöчсö моз жö Ваня радейтö и вежаньсö. Стрöка кө сюрö, пыр жö сы дорö нуöдчö. Колö öд мыйöнкö отсыштны öткөн олысь вежаньыслы. Батьсö карö колльöдөм бöрын бара нин дзайгысьö:

– Мамук, лок Катьö тьötка дорад ветлам!

– Ветлам инö, турунсö куртны отсыштам, – вочавидзис мамыс.

жаньыс да Ванялөн батыс ытшкисны град йорсьыс борсö. Туруныс бура нин косьмöма. Ванялы сетисны пелькиник куран.

– Тайö курансö тэнад пöльыд на вöчлис, – висьталис Катьö тьöтка. – Льöм пуысь вöчлöма да, öнöдз на со лы кодь пиньясыс!

Мамыс петкөдлис пиыслы, кызди колö курансö кутны да асланьыс шылькнитны-кыскыштны. Ваня радпырысь куртис лёддзö\*. Сэссия öтлаын вöчисны öти ыджыд турун юр.

– Локтö пырамöй, – корис вежаньыс. – Аски нин нöбйөн кыскалам.

– Ми аски бара на волам, вежань, – кöсьысис зонка да вошис öшинювса öмидз куст пиö.

...Вотöсыс сыв нин. Сюян вомад небзьöм вотöссö – ачыс кыв улад и пычалö! Сидз и вöйысьö зонкалы: «Сей! Тэ öд таво эн на видлы чöскыд öмидзсö!» Пöчыс эськö унаысь öлөдлис-велөдлис внукъяссö: «Йöз йöрысь тшöктытöг да юасьтöг кинад нинöм эн вөрөдöй!» Но кыз нö верман кутны асьтö?!

Ваня суйис гач зептас кисö, нюжөдчис кисьмöм вотöслань, калькнитис-восьтис вомсö. Со пö циркын моз веськыда вомö вотöстö öкта!

Друг детинкалысь бандзибсö ёкнитис-сотыштис.



– О-о-й! Чужомой сотчө! – лөк горшөн горөдис зонка.

Ымралысь бандзиба Ваня котөрөн пырис вежаньыс ордө.

– Мый нин бара тэкөд лои? – повзыштіс мамыс.

– О-ой! Чужөмөс сотө! Сэни өмидз кустьяс пөвстас... Сотө-ө-ө!

– Бара, тыдалө, петшөрыд өмидз пытшкас петөма, – майшасис вежаньыс. – Вай пөлышта, Ивук, мед бурдас...

Вежаньыс кепысясис да петис ывлаө: нетшкышта пө петшөрсө. Недыр мысыт сийө

– Жар гожомнад со и омидзыд нин, вөлөмкө, кисьмөма! Да өд, бласлө кристос, сэтшөм гырысь быдмөма. Сөй, дитюк! Век на зөлитө? – мелі гөлөсөн юалис вежаньыс да пөльыштіс гөрдөдөминсө.

Вочавидзөм пыдди зонка нюжөдчис өмидзла.

– Мамө, а мыйла нө эськө петшөрыс сотө?

– Петшөрыслөн эм уна ёсь сітор. Сійө и сотө... Тэныд тай со чужөмад и веська-лөма.

Гортас мунігөн нин Ваня висьталіс мамыслы вежань йөрсьыс өмидз видлөм йывсьыс. Мамыс ёна и сералис пиыслөн мудера вотчөм вылын:

– Ванюш, тэ көсйин юасьтөгьд өмидз-нас чөсмасьыштны, а петшөрыд тэнө таысь и сотіс! Вежаньыд тэнад зэв шань да лышкыд. Мөдысь ветлам на сы ордө. Отсыштам өмидзсө вотны, мед варенньө пуас. Ёмидз варенньөыд өд висигъясад бурдөдчынытө ковмывлө.

1. Кыдзи отсасисны Катьө тьөткаыслы Ваня да мамыс?

2. Кыдз тэ донъялан зонкалысь вежань йөрас вөчөмторсө?

3. Висьтав, мыйла сотө петшөрыс?

## «Чөскыд» шыд.

Водз асывсянь пöчыс ноксис пач дорын. Пуис чөскыд яя шыд. Дасьтіс и пемöсыслы сёянтор. Кыкнан пусян дозсö суйис пач пытшкö: мед пö пажынöдзыс пöжсьыштас-небзьыштас сёяныс.

Турунтö куртöм бöрад мудз вывсьыс Ваньöлөн чөскыда узьсис. Мамыслы жаль лои чуксавны писö. Кыкөн пöчыскöд му-нісны вотчыны раскö.

Вонъяс узьöмыс зонкалөн быттö здук мында и вöлі. Садьмис, тэрыба юыштіс йöv да синсö тілигтыр котөртіс Мишö ёртыс дорö.

Мича луннад зонпоснилы эз овсьы öшинь улын. Вадор кыскис. Кык ёрт котөрөн во-исны пöльыс дорö вöзйысьны:

– Пöльö, ме Мишököд вадорö лэччыла.

– Шоныд тай луныс, лэччылöй. Сöмын сёйыштöй. Пöчыд чөскыд яя шыд пуöма. Асьныд кыскöй пачсьыд да сёйöй.

Ваня кыскис ыджыд пачысь шыд доз. Кынöмыс лёкысь нин муракылö. «Чөскыд яя шыдтö кынöм сьумалігад ставсö лупсуй-там-сёям! Ёртöс чөсмöдлышта», – ас кежас ошкис пöчыслысь пуöмторсö зонка да мыч-чис ёртыслы шыдсö ыджыд тасьті тыр.

– Лок, Мишö, пуксьы. Миян бабö зэв чөскыда пусьö!

Асьсө эз жö удзöд: уна жö сöвтис яя шыдтö. Заводитисны панясьны.

– Мыйкö тай нö дзик дуб шыдыс! – вом дорнас тяткөдчис Ваньö да вайис пызан вылö сов доз.– Солав, Мишö. Бабöй вунöдöма солавнысö...

Шыдсö солалыштöм бöрын водзö мöдисны панясьны. Мишö тют-тяткерис вомнас. Сэссия гудралис шыдсö да сюся видзöдлис тасьтиас.

– Бабыд картофельсö абу весалöма кö-а? Менам мамöй картофельтö лöсьыда весалöмөн да вундалöмөн пуктö. А тані со джынъя весавтöм картофель! – шензьöмпырысь сёрнитис Мишö.

– Луксö, буракö, вунöдöма талун бабöй пуктыны, – тшöтш жö шензис Ваньö.– Часлы, ме град йөрö котöртла да луксö туруннас нетшышта.

Ваньö котöртис град йөрö. Тайö каднас Мишö недыр гудралыштис шыдсö паньнас да корсис яй. «Пöльыс шуö: яя шыд пö пачын. Весиг öти яй ёкмыль оз тыдав! И мыйсяма тайö яя шыд?!» – мöвпалис сийö. Котөрөн пырис Ваня, весалис луксö да мычис ёртыслы:

– Лукнас шыдтö сей! Тадз, гашкö, чöскыдджык лоö?

– Лукнад тай збыль чөскыдджык вөлөма, – төдчөдыштіс Мишө да тэрыба паняліс шома шыдсө.

Тасьтіяс кушмисны.

– Пөльө! Аттьө шома шыдсьыд! Ми Мишөкөд вадорө котөртлам! – здук кежлө мыччысьліс вөчасян керкаө Ваня.

Вотчысьяс воисны вөрысь. Яя шыдөн пө вай пажнайтам. Пөч кыскис пачысь шыд дозсө.

– Но мокасьтө! Сөйтөгыс миян Ивукным өнөдз на век котралө-уялө. Эн өмөй, Иван, висьтав сылы: яя шыдыс пө пачас, – дөжна-сис-сөрнитіс пөч.

– Ивөыд Мишө ёртыскөд кыкөн сөйисны, – падъялігмоз вочавидзис пөль да мыйкө мөвпыштіс.

– Кытчө нө Люсюкыслөн сөяныс лоөма? – акнитіс пөч. – Иван, тэ өмөй көзатө вердін?

– Аттө, ерөмакань! Тайө челядыд тай соралөмаось сөян дозтө! – весьөпөрліс лоөмторсьыс пөль. Сэсса вомтырнас нюмъөвтіс.

Кыліс гажа серам...

1. Позьө-ө шуны, мый тайө висьтыс серамбана?

2. Мый позьө шуны Ванялөн «гөститөдчөм» йылысь?

## Ас быдтөм анькытшыд чөскыдджык.

Тулысын сиктад уна уджыд. Войвылад гожомыд өд көч бөж кузя. Быдөн зильоны ас кадө гөрны-көдзны. Бать-мамыскөд Ваня тшөтш жө воліс пуктысьны. Зэв сьөлөмсянныс корис ичөтик градтор: «Анькытш ме көдза. Ачым и мөда гожомнас дөзьөритны».

Пөчыс сетіс Ванялы дозйын көтөдөм анькытш. Зырийөн зонка гөриснебзьөдіс мусө. Сэссия тусьөн-тусьөн смяліс анькытш көйдыссө муас: быдмөй-сөвмөй!

Пөль-пөч радлөны: «Оз нин гусьөн мунны внукъясным анькытштө сөйны Ольөш фермерөн көдзөм му вылад». А анькытшыд челядыдлы зэв колана чөсмасянтор. Гожомнас Ваняөс велөдіс пөльыс:

— Ивө! Анькытшыд өд зэв на кузя быдмас. Колө бедьяс сатшйөдлыны, медым быдтанторйыд эз пөр муас. Анькытш пуртөсыд кө водз инмас муас, вижөдас, оз мөд быдмыны.



Мишö ёртыс радейтö уджавнысö. Бать-ыслысь унаторйö нин велалöма. Öти гождя лунö кык ёрт вöчалісны бедьяс да сатш-калісны анькытш муö. Лэпталісны выв-ланьö му вылö пöрöм быдтассö. Унаысь Ваня матыстчыліс аслас град дорö, но анькытш пуртöсьясыс вöліны вывті на вösниось...

...Öтчыд Ваня водз садьмис кутшöмкö шемöсмöдана вöтысь. Сійö быттьö сулалö джуджыд гöра йылын, а син водзас татшöм серпас: шыльквидзö помтöм-дортöм лö-залысь ва веркös. Абу Лыаю кодь лөнъ да векни. Ваыс көнкö ылын-ылын öтлаасьö енэжыскöд. Ыджыд гыяс кыпавлöны ва веркösö да швачнитöны быг кодь васö лыа дорösас...

«Мый нö эськö ме вöтнас аддзылі? Абу-ö тайö саридзыд?» – мövпаліс вöt йывсьыс зонка. Котөрөн петіс аслас град дінö. Ань-кытшыд, майбыр, кыптöма вылөдз! Пур-тöсьясыс кызöсь нин. Нетшыштіс öти пуртös, восьтіс: тусьясыс гырысь кодьöсь нин! Нямяліс да нылыштіс – чöскыд! Сэс-ся зіля вотіс гырысьджык пуртöсьяссö да пыртіс гортас.

– Со нин кутшöм гырысь менам ань-кытшыд! Сейöй! – радпырысь паськөдіс вотöмсö пызан вылö.– Зэв öд чöскыд! Вид-лöй!

– Да өд ачыл и көдзин, и дөзёритин!  
Дерт, чөскыд! Аслад пуктөмторйыд век  
чөскыдджык! – ошкис внуксө пöльыс.

– Позьё, ме некымын пуртөс Мишöлы  
котөртöда? Сийö өд тшöтш отсасис!

Триньöбтис телефон: карсянь звöнитис  
батыс. Мамыслөн нюммуном серти зонка  
гөгөрвоис: батысянныс кутшöмкө нимкодъ  
юөр.

– Ванюш! Батыыд ньöбöма нин билетъ-  
яс. Кык лун мысыт мунам лунвыв саридз  
дорö шойччыны.

– Ме Мишö дорö зия котөртла!.. Ань-  
кытшөн чöсмöдла! Саридз йылысь висъта-  
ла и!.. – чиктылис радысла зонка.– А ме,  
мамук, вötөн талун саридзтö аддзыли! И  
Эжваысь, и Лыаюысь паськыдджык дай зэв  
гыа...

1. Висътав, кыдзи зонка дөзёритис ас көдзём  
анькытшсö.

2. Позьё-ö Мишöос да Ваньöос шуны бур  
ёртъясөн? Мыйла?

3. Кыдзи тэ гөгөрвоан пöльыслысь шуöмсö:  
«Аслад пуктөмторйыд век чөскыдджык»?



## Вöтыд збыльмис.

Шойччан кад. Во чөж уджалом-мырсьом бöрад, дерт, верстьö йöзлы окота мудз личöдны да шойччыштны. Оз öд прöстö шуны: удж бöрад шойччöгыд – мöд уджлы отсöг. Быдөн ас ногыс коллялö шойччан кадсö.

Бать-мамыскөд Ваня дасьтысис туйо – лунвыв саридз дорө. Мамыс тшөктіс пиыслы пуктыны чемоданө сөмын медколанасө. Ваня дыр мөвпаліс аслас жырйын, лукйысис ворсантор видзан шкапас. Мыйкө сёрнитіс ас кежсьыс. Асывнас мамыс пондіс лөсьөдны туйо босьтан көлуй. Восьтіс чемодансө да чуймис: тырыс нин сөвтөма-тувьялөма пиыс став ворсанторсө. Тані и машинаяс, и трактор, и самолёт, и салдатыяс... Абу вунөдөма пуктыны зонкаыд и лыйсян автомат да наган.

– Ванюш! Тэ тай өтнад чемодансө тыртөмыд? Көлуйыд өд куимыдлөн вель уна, – мелі гөлөсөн сёрнитіс мамыс. – Медводз тэчам паськөм. А чачатө ковмас эновтлыны. Купайтчан шапкатө, кытштө да ворсөм вылө мачтө ми сәні ньөбам!

– Мамө! Нагантө да автоматтө быть колө меным босьтны! – водзсасис мамыскөд зонка. – Ме тіянөс ылі муад понда видзны лөк йөзысь!

Мамыс бурөн өлөдіс том путешественникөс: туйо пө сөмын медся коланаторсө босьтлөны. Дыр сёрнитөм бөрын пиыс кывзысис мамыслысь: наган-автомат колис гортас.

Сыктывкарын пуксисны ыджыд самолөтө. Медводдзаысь лэбысьлы ставыс вөлі

шензёдана. Быдтор тёдны окотитысь зонка лэбигчөжыс видзёдіс гөгрөс өшиньё: оз-ө тыдовтчы саридзыс.

Самолёт бёрын саридз дорас нуис автобус. Мунігчөжыс Ваня гонняліс өтарёмодарё, видзёдаліс джуджыдсьыс-джуджыд кыртаяс\* да увтасінъяс. Казяліс лунвыв вөр-валысь аслыспөлөслунсё.

– Мамё, батьё! Кёні нё саридзыд – Чёрной морейд?

– Нёрөвитышт, регыд нин чолөмасын лунвыв саридзыскөд, – такөдіс писё батьыс.

Гөраяс помасисны, и нем виччысьтөг югнитіс лөзалысь веркөс. Зонка ырскөбтіс-чеччыштіс да гора гөлөсөн петкөдліс дыр виччысянтор вылас: «Море! Мо-о-ре! Лунвыв саридз!»

Зонка син вештывтөг видзёдіс уна рёмөн пөртмасысь саридз вылө. Шондіыс быттё купайтчис лөнь ваас... Со тэ кутшөм вөлөмыд, саридз! Ды-ыр на дзоргис саридзлань. Дзик өд татшөм серпас сійё аддзыліс воньяс узигөн! Да, збыльмис зонкалөн вөтыс! Регыд сійё кутас бультікасьны сола ваас...

1. Кызди Ваня дасьтысис лунвылө мунны?

2. Кутшөмөн зонка аддзис саридзсё?

3. Кутшөм серпас сувтіс син водзад саридз йы-

**120** лысь лыддигөн?

## Саридз гыясын.

Ваняос садьмөдiс öшинь дөра пыр писькөдчысь ярьюгыд шондiыс. Зонка звирк чеччис да матыстчис öшиньлань. Тасянь зэв бура тыдалiс саридзыс. Бать-мам чеччөмаось нин.

– Но, путешественник, кыдзи тэнад узьсис? Бур асыв! Сёйыштам да мунам вадорас, – тэрмөдлiс писö батыыс. – Асья шондiыс медся колана, оз сот. Тэрмасьышт!

Саридзыс вöлi збыльысь мича! Веркөсыс пöртмасьö-ворсö. А шондi мыччöма нин асьыс нюмъялан бансö да паськыда шпыннялö. Быдөнлы сетö асьыс шоныдсö, сьödөдз гожйөдö-мелiалö шойччыны воём йөзöс. Шоныдыд, майбыр, быд мортлы колö. Оз öд прöста кыскы лунвыв саридзыд ас дорас: «Локтöй, шонтысьöй, гожводзалöй! Кузь кöдзыд тövнад öд кынминныд...»

Воисны купайтчанiнö. Лыаыс берег пöлöнас паччөр кодь пöсь. Ваня тэрыба



шыблаліс ас вывсьыс паськөмсө да котөрөн дзумгысис ваас. Сы бөрся ваө пырисны и бать-мамыс. Зонка чиктыліс-шенасис, швачөдіс ва веркөсас, резсис... Долод вөлі сылөн сьөлөм вылас: збыльысь купайтчө саридзын!

Зонка сюся видзөдліс ва пыдөсө: тыдалө бура. Ваыс сөдз, лөзов-турунвиж. Босьтіс содзас васө, видзөдліс – мыйлакө абу сьөд?! «Мыйла нө инө Чёрной мореөн шуоны? Ваыс тай миян Лыаюын кодь сөдз, пырыс тыдалана!» – ас кежсьыс дивуйтчис зонка.

Ваня суныштіс ваас, юрсө көтөдыштіс. Сэссия юрсө выль пөв суйис да тшөкмуні: ныр пырыс вомөдзыс воис сола ва. Эз эскы да бара видліс-ырситіс ки пыдөссьыс васө. Збыльысь сола!

– Мамө, збыль тай саридз ваыс вөлөм сола!..

– Тайө солыс, Ванюш, мортыдлы бурдөд-чантор. Сы вөсна и та ылнаөдз локтім, – гөгөрвоөдіс мамыс да корис писө. – Лок пыдөджык пыралам. Эн пов! Босьт кытштө.

Резина кытнас зонка повтөг уяліс өтарө-мөдарө. Сэссия збоя мөдөдчис батьыс бөрся, пыдөджык.

– Ваньө! Тайө саридзын олысь – медуза, – шуис батьыс да петкөдліс вапытшса

веглясьысьёс.— Таысь эн пов! Лок матыстчы да видзёдлы.

И збыль, ваысь зонка аддзис пырыс тыдалана еджгов ёкмыль. Детинка медводзсюся синмаліс медузасё, сэссия босьтіс соддзас да бөр лэдзис ваё. Медуза өдйё вошис гыяс пөвстас.

1. Кутшөм кывъяс отсөгөн петкөдлөма лунвыв шондісө? Содты мича кывъяс «шонді» кыв дінө.

2. Мыйён шензьөдіс Ваняёс саридзыс медводдза луннас?

3. Кыдз тэ чайтан: мыйла мореыс шусьё Чёрнойён?

4. Төдмав, мыйла саридзын ваыс сола.

## Лунвыв чушкысьяс.

Карса рынок вылас мыйыс сөмын абу! Мыйта лунвылад чөскыдторйыс! Быдтор Ванялы окота видлыны!

Бать кийн ньөрйысь кыём көрзина. Ваня азым-лунён көрзинаыд өдйё и тырис. Фруктысь өтар



ньобисны ыджыдысь-ыджыд арбуз. Пажын кадö чöсмасисны персикöн да абрикосöн, а арбузсö босьтисны саридз дорö.

Недыр купайтчыштöм бöрын Ванялы зэв окота лои видлыны арбузсö. Батьыс вундаліс да мыччис пиыслы сözваа арбуз чöлан. Зонка окотапырысь сёйис, босьтис мөдöс. Друг сы весьтын мөдісны гögравны чушканзіяс. Ваня чеччалөмөн шенасис-өвтчис...

– О-о-й ! О-о-й! – ёсь гөлөсөн чилөстіс зонка. – Киöй зөлитö!

Чушкөминыс дзик пыр пыктіс. Детинка вунөдіс чөскыд арбуз йывсьыс. Котөртіс саридзлань да көтөдіс сола ванас зөлитысь кисö.

«Кутшөм ныриса вөлөмаөсь лунвывса чушкысьясыд! Ме моз жö тшөтш радейтöны юмовторсö», – кывкөрталіс зонка. Бать тупкис вундалөм арбузсö. Чушкысьясыд разөдчисны, эновтісны зонкаөс.

1. Кыдзи чушканзіяс веськалісны Ваня дінö?
2. Вөвліс-ö тэкөд коркө татшөмторйыс? Висьтав сы йылысь.

## Саридздорса изъяс.

Асывсянь сёр рытөдз енежын тыдаліс доналөм шонді. Колисны лунъяс. Куимнан-ныс бура гожъялісны, лоины мугөм чужо-маось. Ванялөн мамыс ветлөдліс нюйтөн ле-читчыны: съод бурдөдчанторнас пö юрсянь кокөдз мавтöны. Ставөн юисны мине-ральнöй ва. Зонкалы, дерт, юмов көра ваыд ёнджыка воö сёлөм вылас. Но тайö бур-дөдчан васö быть колö юны. Сійö мортыд-лы сетö вын-эбös, вөтлө уна сикас висьöм.

Ваня бурпөт быд лун купайтчис, велаліс вартчыны. Экскурсия дырйи төдмасис Илля нима роч зонкакөд. Гөраясті ветліг найö



аддзылісны важ крепосът. Море дорын зонкаяс асьныс панісны изйысь крепосът тэчны. Медводз өктісны берег пөлөн уна сикас из. Артмис быдса чукөр.

– Кутшөм мича рөма да уна пөлөс из тиянлы сюрөма! – изъяссө видлалігмоз шуаліс мамыс.

Ваня да Илля сідзжө мөдісны видлавны да торйөдавны мольдджыкъяссө торъя чукөрө. Шылыд изъяс пиын найөс шензьөдісны визаяс.

– Мамө! Кыдзи нө эськө артмис татшөм уна сикас изйыс? Изъясыс шылыдөсь-мольдөсь, уна рөмаөсь, визяөсь...

– Саридз ваыс гыалігас бергөдлө изъяссө, а лыаыс шыльөдө. Дыр каднад найө со кызди гөгрөсмөмаөсь-молялөмаөсь, – во-чавидзис мамыс да водзө мөдіс видлавны кажитчана изъяссө.

– Мамө, а мыйла изъясыс уна рөмаөсь?

– Ме чайта, уна рөма изсө тадзи вөчөма ачыс лунвыв вөр-ваыс да саридзыс. Быдмыштан да ачыл төдмалан. Школаад велөдысьясыд стөчджыка висьталасны та йылысь.

Зонкаяс мөд синмөн нин видзөдалісны уна сикас изсө: визяөсь, кольквизжөсь, пемыдрудөсь, рудовизжөсь... Некымын изтор торъялісны асланыс яръюгыл дзирднас.

Посни изъя ва лыаысь кыпөдісны-  
вөчисны вель джуджыд мыльк – крепосът.  
Быд излы челядь аддзисны крепосътын  
коланаин. Стрöйба подулас пукталісны  
гырысьджыксö, сарöга пельöсасö, му-  
вывсасö. Ортсысяньыс сійöс мичмөдісны  
быдсяма шыльыд изнас. А йылас веськаліс  
меддзирдалысьыс!

1. Мыйöн шензьөдісны зонкаясöс саридз дор  
изъясыс?

2. Кыдзи артмöны уна рöма изъясыс?

3. Мыйла ва берег дорын изъясыс шыльдöсь?

4. Аддзывлін-ö тэ шемöсмöдана аслыспөлöс из?

Висьтав сы йылысь.

## Нептун лунö.

Саридздорса лыа вылын чукөрмис вель  
уна морт. Öтияс вöччöмаöсь гаж вылö моз.  
Кодсюрö вöліны шемöсмöдана паськöмаöсь.  
Унаöн маскаасьöмаöсь. Ваня тшöтш жö  
нюмсера клоун маскаöн тупкис чужöмсö.  
Кылісны гора шуалöмъяс: «Нептун локтö!  
Не-е-пту-у-ун!»

– Кöні нö Нептуныс? Ог тай ме аддзы?! –  
син лапниттöг зонка дзоргис ва веркöсö.

– Со ыджыд пыжөн вайёны саридзсяны! Аддзан? – индiс батыс пыж вылө.

И збыль. Йöзлань матыстчис паськыд пыдöса ыджыд пыж. Пыжвывсаяс мыйкö горöдлывлiсны. Сэни, джуджыд пуклöс вылын, пукалiс саридзса кöзяин – Нептун!

Сар йывсьыс Ваня уна нин кывлiс: мамыс лыддывлiс, пöчыс висьтавлiс-мойдлiс. Сартö и серпас вылысь аддзывлiс. А танi аслас öбичаа\* збыль сар!

Пыж ляскысис берегö. Недыр мысьт ён гөлöса сар сцена вылын восьтiс праздниксö. И заводитчис гажöдчöм! Ваня син водзын öта-мöдсö вежöмөн йöктiс-чеччалiс и «чериыс», и «вакуль-медузаыс», и васа мукöд олысьыс. Сямнысö петкöдлiсны и ваууса кутшöмсюрö быдмög. Вежнясисны ёмаяс, нерисны-тешитiсны йöзöс. Öти, мисьтöм паськöма да дзор юрсиа, матыстчылiс тшöтш и Ваня дорö. Тöдöмысь, кöсийс повзьöдны зонкатö. Детинкалөн сöмын серамыс петiс!

«Черномор!» – кылiсны горöдöмъяс. И со Черномор дядькöд берегö петiсны комын куим багатыр. Чуймөмпырысь дзоргис на вылө Ваня.

Гажлун помланьыс лои виччысьтöмтор. Нептун гораа чукöстiс васа мутиясöс. Сюра чöрт да некымын чöртпи нем виччысьтög петкöдчисны саридзысь. Бöжаöсь, сюраöсь,

сім сьодось... Мутиясыд уськөдчисны берегө да мөдисны шыблавны-дзумйөдлыны видзөдысьясөс ваас. Йөзыд сьов-сявмунісны берег пөлөн, эз көсйыны сетчыны налы.

– Ма-амө-ө! Ба-атьө-ө! – повзис Ваня да горөдіс оръясяна гөлөсөн. – Пы-ы-ышъям зіля, вө-ө-өйтасны!

Ваня чепөсйис уличлань да лов петтөдзыс котөртис туйвежөдз. Повзьом кокыд тай зэв вөлөм тэрыб. Öдва и суөдісны бать-мамыс. Зонка сувтыштліс, видзөдліс саридзлань: оз-ө вөтчыны мутиясыс.



Ки-кокыс тіраліс, сьөлөмыс тіпкис-чеччис...

– Батьө, збыль өмөй мутияс саридзсьыс берег вылас петісны? – чирөм гөлөсөн юасис пиыс.

– Ваньө, тайө жө сьөд нюйтөн мавтчөм зонпосни. Ёмаяс моз жө найө вөчөны йөзлы гаж. Кывлін, кыдзи сералісны-гажөдчисны чөртпияныскөд йөзыс. Найө, буракө, кодсюрөос и няйтчөдыштісны, и ваө дзумгылісны, – төд вылас уси батыслы тешкодь серпасыс. – А тэ эн пов! Лок нөшта ветлам гажөдчанінас.

Нептун лунö гажöдчисны сёр рытöдз. Ваня матысянь видзöдаліс чöртпиянлысь ышмöмсö. Öтиöс весиг бöжöдыс кватитліс. Чöртпиыд уськöдчыліс эськö вöтöдны Ваняöс... Но сиктса зонмыд сюра мутисьыд тай удалджык на вöлöма!

1. Кызди гажöдчисны шойччысьяс Нептун лунö?
2. Коді повзöдіс Ваняöс?
3. Вермис-ö венны асьыс полöмсö зонка?

### **Змей петкöдланінын.**

Войнас зэрöма. Асылыс вöлі букыд. Саридз гыаліс-скöраліс. Ваняöс жугыль босьтіс. Саридз дорö воис шонтысьны да купайтчыны, а тані арся кодь поводдя.

– Батьö, вай кöть неуна купайтчышта, – дзайгысис зонка.

– Ваыс талун саридзас гыа да кöдзыд. Татшöм луннад некод оз купайтчы, – öлöдіс писö батьыс.

– Вай инö выставка вылö ветлам, – нуöдіс мамыс.

Карса Культура керка стенысь Ваня лыддис ыджыд шыпасьяса гижöд: «Рептилии».

– Мый нө эськө тайё татшөмыс: реп-ти-ли-и? – окота лои төдны зонкалы.

– Пыралам да видзөдлам. Ачыд ставсө аддзан да и гөгөрвоан.

...Ыджыд жырыын стеклө сайын тыдаліс уна пөлөс змей. Коді лөня куйлө-вугралө, коді веглясьө. Ваня зіліс видзөдлыны быдөнөс. Сійө казяліс кык ичөтик крокодилөс. Юасис, кутшөм кадөн наысь ыджыд крокодилыс артмас. Син паськөдөмөн зонка видзөдіс анаконда вылө, а сійө вөрзьевтөг куйліс.

– Анакондаыд – мед-ся кузь да ён змей, – кыліс экскурсия нуө-дысьлөн гөлөс.

Зонка вежавидзөмөн мөдысь видзөдліс кузь змей вылад, но сійө важ мозыс куйліс, эз вөрзьев...

– Со кобра – яда змей, – индіс мамыс лыа вылын куйлысь змей вылө. Көть и стеклө сайын вөлі змейыс, мамыс өлөдіс писө: «Ванюш, эн ёна матыстчы!»

Кобраыс мыйлакө збыльысь скөра видзөдлывліс йөз вылас. Стеклөсьыс зонка лыддис гижөд «Опасно!» Гашкө, сы вөсна и



йöзыс тайö змейсö видзöдiсны ылiсянь. Кодсюрö кобра дортi мунiсны ылитi кытшовтöмөн.

– Мамö, со черепахаясыс ва пытшкын уялöны! – чуймыштiс зонка.

– Овлö кык сикас черепаха. Со öтиясыс му вылын вөрöшитчöны, ньöжйö тапикасьö-



ны. Уялысь черепахайслөн кок чунь костас няр кучик, – висьталiс мамыс.

Öти пельöсысь Ваня казялiс кольк-виж пемöсöс. Тайö, вөлöмкö, пустыняса руч! Мудер жö, тыдалö. Йöзыс сылы сеталiсны сёян, кöсйисны малыштны. Ручыд шепыштö-тшапнитö чöскыдтортö да зiля бöрыньтчö. Оз öд прöстö сийöс мудер ручнад шуны!

Унаөн видзöдiсны аслыссяма пемöс вылö. Зонка лыддис «Хамелеон» гижöд. Лыа вылын куйлiс еджговруд хамелеон. Недыр мысьт сийö дзевсис пу вужля улö. Сэтысь петiс пемыдруд пемöс.

– Батьö, а еджговруд хамелеоныс нö кытчö вошис?

– Ваньö, тайö öти и сийö жö хамелеон. Кадысь кадö сийö вежö ку рöмсö: то югыд,

Медбöрын матыстчисны королевскöй питон дорö. Питоныс шань, мича. Сы дорын йöзыс ёна бергалісны. Кодсюрö босьтлісны сійöс киас, топöдлісны морöс бердас да снимайтчисны. Ванялы тшöтш жö окота лои.

– Батьö, менö снимайт питоныскöд, – сьöлөмсянныс корис пиыс.

Ваня повтöг босьтіс киас питонöс, сывйыштіс сійöс. Здук! И нэм кежлö коліс паметьö тайö питоныскöд аддзысьлөмыс. Сійö öд Королевскöй! Со кутшöм мича!

1. Мый аддзыліс Ваня выставка вылысь?
2. Мыйөн шемöсмöдіс зонкаöс хамелеон? Мыйла тайö пемöсыс вежлалö ку рөмсö?
3. Мый тэ содтöд верман висьтавны анаконда да кобра йылысь?
4. Кутшöм змейяс йылысь тэ лыддылін да кывлін?

## **Дельфинарийын.**

Лунвылын быд шойччысь зільö веськавлыны дельфинарийö. Ваня некымын луннин нуöдчис дельфинъяс дорö. Воис вич- **133**

чысына луныс. Дельфинарийö мунисны катерөн. Палуба вывсянь нимкодясисны мелі саридзнас, мича ва веркөснас, шондіа луннас. Катерсö лайкйöдліс посни гыыс.



Со и дельфинарий. Йöзыс уна. Бать корсис пукаланін. Тасянь бура тыдаліс ва веркөсыс. Сэні мөдасны артиставны дельфинъяс. Ваня видзöдаліс гөгөрбок: көнөсь нö эськө дельфинъясыс?

Кыліс музыка. Сцена вылö петіс дельфинъясöс велöдысь. Медводз йöз водзö петкөдчис войвыв саридзын олысь – морскöй котик Вика. Ачыс съод, ставнас лөсталö, уска. Вика дыр ворсіс мачөн. Велöдысь шыбитас мачсö, а котик пелька кутö да мөдөдö бөр. Сэссия Викаöс юбкаөдісны. Кыліс мыла ворсан шы. Мича юбкаа артистка йөктіс шензьөдана вальс! Юрөбтіс тэрыб сылан гор. Вика вежис йөктанногсö: ышмөм нывка моз вежнясис өтилаын. Йöзлы, дерт, сьөлөм сертиыс вөлі йөктысь артисткайд. Но быдөн виччысисны дельфинъясöс.

«Дельфинъяс! Дельфинъяс!» – кылісны горөдөмъяс. Ва веркөсө артиставны петісны дельфинъяс. Мыйсө сөмын эз петкөдлыны найө! Нель дельфин пелька ордйысисны-чеччалісны нюжөдөм гез вомөн да кольча пыр. Ньөв моз чеччалісны вывлань, судзөдалісны вылын өшалысь ыджыд мач. Инмөдчасны мачас да бөр дзумгысясны ваө. Медся пелькнас лоины кыкөн, Аида да Барсик. Найөс чөсмөдыштісны чериөн.

Та бөрын кык дельфин петкөдлісны ассыныс винёвлунсө да авъялунсө. Барсиклы сетісны пинь весалан щөтка да паста. Сійө щөтка вылө пычиктіс пастасө да сөстөма весаліс-ниртіс ассыс пиньсө. Эз вунөд весиг ваөн пожъявны вом пытшсө!

Аида петкөдчис художникөн. Сетісны серпасалысьлы вит пөлөс фломастер да ыджыд кабала. Ва пиысь быд чеччыштөмөн Аида босьтас пиньнас колана ыджыд фломастер да вөчас аслыссяма серпас. Визь бөрся визь – кабала вылын артмөма нин дельфин мыгөр. Ванялөн гөгрөсмисны синъясыс. Быдөнөс шемөсмөдіс аддзана серпасыс: өд серпасалысьыс дельфин!

Кыліс концерт нуөдысьлөн гора гөлөс:  
– Öні лоө вuzасьөм. Быдөн верманныд ньөбны Аидалысь ас серпассө. Медводдза доныс – дас шайт!

Дас шайтысь ньобысь лои вывті уна. Вузасысь содтіс донсö: кызь шайт. Дельфинлысь автопортретсö ньобысьяслөн лыдыс эз чин.

– Батьö! Ме зэв ёна көсья серпасалысь дельфиндылысь портретсö! – эскöдана корис Ваня.

– Ме ньоба сё шайтысь! – дыр падъявтöг пыр жö индіс медыджыд донсö батыс.

Лоис чöv-лөнъ. Батя-пия веськöдчисны вузасысьсланъ. Быдөн чолöмаліс ньобасысьясös. Мужичöй мыччис зонкалы Аидалысь ас серпассö. Сэсся батыслысь сё шайтсö босьтöм бöрын вузалысьыс содтіс-стöчмöдіс:

– Тайö сьöмыс – миянлы зэв ыджыд отсöг. Ми та вылö ньобам дельфинъяслы чери.

– Сідзкö, ми дельфинъясös чериөн чöсмöдлам! – нюмъяліс Ваня.

Син кунълöм дыра быттö и вöлі артистъяслөн петкöдчöмыс. Концерт бöрас быдөн зілис матысянджык видзöдлыны дельфинъясös да Вика нима йöктысь котикös. Ваня матыстчис Аида дорö, а батыс снимайтіс писö выль тöдсакöд.

1. Кызди дельфинарийын йöзсö гажöдіс Вика нима котик?

2. Кыдзи пельклунсö петкөдлісны дельфинъяс?
3. Мыйöн ставнысö шемöсмөдіс Аида? Мый сяммис вöчны Барсик?
4. Висьтав вузасьöм йылысь. Мый вылö муно чукөртöм сьöмыс?

## Ракпаньяс.

...Медбөръя лунъяс нин шонтысисны да бурдөдчисны лунвыв саридз дорын. Öти рытö шойччысьяс петісны карö. Киподтуя йöз вöййöны ньöбны ассыныс вöчөмторсö.

Öтилаын вузасисны ракпаньясь вöчөмторйөн. Мыйыс сöмын тані абу! Медся ыджыд ракпаньяссö мавтöмаось лакөн. Ракпаньясьыс кужöмаось вöчны и дозмук, и керка мичмөдантор, и баситчантор, и чача...

Ванялы синмас шыбитчис мультфильмъясысь аддзывлөм нюмсера чача. Тайö вöлі паськыд синма, повзьөдчан вома, кыз юра пемös. Сійös кужöмөн вöчöма кузьмös да гөгрös, ыджыд да ичöt ракпаньясысь. «Видлыны кө эськө аслым вöчны татшöм ворсанторсö, – мөвпыштіс зонка. – Колö сöмын уна сикас ракпань чукөртны».

Мөд луннас купайтчыштны да ракпань корсыштны шуисны ветлыны катерөн карсяньыс ылөджык. Сэни, гөра бокас, купайтчаніныс вөлі джуджыд да изъя. Мамыскөд Ваня бузөдчис берегсянь неылын. Батьыс маскаөн суналис джуджыдінас. Васысыс мыччысьөм бөрын кыліс сылөн радлана гөлөс:

– Ваньё! Со кутшөм ракпань меным сюри!

Зонка дыр видлалис ракпаньсө. Казяліс тшупода кытшъяссө. Ваня гөгөрвоис: тани пуыдлөн моз жө вогөгөрся кытшъяс – быд вося пас!

– Батьё, мамө! А мый нө ракпань пытшкас? – юалис авъя пиыс.

– Пытшкас быдмө ловъя лов, моллюскөн шусьё. Сійё олө керка пытшкын моз, – висьталіс мамыс.

Берег пөлөн ветлігөн Ванялы да мамыслы сурис уна сикас ракпань. Батьыс саридз пыдөсыс судзөдіс куим ыджыдөс. Тадзи өти лунөн зонкалөн чукөрмис уна ракпань: кузьмөс и гөгрөс, гырысыс и посни.

Рытнас Ваня дыр видлалис чукөртөм ракпаньсө.

– Помнитанныд төрытыя вузасысыдылысыс тешкодъ чачаяссө? – шыөдчис пиыс

**138** батъ-мам дорас. – Ме тайё ракпаньяссыыс

гортын ачым видла вöчны мойдса кутшöмкö пемöсöс.

– Ас кинад вöчöмторйыд – медся донатор, – ошкыштіс пиыслысь кöсйöмсö мамыс.

Ваня медся ыджыд ракпаньсö матыстіс пель дінас.

– Кывзöй, кывзöй! Быттö саридз гыалö! – шензигтыр пиыс мыччис ракпаньсö мамбатысылы.

Детинка дыр на кывзіс шувгöмсö. Збылысь саридз гыалöм шы кылö! Сы син водзö бара сувтіс лунвыв саридзлөн гыалан серпасыс. «Со кутшöм ыджыд гусятор ракпаньыдлөн вöлöма!» – шензис-нимкодясис Ваня.

– Сідзкö, накöд тшötш ми асланым войвылö нуам саридзлысь шысö! – радлыштіс детинка.

– Аски ми бөр нин мунам войвылö, асланым Сыктывкарö. Дельфин серпасыд, чукöртöм изторьясыд, ракпаньясыд мянлы дыр на казтыласны шоныд лунвыв саридзсö, – эскöдіс писö батыс.

1. Мый могысь Ваня чукöртіс ракпаньсö? Кутшöм мöвп воис сылы?

2. Кутшöм гусятор казяліс зонка ыджыд ракпаньсö киас бергöдлöм бöрын?

3. Тöдмав на йылысь мукöд гусятор.



## Велөдчöмын медводдза воськовъяс



### Төдöмлун нимöдан гаж.

Школа. И верстьöлөн, и челядьлөн  
аслыспөлөс сьөлөмкылөм йитчöма тайö  
кывйыскөд. Ар воан медводдза лунö  
быдөнлы долыд. Олöма йөз казтылöны  
ассыныс школадырсö. Велөдчысыяс  
тэрмасьöны школаö.

Кутшөм гажа тайö арся луныс! Ма-  
мыскöд Ваня медводдзаысь муно школаö,  
Сыктывкарса национальной гимназияö.  
Тани бура велöдöны коми кыв. Зонка  
вöччöма, мышку саяс ранец, киас дзо-  
ридзяс. Сы видзöдласын поздысьöма вись-  
тавны позьтöм кыпыдлун.

Школа дорыс тыр йöзнас. Быдöн вежа-  
видзöмön чолöмасьöны. Велöдчысьяс до-  
лыдöсь: öд найö гожся кузь каникул бöрын  
аддзысисны ёрта-ёртныскöд, велöдысьяскöд.  
Мамыскöд Ваня козьналис дзоридзяссö  
медводдза велöдысьлы.

Нина Павловна вöччöма, чужöмыс нюм-  
сера. Сийö чолöмалис зонкаöс, босьтис дзо-  
ридзяссö да малыштис юрöдыс. Ванялön  
ыркмунис сьölöмыс, лои зэв нимкодъ.

Триньöбтис гора тильгун. Челядьöс  
чуксалисны классö.

– Тöдöмлун нимöдан лунön тiянöс, ме-  
нам дона челядь! –первой классö пырысьяс  
дорö шыödчис Нина Павловна. – Öни тi ве-  
лöдчысьяс. Ме көсьяс, медым школаыс  
тиянлы вайис радлун, озырмöдис выль  
тöдöмлунön, сетис быдöнлы колана сямлун.

Велöдысьлön сёрниысь Ваня бура  
гөгөрвоис: школаын велöдчöмыд – сийö быд-  
лунъя сьökыд удж. Велöдчигад колö  
сöвмöдны бур морттуйтö. Авъя олöм, бура

велөдчөм, өта-мөдөс гөгөрвоём отсаласны быдөнлы шедөдны колана төдөмлун.

Рытланьыс батыскөд Ваня муніс зонпоснилы восьтөм музыкаө велөдчан школаө. Сэні юргисны мыла сьыланкывъяс. Челябинькөд өтвылысь сьылісны и бать-мамыс. Сэсся петкөдчис гырысьджык зонпоснилөн гитараөн ворсысь котыр. Батя-пия лов шы пыкөмөн кывзісны налысь сьылөмсө. Гортө мунігөн ая-пия дыркодъ чөв олісны. Ванялөн батыс том дырйиыс велөдлөма челядьөс ворсны да сьывны. И өні корсюрө гортас ворслывлө гитараөн.

– Батьө, а көні тэ гитаранад ворснытө велөдчылін?

– Кыдзраскад музыкаө велөдчан школады, дерт, эз вөв. Урокъяс бөрын аслам өртъяскөд ветывлам вөлі клубө. Сэні миянөс и велөдіс гитаранад ворсны музыка төдысь морт.

– А сцена вылад, батьө, тэ тшөтш ворслывлін?

– Да, уна концерт ми өртъяскөд петкөдлім сикт-грездад. Быдлаын окотапырысь кывзісны миянлысь ворсөм-сьылөмнымөс, – казьтыліс ассьыс том кадсө батыс.

– Батьө, ме көсья жө велөдчыны гитаранас ворсны, – шуис зонка.

– Тэ, Ваньö, медводз велöдчы пианино  
вылын ворсны, а бöрынджык и гитараöн  
ворсны велалан, – туйдöдiс писö батыс.  
Сэсся недыр чöв олыштöм бöрын содтiс: –  
Дерт, оз ло кокни, пиук, öттшötш кык  
школаад велöдчынытö. Ковмас уна сьö-  
кыдлун венны...

1. Мый сиис челядылы Ванялөн велöдысьыс?

2. Мый тэ тöдмалiн Ваня бать йылысь? Мыйла  
пиыс мöвпалiс ворсны гитараöн?

3. Казытышт ассьыд медводдза уроктö. Вись-  
тав сы йылысь, кызди тiян школаын мунiс  
тöдöмлун нимöдан гажыс?

## Сёр арын.

Ваня неважөн на нимкодясис арся мич-  
луннас, а со нин воöма кор киссян кад.

Кытчökö вошö-бырö арлөн яръягыд  
рöмыс. Кыдзлөн корйыс чуктышталö ню-  
гыль увьяссьыс, недыр бергалö сынöдас да  
ньюжйоник усьö. Тöвлөн быд пöлыштöмысь  
киссьö пикулөн пемыдгöрд корйыс. Öтка  
чим гöрд чутъяс быттö öзйыштлывлöны  
сынöдас, сэсся биторъясыс кусöны-бырöны  
васöd му вылас.

Со ёнджыка нин пöльышталö тöлыс. Вижовгöрд рöма бобувъяс-коръяс лэбалöны сынöдас, ворсöны вильыш тöвкöд. Шемöс-мöдан мича арся зэр! Вочасөн уна рöма бобувъяс пуксьöны муö да артмöдöны аслыс-сяма джодждöра.

Асывъясыс кöдзыдöсь нин. Быд асыв Ванялөн мамыс тöждысьöмпырысь шу-лывліс: «Шоныда пасьтась, пиук. Ывлаыс ыркыд нин».

– Ог кынмы! Эн шогсы, мамук, – меліа вочавидзліс пиыс.

Кык ёрт, Ваня да Вова, велöдчисны öти классын. Арся лунъясö найö кыкнанныс радпырысь котравлісны школаö. Мам-бать нимкодясисны: челядь быдмöны кывзысь-ысьён да дзоньвидзаён.

Öнöдз на мамыс абу казьявлöма: пиыс шоныд лунъясö курткасö да шапкасö коль-лывлöма ёртыс ордö, а школаöдз котöртлö-ма öтпöлöсөн. Урокъяс бöрас пыравлöма ёртыс дорö да бөр пасьтавлöма курткасö.

Талун Вова ёртыс сёрмöдчыштöма шко-лаас. Ванялы ковмöма локны гортас ёртыс дорö пыравтөг. Пиыс воис гортас костюм кежсьыс.

– Ванюш, тэ жö школаад курткаён мунлін? – юасяна видзöдліс пиыс вылö ма-

мыс.— Эң-ө вошты кытчөкө курткатө да шапкатө?...

— Курткасө... Курткасө ме Вова дорө коли,— өдва кылыштіс гөлөсыс.

— Мыйла нө Вова дорас колин? Мун ветлы да вай,— гөгөрвоис пиыслысь пөръясьөмсө мамыс.

Ваня тэрыба мөдөдчис бөр. Сылы бура дыр на ковмис виччысьны ёртсө. Коркө эськө и воис Воваыд. Ваня пасьтасис, но дыркодъ падъяліс, эз төд, мый вөчны. Сэс-ся мөдөдчис жө гортас.

— Мамук, талун шондіа луныс вөлі... Вова асывнас муніс курткатөг, и ме сы моз жө...

— Ванюш, сёр ар нин. А тэ пасьтөг ветлан-котралан! Тэ өд, пиук, ачыд асьтө ылөдлан,— велөдана сёрнитіс пиыскөд мамыс.

Ваня нинөм эз куж шуны мамыслы воча.

1. Кыдзи арын вежсьөма ывлаыс?

2. Кыдзи петкөдлөма арся кадө кор гылалөмсө?

Текст серти вөч серпас.

3. Кыдзи тэ донъялан Ванялысь «паськөм дзеб-лалөмсө»?

## Том бурдөдчысыяс.

Некымын лун мысыт ывлаыс ёна нин көдздөдіс. Пужъялөма. Муыс кам кынмөма. Асывнас мамыс пиыслы сетіс төвся пальто, шоныд шапка, шарп да кепысь.

– Ванюш, талун көдздөдөма! Со тэныд шоныд паськөм!

– Мамук, төвся паськөмнас өд некод на школаад оз ветлы. Лымйыс өд эз на усь?! – пыксис пиыс.

– Ваня, талун зэв көдзыд ывлаыс! Шоныда пасьтась! – скөрмөмпырысь нин тшөктіс пиыслы мамыс.

Ваня вөчис ас ногыс: пасьталіс курткасө да котөртис школаө. Мамыс видзөдліс өшинь пыр пиыс вылө да мөвпыштіс: «Асныралан? Көдзыд пөлыс регыд тшөктас шоныда пасьтасьны!»

Школаысь зонка воис гегдөмөн: пиньыс зяткакылө, кийс гөрдөдөма...

– Ма-а-а-му-у-ук! Ме сэтшөма кынми! Збыль тай көдзыд вөлөма ывлаыс, – кикоксө шонтигмоз шуалис зонка. – Мыйла бара ме асывнас эг кывзысь тэнсьыд да эг пасьтась төвся ногыс? Збыльысь өд төв воөма!

Рытланьыс нин Ваня нөрпаліс. Мөд луннас зонка өтнас пукаліс гортас. Кызөдөмысь юис курыд бурдөдчантор, пожъяліс горшсө.

Лыддис букварысь некымын лист бок: мед  
пö ёртъясысь ог коль. Урокъяс бöрас ви-  
сьысьöс видлыны воис Вова ёртыс.

– Кокни паськөмөн ветлігөн кынмыс-  
сьöма, со и висьми, – майшасис Ваня.

Вовалы дум вылас уси мамыслөн бур-  
дöдчанторйыс.

– Ваня, мамöй кызöдöмысла семдö ве-  
сиг вöлі. Бурдöдчис пызйысян лекарствоён.  
Ме зіля котöртла гортö да вая дозсö. Пы-  
рысьтöм-пыр бурдан!



Ванялөн ёртгыс здук мысыт воис лекарство дознас. Вова бура аддзыліс мамыслысь бурдөдчөмсө:

– Вай тэрыба пызъям вомад!

Ваня паськыда восьтіс вомсө, кунис синсө. Том «бурдөдчысь» матыстіс дозсө да резыштіс вом пытшкас өтчид, мөдысь... Сэссия содтіс нөшта коймөдысь. Чужөмыс Ванялөн друг гөрдөдіс, вом дорыс пыктіс...

– Ваня! Мый нө тэкөд лои? – повзёмпырысь шыасис ёрт дорас Вова. – Видзөдлы-видзөдлы асьтө зеркалоас.

Ваня видзөдліс рөмпөштанө. Эз эскы аслас синлы: чужөмбаныс дундөма, льөбйыс кызсьыс-кыз, синмыс гырды. Зонкалөн вошис нюмыс. «Лекарыслөн» синмыс паськаліс жө, ки-кокыс лигышмуні. Мыйла нө мамыслөн татшөмторйыс эз вөв?

– О-о-йя да о-о-йя! Мый нө мекөд?! Ку-у-ула ме, ку-у-ула! – ойзіс повзём Ваня да чуньнас видлаліс пыктөм чужөмсө.

Вова шөйөвоши: «Мый и вөчны?» Син улас уси телефоныс: «Колө звөнитны больничаө!»

– Батьöлы медводз вай звөнитлам! Мый сійö шуас? – бать вылө лачаөн звөнитіс пиыс.

Удж вывсьыс воис повзём батыс. Казяліс пиыслысь пыктөм ныр-вомсө да

– Ме өд көсйи өдйөджык бурдөдчыны...  
Вовалөн тай мамыс тайөн жө кызөмсыйс  
бурдөдчөма,– корсис мыж вештан кывсө  
пиыс.

– Мамыдлы өд врач индiс бурдөдчан-  
торсө,– видзөдлiс пи ёртыслань батыыс.–  
Врачтөгьд өд, челядь, оз позь вөдитчыны  
лекарствонад!

Ставсө төдмалөм бөрын батыыс звөнитiс  
«скорөйө». Врач вөчис висыйсылы укол,  
видыштiс «том врачөс». Рытланыйс Ваня  
чужөм вылысь пыкөсыс ямис. А кызөдөм-  
сыйс ковмис на бурдөдчыны вежон чөж.  
Сөмын Вова ёртыс эз нин сэссия лекарав.

1. Мыйла висыйс Ваня?
2. Кызди көсйис бурдөдны асыйс ёртсө Вова?  
Артмис-ө бурдөдчөмыс «том врачлөн»?
3. Кызди тэ донъялан лоөмторсө?

### **Карса вартчанiнын.**

Өти шойччан лунө батыыс шыөдчис пиыс  
дорө:

– Ваньө, он-ө көсйи саридзад моз купаит-  
чыштны?

– Тöлын купайтчыны? – чуймис пиыс.  
– И тöлын позьö. Та вылö эм бассейн,  
вартчанін. Сэтчö ми тэкöд и ветлам!

Сыктывкар шöрын зымвидзö аслыспölös  
джуджыд керка. Сэні и эм вартчаніныс.  
Купайтчыны көсйысьяс ичötсяньыс волыв-  
лöны татчö. Тані жö овывлöны ордйы-  
сьömъяс. «Кыз нö ог мун батькөд купайт-  
чыны? Нöшта на тöвся кадö!», – нимкодя-  
сис зонка.



Со батя-пия вартчанінас. Тані югыд,  
сöстöm. Выліас – вышка. Вывсяньыс бура  
тыдалöны вартчан туйяс. Ваыс сöдз, неуна  
руалö. Медводз мыссисны душын, сэсса ре-  
зина шапкаасисны, öчкиасисны.

Кинас перилöө кутчысьöмөн, полигтыр, Ваня лэччис вартчанінас. Ваас зонка збой-мис. Дум вылас уси лунвыв саридзын купайтчöмыс.

– Ордйысям! – ыззьöдіс писö батъыс.

Со пиыс вартчö нин батъыскöд орччөн. Ордйысьöмыс воис сьölөм вылас. Зонка тэрыба уджаліс кинас, вынөн отсасис сой выныслы кокнас. Ньöти эз кольччы батъсьыс.

Гортö мунісны долыдпырысь. Ывлаын лымъяліс. Лолавсис кокниа. «Төв шөр. Юыс йи улын, а ми купайтчам», – кыпаммис лолыс зонкалөн.

– Батъö, мöдысь нöшта ветлам на?

– Тэныд кө сьölөм сертиыд вартчöмыс, ме тэнö секцияö гижöда. Вежоннас кыкысь пондан тренеркöд велöдчыны, – көсйысис батъыс.

– Позьö кө, ми Вовакöд мöдам öтлаын ветлыны, – ёрт пондаыс корис Ваня.

– Кыкнанныдлы колö бура велöдчыны. А вартчöмыс содтас дзоньвидзалун да вын-эбöс.

1. Мый могысь дасьтöны бассейн-вартчанінсö?

2. Кутшöм лача кутö батъыс быдмысь пиыс вылö?

## Коді мыжа?

Кык ёрт быд вежон ветлөдлісны бассейнө. Найө велөдчисны бура вартчыны, ордйысисны-сөвмөдісны асьнысө. Өтчид урокъяс бөрын Ваня да Вова бара котөртісны бассейнө. Тренер тшөктөм серти зонпосни сьөрсьөн-бөрсьөн вартчисны, чожа уджалісны ки-кокнас.

Том спортсменъяс ордйысисны өтамөдныскөд. Өдйө вөчисны кытш, сэсся мөдөс. Вова төвзис водзын, а ёртыс – сы бөрся. Ваня өддзыштіс да суөдіс ёртсө. Сійө төдлытөг зурасис ёртыскөд. Вова мыйлакө пыр и чушмуніс-дузгөдчис. Сэсся мөдіс кыкнан кинас лөк ног резны ёртсө ваөн. Ваня виччысьтөмысла тшөкмуніс да петіс васьыс.

Бассейнысь ёртъяс мунісны торйөн. Ваня эз гөгөрво, мыйла дөзмис сылөн ёртыс?.. Ставыс талун артмис виччысьтөг. Выль во водз, а ёртъяс лөгасисны.

Рытнас батыс казяліс пиыслысь жугыльтчөмсө, тіралан вом дорсө, вазьом синсө.

– Мый нө лои, Ваньө? – шыөдчис пиыс дорө батыс.

– Ог мөд ёртасыны Вовакөд! – ярскөба вочавидзис пиыс. – Өтнам мөда ветлыны

Недыр чөв олыштөм мысыт висьталіс батыслы лоөмтор йывсьыс.

– Эн майшась!.. Кыдзи лөгасинныд, сідз и бурасянный! – такөдіс писө батыс.

1. Мыйысь дөзмисны өта-мөд вылас кык өрт?

2. Кыдзи гөгөрвоан висьт нимсө? Коді өртъяс пиысь мыжа?

### Гөрд яблөк.

Аскиа лун кежлө Ваня век дасьтысьліс водзвыв. Со и төрыт рытсаяныс нин сувтөдіс өдзөс дінас лыжисө. Мамыс ранецас пунктис ыджыд гөрд яблөк.

«Яблөксө сөя лыжиөн исласьөм бөрын», – кыпид руөн зонка асывнас мөдөдчис школаө. Физкультура уроксө нуөдісны школа дорсаяныс неылын. Ваня босьтис лыжсө да мөдөдчис сэтчө. Яблөксө колис парта вылас.



Велөдысьыс медводз тшөктис вөчны школа гөгөрыс некымын кытш. Сэсся ислалісны кыр йывсянь. Но кыкөн мыйлакө эз вөвны

физкультура урок вылас: Ванялөн Вова ёртыс да Павлик.

Сөмын классё пырём бөрын Ваня казяліс ассыс мудзёмсё, окота лои чөсмасьыштны яблөкнас. Матыстчис парта дорас да син-мыслы эз эскы: ыджыд гөрд яблөк пыдди сәні куйліс жебиник виж яблөк! «Мый нө тайө? Кодкө тай нө вежөма! Тайө, ме думысь, Вова! Татшөм ногөн сійө водзөс мынтө!» – корсис мыжаөс зонка да видзөдліс ёртыс вылө. А Вова пырө-петө, инас оз өшйы. Ваня перемена чөжыс жугыля пукаліс да мөвпаліс вошөмтор йывсьыс. Ньоти эз вөв окота сөйны кодлыськө руш яблөктө.

– Мый нө тэкөд лои, Ваня? Висьмин өмөй? – шыөдчис зонка дінө Нина Павловна. – Мыйла нө он сөй?

Вочавидзём пыдди зонка сөмын сьөкыда ышловзис: нинөм эз вөв окота висьтавыны.

Кык лун мысьт школаын вөлі Выхь воы сиём рыт. Джодж шөрын уна рөма биөн пөртмасис джуджыд коз. Юргис гажа музыка. Воис Көдзыд Пөль: еджыд тошка, гөрд ныра, мича пася, беддя, мышкас козин тыра мешөка. Сійө чолөмаліс челядьөс Выхь воөн. Кузь көсаа, мича платтьөа Лымань корис ставнысө сувтны коз гөгөр да сывны. Дыркодь гажөдчисны-йөктісны

коз дорын. Медбöрын Пöльыс сеталис челядылы мешöкас тэчöмсö.

Быдöнлөн лои козин, ставөн долыдöсь. Ваня динö полөмпырысь матыстчис Павлик. Сийö перйис кулөксыйс гөрд яблök да мыччис Ванялы.

– Тайö тэныд, Ваня! Тэнад кодь жö ыджыд, гөрд да юмов! А сэкнад, физкультура дырйиыд, менам вывтi нин ёна вежöй петис...

Ваня, дерт, эз виччысь татшöмторсö. Öнөдз на сийö чайтис: сылысь яблökсö вежис Вова ёртыс. «Прöстöсьыс Вовасö мыжалi», – видис асьсö зонка.

– Павлик, меным Көдзыд Пöльыд татшöм жö яблök козыналöма! – видзöдлис кулök пытшкас да радпырысь шуис зонка. – Тани со быдсяма чöскыдторйыс! Ачыд сей!

Ваня да Павлик чöсмасьыштисны юмов кампетъяснас. Яблökсö шуисны сейны гортаныс.

1. Кутшöм шог суис Ваняöс физкультура урок бöрын?

2. Кыдзи тэ донъялан Павликлысь вöчöмторсö?

3. Кыдзи челядь гажöдчисны коз дорын? А кыдзи тэ гажöдчин Виль воыслы паныд рытö?

4. Висьтав, кыдзи вöли мичмөдöма козйыс школаад да гортад?

## Лэбачлы сёянін.

Выль во кежлө бать-мамыскөд Ваня муніс пөль-пөч ордас. Выльвоасьом бөрын бать-мамыс мунісны карө. Пиыс радпырысь кольчис каникул помөдзыс.

Войнас сы мында сапкөма-усьөма лым-йыс керка гөгөрыс. Ваня зіля весалис кильчө помсө. Пывсянөдз да пөльыслөн вөчасян керкаөдз зыртіс туйяс.

– Дедө, уна и лым войнас усьөма, – индіс лым чукөр вылө Ваня.

– Мед усьө! Воыс инө бур на лоас, – шуыштіс пөльыс да шогпырысь видзөдліс пелысь вылө пуксьөм лэбач кельөб вылө. – Менө мөдтор майшөдлө. Став пелысьсө нин сёйисны-кокалісны лэбачьясыд. А өні со тшыгъялөны...

Нина Павловнаыс висьтавліс төвся лэбачьяс йывсьыд, да Ваня эз на вунөд сылысь кывъяссө: «Көдзыд төвся кадө колө отсавны бордъя ёртъясыдлы».

– Дедө, лэбачьясыдлы эськө сёянін колө. Школаын велөдысь петкөдліс миянлы серпас: пу вылын өшалө вердчан пөв, а челядь сэтчө вайөмаось сёян. Гашкө, тшөтш вердчан пөвсө вөчам да?

– Позьө! Дыр аскиасьны ог и кутөй, – ошкис внуыслысь бур мөвпсө пөльыс.

Вөчасян керкаын ноксисны лун джын.  
Лөсьөдісны пөв, дорышалісны. Весиг вевт  
сувтөдісны: мед пө лымйыс оз тырт сёянсө.  
Артмис зэв бур сёянін!

Пөльыс өшөдіс  
вөчөмторсө өши-  
нювса кыз пу  
увйө. Ваня котөрөн  
пыраліс керкаас да  
корис пөчыслысь  
сёянтор: нянь,  
шыдөс, пуөм карту-  
пель. Кисьтіс сё-  
янсө пөв вылө да



бөр котөртіс керкаө. Мөдіс видзөдны  
өшиньөд: «Мый лоө?»

«Чик-чирик! Чик-чирик!» – кыліс лә-  
бачлөн шыыс. Жбыр ләбзис руд пышкай.  
Кокыштіс өтчыдысь, мөдысь. Дзир-  
нясьыштіс-вежнясьыштіс да бара мөдіс  
тэрыба кокасьны. «Чик-чили́м!» – шыасис  
мөд пышкай. Сійө пуксьыліс пөв вылас,  
өтчыд кокыштіс да бөр кытчөкө вошис.  
Недыр мысьт югнитіс-локтіс важ местаас.

Чөв-лөнь вошис и вильыш каньпилөн.  
Прошка матыстчис өшинь дорө, пуктіс  
гыжъя лапасө стеклөө. Ды-ы-р дзоргис-  
видзөдіс бордаяс вылө. Матын эськө ләба-  
чыд, да он судз!

1. Кутшөм лэбачьяс төвйөны миянын?
2. Мыйла төлын лэбачлы колө вөчны сёянин?
3. Кызди пөльыскөд Ваня отсалисны төвйысь лэбачьяслы?
4. Висьтав, кызди тэ төждысян лэбачьяс вөснаыс.
5. Лөсьөд лэбач йылысь висят:  
Кор да көни тэ аддзылин тайө лэбачсө?  
Кутшөмджык вөли лэбачыс?
6. Төдмав унджык бордья ёртьяс йылысь.

### **Төвся кызьяс дорын.**

Ваня локтис лавкаысь. Керка дорас сийөс виччысис лызясьөм дедыс.

– Ивө! Он көсйы мекөд раскөдз ветлыны? Гөлик рос колө вайыштны, – нуөдис внуксө пөльыс.

– Дедө, тэ виччысьлы менө! Ме зия! – шуис зонка да чепөсйис сарайө лызысла.

И со нин найө төдса раскынөсь. Вөрас шы ни төв. Ланьтөмаөсь-ойбыртөмаөсь пуяс, вевттысьөмаөсь еджыд прөшвиөн.

Кызьяс дзебөмаөсь еджыд кокнысө небыд лым пытшкө, йөжгыльтчыштөмаөсь көдзыдысла. Лым вылын тыдалөны зверпөткэлөн кок туйясыс. Со пыста котралөма

да кольёма ассыс кырымпассө. Шыла ныр-  
нас быдлао сибавлома. Көнкө кылыштіс  
сылөн сьылөмыс: «Пинь-пинь-пинь!»

Тыра нөбйөн бөрсө  
мунны вөлі сьөкыд-  
джык. Пөль лазъя\*.  
Мышладорас чер, пель-  
пом вылас рос нөб. Ва-  
нялөн мышкас тшөтш  
ноптор. Сэтчө пөльыс  
тэчис дженьыд кыз пу  
ньөрсө.



– Сувтлы, Ивө! Шойчыштам неуна, –  
шыасис пөрысь морт.

Пөль лэдзис гезйөн шымыртөм рос  
чукөрсө. Лолыштіс. Сэссия гонькнитліс син-  
нас ыджыд кызьяслань.

– Аддзан кызьяссө? Менам челядьдыр  
кадө, дерт, ичөтөсь на вөліны. Көркө дзоля  
дырйи ок и повзылі жө ме тайө кызьяс  
дорас! – казтыштіс ичөтдырсө пөльыс.

– Дедө, висьтав. Коді повзьөдіс тэнө? –  
сюся видзөдліс зонка.

– Но инө кывзы. Со кыз тайө вөлі, –  
заводитіс висьтавны вөвлөмторсө пөльыс.

«Тэ ыжда ме вөлі. Лызьөн муна-тэрма-  
ся таті расланьыс. Чөв-лөнъ. Сөмын трач-  
какылө-луйсьө көдзыдыс! Гөгөр еджыд-  
сьыс-еджыд, быттьө калинкор павкнитөма.

Нимкодяся мичлуннас. Друг кыздз тай жбыр-жбор кысянькө кыліс – сынөдыс потіс. Ме гөгөр кыптіс лым бус! Нинөм ог аддзы...

Копыртчи да здук-мөд виччыси. Бө-рынджык ставсө гөгөрвои. Лызынад менам повзьөдсьөма репасын\* узян таръясөс. Найө өд ув вывсяньыс, вөлөмкө, дзумгысьөны вой кежлас лым пиө. Репөны сәні, асылөдзыс узьөны. Шоньд, майбыр! Со менам, вөлөм-кө, репасьяс вывтід и мунсьө. Таръясыд и кыпөдчисны...»

1. Мый тэ төдмалін таръяслөн төлын оланног йылысь?
2. Кутшөм вөвлөмтор дум вылас уси пөльлы?
3. Кутшөм төвся серпасьяс сувтісны тэнад син водзад? Серпасав төвся вөрсө.

### **Пера кодь ыджыд пөль.**

Вөрысь воөм бөрын Ваня шонтысис паччөрын. Мудзөм ки-кокыс личалис. Ойбыр-мунліс весиг здук кежлө.

– Ивук, мудзтөдзыд тай вөрад ветлін талун, – жальпырысь шуис пөчыс. – Лок

сёйышт да босьт дорад каньпитө. Став шөртөс менсьым со дзугис...

Пөчыс кыё Ванялы выль кепысь. А каньпи ворсөдчөмөн чайтө. Сійө котралө тупыль бөрся да тшайөдлө-куталө ёсь гыжнас. Ваня босьтис каньписө пидзөс вылас да малыштис. Но эз дыр чөв овсыы вильыш Прошкалы. Сійө звиркнитис-уськөдчис керка өдзөслань.

Пөльыс пыртө вөлі керкаас важиник лызьсө.

– Лоө выльмөдыштны тайөс... Мудзтөдіс талун менө лямпаыд. Бур кипода батьөй аслыс вывті кокни лызь вөчлөма, – лызьыслысь кышөдсө малалігмоз казьтыліс батьсө пөльыс.

– Дедө, кодлөн нө тайө лызьыс?

– Тэнад пөрысь пөльлөн на. Сійө Пера моз вөлі ветлөдлө-вөралө, – ошкыштис батьсө.

– Коді нө сэтшөм Пераыс? – көсйис төдны Ваня.

– Пераыд – коми войтырлөн багатыр. Сы йылысь йөзыс важысянь висьталөны уна буртор. Вөлөма йөзөс дорйысьөн, зэв сьөлөма мортөн. Абу повлөма некутшөм вөрөгысь. Сійөс төдлөма весиг роч сар. Вөрөгысь дорйысигөн Ператө корлывлөма отсөг вылө. Роч сарыд көсйөма сійөс дзикөдз

кольодны ас дінас, а Пераыд ёна радейтлөма чужан мусö, бөр воöма Комиö.

– А Пераыдлөн татшөм жö лызыыс вöвлөма?

– Пераыд бур кыйсьысьөн нимавлөма. Сылөн вөлөма паськыд, крепыд лызь. Лызь-нас сійö чожа ветлывлөма аслас туйясöд Коми му кузяла и пасьтала, öти ю вожысь мөдö...

– Сідзкö, пöрысь пöльöй Пера-багатыр кодь жö ён вöлі? Да, дедö? – окота лои тöдны Ванялы.

Зонка син водзын быттьö сувтіс пöрысь пöльыс – лазъя, койбеддя\*. Сійö, кызди и мукöд коми кыйсьысьыс, вөлөма повтöмөн, вынийöраөн...

1. Мый тэ тöдмалін пöль висьталöмысь?

2. Кутшөм выльтор тэ тöдмалін Ванялөн пöрысь пöль йылысь?

3. Лыдды Пера-багатыр йылысь мойд.

### **Вурун кепысь.**

Ванялөн пöль-пöчыс ёнджыка аспом уджөн и олöны. Век тöждысьöны челядь вöснаыс. На керкаын век сöстөм и лöсьыд.

Джоджсö вольсалöма ас кыöм уна сера джодждöраöн. Öшинь да паччöрдорса öшандöраяссö серöдöма вурсян машинаöн. Телевизорсö да көлуй видзан шкапсö вевттöма еджыд сунисысь кыöм мича серьяса дöраöн. Пызан дöрасö доралöма пырыс тыдалана прöшвиöн.

Пöчыс Ванялөн быд төв кыö челядьыслы да пöчөн шуысьясылы некымын гоз вурун носки да кепысь. Тöвся каникул дырйи зонка помсянь помöдз аддзыліс, кыдзи бабыслөн артмö вурун кепысьыс.



Выль во бöрас Ванялөн вежаньыс вайис вурун. Кык чой, вежаньыс да пöчыс, медвойдөр нистісны-небзьöдісны вурунсö. Сэсся пöчыс некымын лун пукаліс печкан дорын да пелька уджаліс чöрсөн. Вурунысь артмис шöрт. Шöртсö путшкис да гартліс некымын тупыльö. Тайöс вöчöм бöрын пöчыс босьтчис кепысь кыан уджö. Сійö тэрыба вöрöдіс витнан югыд емнас, пелька пысавліс петляяс. Гöрд серьяса кыаныс вочасөн содіс. Ваня сюся видзöдіс пöчыслысь уджсö. Пев туйöдзыс воöm мысьт зонка суйліс кепысяс кисö.

Талун пöчыс помалö нин мöд пöвсö. Ко-  
лис сöмын певъявны. Зонка любöпырысь  
нималис бабсö: «Со öд кутшöм сийö менам  
киподтуя! Быдтор кужö вöчны!» Ваня бура  
гөгөрвоис, кутшöм сьökыд вөлöма кепысь  
кыан уджыд.

– Бабук, а кодi тэнö велöдис кысьынысö?  
Кызди тэ велалiн кысян-печкан уджас? –  
мелiа шыасис внукус.

– Кузь нэмтö мам-батьöйлы быд ногыс  
ковмывлiс овнытö. Важөн öд дась кыём-  
вöчöмсö некытысь вöли ньöбнытö... Менам  
мам ставсö жö вöли печкö-кыö, вурсьö.  
И меным тшötш ас киөн унатор ковмывлiс  
вöчны. Ме вывтi быдсяма уджыс мунлис.  
Быдлаö и велавлi. Ивук, мый ас вывтiыд оз  
мун, он и вермы сийöс тöдны да вöчны.

– Сьökыд, буди, кысьынытö велöдчыны?

– Синмыд полö, а кийд тай ставсö вöчö.  
Быдторйö, кöсьян кö, позьö велöдчыны.  
Воддза гожöмнас кык воча чойыд велöдчи-  
ны кысьыны. Кепысьтö аслыныс кыисны и  
öти емөн, и ме моз витөн. Мамыс неважөн  
на Зеленоградсянь звөнитлис: кыкнан нылöй  
пö öнi и кысьöны, и вурсьöны!

– Ивук, со и дась лои кепысьыд, – мелiа  
шуис пöчыс да мыччис внукуслы кепысь  
гозсö.– Новлы, эн кынты китö!

– Аттьö, муса бабук! – нимкодясис  
зонка.

1. Висьтав, кутшом удж вочис пчыс кепысь кытөдзыс.

2. Мыйла зонкалы кепысь кыан уджыс кажит-чис сьокыдөн? А тэ кыз чайтан?

3. Мый тэ выльсө төдмалін Ваня пөч йылысь?

4. Кодлы лөсялөны тайө кывъясыс: «Гортас быдлаын тыдаліс аньтуйыс»\*?

## **Гажа праздник – Вежадыр.**

Рытланьыс пөль вайис вөчасян керкасьыс мичаа серөдөм важ куд. Сэні пөчыс, вөлөмкө, видзө тшапитчан паськөмсө.

– Бабө, мыйла нө важ паськөмыд ковмис?

– Гажөдчан праздник воис – Вежадыр\*. Тайө кадө колө и пасьтасьны мөд ногөн. Колө мичаа вөччыштны. Челядюловыд важөн вөлі пасьтасьө коді пемөсө, коді мойдвывса Ёмаө, коді Ошкө, коді Яг Мортө. Мед оз төдны өта-мөдсө, дасьтөны вөлі сямөдысь да кабалаысь маскаяс. Сэсса челядь и гырысь ветлөны керкаысь керкаө, сьылөны бурсиөмъяс. Быд керкаын лөсьөдөны чөскыд сөян-юан, вердөны пыралысьяссө.

— Бабук, и тэ тшөтш жө вөлі гажөдчан да кодөкө пасьтасян?

— Да, важөн ми Вежадыр чөж вөлі гажөдчам! Ми, нывьёртъяс, вежам вөлі паськөмнымөс, тшапитчам-мавтчам да чукөрөн и мунам кодъясөкө. Съылам-йөктам, ошкам олысьяссө, сиам быд бурсө көзяин-көзьяйкаыслы. Вот и гажөдчывлім! А войнас вөлі гадайтчам...

— Тэ, пөди, тшөтш гадайтчывлін? — шпыньмунөмөн юалис пөльыс.

— Йөзсьыс эг кольччывлы,— видзөдліс пөльланьыс.— Уна ногөн тай важөн кужлісны гадайтчынысө. Быдөн зільліс төдмавны водзө олөмсө...

— Бабук, вай ми тшөтш вөччам-пасьтасям да ветлам вежань дорө! — бабыс висьталөм бөрын нуөдчис Ваня.

Зонкалы төд вылас усисны мамыслөн карысь вайөм маскаясыс.

— Бабө, гашкө, нылө ме пасьтася? — нюмьөвтис сійө да петкөдліс колана паськөмсө.

— Позьө и нывкаө! Тайө мича паськөмнас нюмсера нывкаөн и лоан,— өти кывйө воисны пөч и пөль.

Вайөм кудйысь корсисны колана паськөм. Зонкаөс вөччөдісны ныв паськөмөн,

баситисны-краситисны чужомсö. Ваня мас-  
каасис, сыръя чышъянасис. Мича нывка да  
и сöмын! Пöль-пöчыс тшöтш жö вöччисны.  
Куимөн мөдөдчисны вежань ордас.

Ывлаын лымъялöма. Кок улас дзуртис  
вильён усьём лым. Паныд локтысьяс чолö-  
масисны пöль-пöчкөд. Видзөдлывлісны и  
«нывка» вылө.

– Эз тöдны, эз тöдны менö! – радліс зон-  
ка.– Бабö, дедö! Ме збыль нывка кодь? Тöдас  
оз бара вежаньöй?..



Воисны Катё тьотка дорё. Игёдчисны. Пёчислөн чойыс радпырысь корис воысь-ясёс пырны керкаё.

– Гёсьтьяс тай воисны! Эз өд прөстё талун менам Лизук каньёй водз асывнас мыссы. Таттян чой да Иван, локтёй пырёй! А тайё нывкасё тай нё ме эг тёд?

– Ме... Ме – Аня, – небыд гөлөсөн шуыштіс Ваня.

Зонкалөн зэв ёна серамыс петіс. Но колё вöлі кутчысьны: вежаньыс өд дзик пыр тодас. Пөрччысисны. Ваня тшөтш пөрччис вылыс паськөмсё. Рөмпөштан водзын дзирнясьыштіс мича платтьөнас, лөсьөдыштіс гөрд дзоридзьяса чышьянсё. «Мича нывка Аня!» – ас йывсьыс думыштіс зонка. Кутіс асьыс нюмсё. Катё тьоткаыс дыр дзоргис-видзөдіс төдтөм нывка вылө да бара шыасис:

– Кодлөн нё тайё Аняыс? Абу-ө Дөрөш Öльөксанлөн?

Детинка өдва нин кутіс серамсё. Пуксялісны пызан сайё.

– Талун праздник лун кузя пөжалі черинянь, пирөг-шаньга. Льөмъя лязсё видлөй. Гашкө, мися, Ивукуд тшөтш вола да...

Вежаньыс вайис көрөбканын чөскыд кампет. Ванялы телепит видлыны чөскыдтортө. Сійө пөрччис маскасө да нюжөдчис кампетыдла.

– Тайө тай нө Ивукыд вөлөма! Дзик өд нывка кодь! – шлапкерис вежаньыс.

Дыр кутчысьөм бөрын Ваня сьөлөмсянныс гора серөктіс:

– Збыль өмөй эн төд менө, вежаньө?

Ваня первой видліс льөмъя лязсө. Сьөлөм вылас воис и черинянныс. Пөттөдзыс сөйис чөскыд пувъя юм.

Ывлаын кыліс гудөк шы, ныв-зонлөн серам. Сэссия керкаө пырисны вөччөм-пасьтасьөм йөз. Гудөк шы улө быдөнлы окота лой йөктыштны. Ставныскөд өтлаын сьөлөмсянныс гажөдчис и Ваня.

1. Кыдзи важөн пасйылөмаөсь Вежадыр праздниксө? Төдмав аслад пөль-пөчылдысь, олөма йөзлысь Рөштво\* да Вежадыр праздникъяс йылысь.

2. Мый вылө ышөдіс Ваняөс пөчыллөн висьталөмыс?

## Пач дінад шоныд.

Сёронкодъ нин гажодчысыяс мөдөдчисны гортаныс. Керка өшиньяс югыд биаөсь. Пемыд енэжын эзысьөн йөгзисны кодзувьяс. Кутшөм мичаөн кажитчис тайё здукас грездыс!

– Со талун кодзулыс кутшөм гежөд. Да и вывті нин югыда пөртмасьö. Аски, тыдалö, көдздөдас, – юрсö вывлань чатөртыштлөм бöрын кывкөрталіс пöчыс.

Асывнас Ваня водзысь-водз садьмис. Ывлаас шковөдчис пашляк. Войбыднад керкаыс ёна көдзалöма.

– Бр-р-р! Кутшөм көдзыд талун! – звирк чеччыштіс крөватъысь да кайис бабыс діно паччөрö.

– Тані шоныдджык! Куйлышт, а ме пач ломта, – меліа шуыштіс пöчыс да шебрөдіс внуксö шоныд эшкынөн.

Ваня нюжөдчис пöчыс узыланінö, сывйыштіс Прошкаөс. Шоныд, майбыр, паччөрад! «И мыйла сöмын миян карса патераын татшөм паччöрыс абу?» – визнитіс юрас. Кывзысьыштіс. Зонка пельөдз воисны пачводзянь пöчыслөн шуалөмъясыс:

*Пачö, пачö, лом, лом,*

*Тшыно, тшыно, пет, пет.*

*Катша керка вывті,*

*Клима керка сайті.*

*Шоныдсö тэ вай, вай!*

– Бабук! Тэ нö кодкөд сёрнитан? – чуй-мёмпырысь гусьон шыödчис Ваня.

– Ме пачыслысь кора, мед сійö бура ломтысяс, шоныдсö миянлы сетас.



Недыр мысьт пачын гажаа трачкөдчис кос пес. Бабыс бөр кайис паччөрö да водіс внуюкскөд орччөн.

– Паччöрыс пöрысьладорыд ёна муса!  
Тані лысьöмыд небзьывлö-шонавлö, – ва-  
ровитіс пöч.

– Бабук, кыдзи тэ тöрыт тöдмалін  
кöдздöдöм йывсьыс?

– Кодзувъяс сертиыд тай важ йöзыд по-  
воддя вежсьöмтö тöдмавлöмаöсь. Кöдздöдöм  
водзад кодзулыс ёна ворсö. Тэ öд ачыд,  
Ивук, аддзылін налысь пöртмасьöмсö, –  
нöшта тöдчöдіс тöрытъясö пöчыс.

Ывлаын шкув-шковмуніс.

– Кылан, Ивук, кыдзи пашлякыс  
луйсьö? Пашлякыд кö луйсьö – оз ёна дыр  
кöдзыдав. Регыдөн бөр шондöдас! –  
ньюмъевтіс бабыс. – Узьышт на, дитюк! А ме  
Люсюкös лысьтышта да пусьышта.

1. Кутшöм кывъясөн пöчыс шыödчис пач дінас?  
Кутшöм шыödчанкывъяс тэ тöдан?

2. Кыдзи пöчыс тöдмаліс поводдя вежсьöмсö?  
Йöзкостса кутшöм примета серти нöшта позьö  
тöдмавны тöвся кадö поводдялысь вежсьöмсö?

## Джодждөра кыан удж.

Пөчыс төвнас джодждөра мөвпыштөма кыны. Оз-ө пөрысь мортыд кыккирудзтө пукав, век мыйкө колө вөчны сылы.

– Тэ өд регыд бөр мунан карад, Ивук. А ме ог жө мөд төв чөж кыккирудз пукавны, – нюм пырыс шуыштіс бабыс. – Со өд джодждөранад керкаыд кутшөм кыпыд! Ме өні пана сунисысь көса. Сэссия вежаньыдкөд көсасысь суниссө гартлам свөлөк\* вылө.

Мөд лунас асывсянныс локтіс вежаньыс. Кык чой пыді вежөсас дасьтісны кысян стан. Лун чөж быдмалісны да йитлісны сунисьяс. Станас лои зэлыда нюжөдөма унаысь-уна сунис. Быд сунис муніс вөрт\* да кись\* пыр.

Ваня воис исласянінысь. Пырис пыді вежөсас, а сэні сулаліс нин кысян стан. Пельөсас – тупыль тыра көрөб. Төд вылас усис пөчыслөн шулывлөмыс: «Важмөм көлуйтө эн шыблалөй. Джодждөра вылө ставсө вундала. Выль олөм важыслы сета».

– Но-о, отсасысь тай воис! – радпырысь шуис пөчыс Ваняөс аддзөм бөрын.

– А мый нө колө эськө вөчны? – матыстчис Ванюк пөчыс дорө.

– Вай жө дзавйысьышт\*, – корис сійөс пөчыс да петкөдліс дзавйөм сюрияс\*.

– Тайё став тупыльыс важмём көлуй-  
сьыд, – вундалёмасё тупыльё гартлігмоз  
варовитіс вежань. – Джодждёратё кыём  
вылө өд зэв уна рот колө. Ми бабыдкөд водз-  
ывыв вундалім важмём паськөмтө. А быдмав-  
нысё вай отсышт миянлы.

Ваня тэрыба бергөдліс дзавъянсё\* да  
вөчис некымын сюри.

– Аттё тэныд, Катё! Ставыс нин лои  
дась. Аскисянь нин мөда кысьыны, – чойсё  
кольёдігмоз сёрнитіс пөчыс.

Мөд луннас Ваняёс садьмөдіс аслыспөлөс  
шы. Восьса өдзөс сайсянь кыліс: «Клоп-  
клоп!» «Тайё пөчө кысьё», – гөгөрвоис зон-  
ка да пырис вежөсө.

«Кызд бара тайё дөраыс артмө?» – төдны  
көсйө детинка да пуксьё баб дорас матө-  
джык. Пөчыс личкыштіс кокнас тальянө\*:  
өти вөркыс кайис, а мөдыс лэччис. Тадзи  
өти сунис рад кайис вывлань, мөд сунис рад  
лэччис увлань. Коластөдыс нуөдіс дзавнас\* –  
бөрсянныс кыссис мича гөрд шөрт. Та бөрын  
набелканас\* шөртсө вынөн топөдіс аслань-  
ыс. Сэсся личкис кокнас мөд тальянө – и  
сунис радыс вежсис. Артмис гөрд рөма визь.  
Тадз жө пөчыс содтіс нөшта өти гөрд визь  
да видзөдліс кыёмтор вылас.

– Медым артмис мича джодждөра, ве-  
жам рөмсө, – шуис пөч да босьтис мөд  
чөлнөк\*.

Ваня ловсө пыкөмөн дыр видзөдіс пөчыс  
бөрся. Тайө каднас бабыс вөчис лөз рөма  
некымын визь.

– Бабук, вай ме видла! Гашкө, и менам  
артмас? – шыасис пөчыс дорө Ваня.

– Но инө, пуксыы ме местаө да кысышт,  
Ивук... А ме коскөс шойчөдышта!

Зонка кокнас личкис талянас, набелкасө  
выныштчөмөн топөдіс асланьыс: бабыс моз  
жө клопкерис. Джодждөраө содіс Ванялөн  
лөз рөма визь.

1. Мый Ваня төдмаліс джодждөра кыан удж  
йылысь?

2. Аддзылін-ө тэ стан вылын джодждөра  
кыөмсө?

3. Мый өнія кадө вольсалөны йөзыс джоджас?

## **Медводдзаясь артисталөм.**

Өдйө колис первойя во джынйыс. Велөд-  
чысьяс унатор нин кужисны да төдісны.  
Вежоннас Ваня кыкысь ветывлө велөдчы-

ны музыка школао. Төвся каникул бөрын зонкаяс дасьтысисны медводдза концерт кезлө. Везькөдлысьыс велөдiс: «Корөй концерттө кывзыны мам-батынытө да ёртъяснытө».

Бассейнын Вовалөн вывтiасьөмыс өнөдз на дзугыльтiс Ванялысь сьөлөмсө. Но колө өд вөли и бурасыны кызкө. «Воваөс концерт вылө кора», – татшөм мөвпөн зонка мунис ёртыс дорө гортас.

– Вова, миян аски концерт лө. Ме хорын тшөтш сывны кута, – сьөлөмсянныс сёрнитiс Ваня да содтiс. – Куим часьянь филармония залын.

Вова эз виччысь ёртыслысь сы дорө бур нога шыөдчөмсө. Сылы зэв нимкодъ лои.

– Ваня, ме сэкъясьыд прөща кора, – нор гөлөсөн шуис сийө. – Вай важ мозыс отлаын мөдам бассейнад ветлөдлыны.

Дыр дузъялөм бөрад кыкнанныс гөгөрвоисны: ёрта-ёрттө колө пыдди пуктыны. Но мыйлакө тай йөзыс век жө скөрмывлөны өта-мөд вылас...

Сыктывкарса филармонияө воалисны музыка радейтысьяс. Мамъясыскөд локтiсны и кык ёрт, Вова да Ваня. Асьыныс сямлунсө лөсьөдчисны петкөдлыны капелласа сьылысьяс.

Йöзыс зал тырыс чукöрмис. Воссис занавес. Мичаа петкöдчис зонпоснилöн хорыс. Ставныс сьöд костюмаöсь, еджыд дөрöмаöсь. Быттö збыль артистьяс! Чöv-лөнъ. Вескöдлысьыс сувтис сылысьяс водзö, лэптис кисö. Здук мысыт юрöбтис мыла сыланкыв:

*Мыйла миянлы зэв дона*

*Вөр и эзысь ю?*

*Быдөн радейтö зэв ёна*

*Ассьыс чужан му!*

Зонпоснилöн сылан горыс йиджис быд кывзысьлы. Сылісны коми муын бур олём йылысь, вөр-ва мичлун йылысь. Мыла сылöмын кыліс и визув ёльлөн сёльгöмыс, и сöстём сынöдлөн ветлöмыс, и пармалөн шöпкöдчöмыс, и лэбачлөн дзользьöмыс...

Кутшöмкö аслыспөлöс нимкодълун шымыртис сылігас и Ванялысь мамсö. Тайö вöлі шензьöдана концерт.

1. Мыйысь позьö ошкыны Ваняös?

2. Кызди петкöдлісны ассьыныс кужанлунсö том артистьяс?



## Москваын некор вунөдлытөм лунъяс



### «М» шыпасыд – метро.

Поезд лун шөр бөрын вайис йөзөс Москваө. Ваня зэв жальпырысь видзөдліс аслас да мукөд вагонъяс вылө. Быдса сутки чөж поездыс кыскис-уджаліс. Кыдз нө эз мудз? Көлесаяс өні ланьтөмаөсь, шойччөны. Ад-дзысльлытөдз, поезд! Ми кык вежон мысыт бара воам тэ дорө.

Москваса вокзалын тырыс йөз. Мед эз вош, Ваня топыда кутчысис батыслы киас. Но найөс йөткалісны өтарө-мөдарө. Йөз кытчөкө тэрмасисны. Вокзалысь петөм бөрын батыс индіс ыджыд өдзөс вылө:

– Аддзан, Ваньö, öдзöс вивсьыс ыджыд «М» шыпассö? Со сэтшöм жö югъялана шыпас керка вылас. Тайö метролөн пас.

– Сідзкö, кöні «М» шыпас, сэні и метро, – лабутнöя шуыштис зонка.

Метроö лэччытöдз батыс Ванялы мыччис сэтчö пыран пас да велöдіс кужöмөн вöдитчыны сыөн.

Веськалісны метро пытшкö. Тані, вөлöмкö, сэтшöм югыд! Ваня шензьöмпырысь видзöдліс увлань лэччысь да вывлань кайысь посъяс вылö. Мый нö тайö? Йöзыс сулалöны, а поскыс мойдын моз ачыс нуö найöс!

– Ванюш! Тайö поскыс – эскалатор, – велöдіс писö мамыс. – Кор матыстчам, видзчысьöмөн сувт пос вылас. Сійö ачыс нуас тэнö увлань. Сулав зумыда, эн катлась, кутчысь перилöас.

Ваня полігтыр вöчис воськов, видзöдліс кок улас. Сэсса збоймыштіс-велаліс да сконъясьтöг воськовтіс метролөн улыс залö. Тані сідзжö вöлі югыд. Стенсö да йирксö мичмöдісны серпасъяс. Öтар-мöдарас нюжöдчис көрт туй. Регыдөн грымöдіс-локтіс электровоз. Тайö станцияас воысь йöзыс петісны вагонъясысь, тасянь мунысьясыс пырисны. Зэв тэрыба бать-мамыскöд пырис

и Ваня. Радио пыр кыліс гөлөс: «Осторожно! Двери закрываются!» И збыль: өдзөсьяс асьныс клоп пөдласисны. Электровоз надзөн вөрзис. Сэссия пыр өддзис и өддзис. Со нин ыджыд өдөн төвзё му увті.

Ванялы ёна воис сьөлөм вылас өдйө му-нөмыс. Быд сувтлігөн мыла гөлөс юөртліс станция нимсө. «Мыйла бара татшөм метроыс Сыктывкараным абу? Позис эськө быд лун журъявны. Майбыр!» – мөвпаліс зонка.

1. Кыдзи Ванялөн семьяыс воөдчис Москваө?
2. Мый шензёдіс зонкаөс метроын?

## **Лифта джуджыд керка.**

Радио пыр кыліс гөлөс: «Речной вокзал». Тайө бөръя станция, и йөзыс ставөн петісны. Тыртөм поезд төвзис водзө.

– Каям пос кузяыс да водзө мунам автобусөн, – сёрнитіс пиыскөд батыыс. – Аддзысьлан аслад воча чойясыдкөд.

180 Зеленоградөдз, көні оліс батыслөн Нина чойыс, воөдчисны автобусөн. Зонка дыркодь

шензьомён видзёдаліс мича джуджыд керкаяссё, паськыд уличасё. Абу прёста карыслы сетёмаось татшом нимсё: улич отармодар бокас да керкаяс дінас вежодісны пуяс.

Недыр подён муныштём бёрын тыдовтчис зэв джуджыд керка.

– Со тайё керкаас, өкмысөд судтаын, Нина тьоткаыд олө, – сувтовкерис батьыс да видзөдліс вывлань. – Лифтён лоө кайны.

Пырисны лифтё – өшиньтём неыджыд кабинаө. Батьыс личкыштіс кнопка, и төвзисны-кайисны вывлань. Лифт джём сувтіс. Воссис өдзөс.

– Дона гөсьтъясыд воисны! – воысьяслы нюмдіс Нина обыс\*, гөгрөсіник чужёма, тэрыб сёрниа нывбаба. – Видза оланныд! Пырөй, личөдчөй. Ылі туяд, көнкө, ёна и мудзинныд...

Ваня пыр жө казяліс пөчыслысь да Нина обыслысь ота-мөд вылас мунөмсё. Чоя-вока кутчысьлісны. Ваня төдіс асьыс воча чойяссө: ыджыдджыкыс – Даша, ичөтджыкыс – Юля. Нывкаяс мича платтьоаось, шыльөдөм кузь юрсиаось.

Чөскыда сөйөм-юөм бёрын Ваня шыөдчис мамыс дінө:

– Мамук, позьö меным ёг тыра ведрасö  
ывлаö петкöдны? Гортын öд тайö уджсö ме  
жö пыр вöчла...

Мамыс кыв шутöг сöгласитчис. Ёна вич-  
чысис тайö здуксö зонка. Воёмсяньыс нин  
сылөн бергаліс öти мөвп: «Колö журьялышт-  
ны лифтнас!» Катöдан-лэччöдан татшöм  
лифттö сійö аддзис медводдзаысь на.

Ваня кватитіс ведра да котöртіс лифт-  
лань. Личкис кнопкасö – воссис öдзöсыс.  
Пырис кабинаö, видзöдліс пытшкөссö.  
«Кыдз нö эськö улыс судтаас ме лэчча?» –  
вирдыштіс юрас. Зонка личкис некутшöм  
пастöм бокинджыкса кнопкасö, да лифт  
тöвзис-кайис вывлань. Друг мыйкö тратш-  
муніс. Öшиньтöм дзоля жырйыс сувтіс. Но  
öдзöсыс бать-мам дырйиыс моз ачыс эз вос-  
сьы. Лои сап пемыд. Лифт эз вөрззы дудöм  
вöv моз: ни вылö ни улö. «Вот и журьявсис  
менам!» – повзис зонка. Видліс öдзөссö ки-  
нас восьтны – эз вермы. Шыч ни рач.

«Колö горöдны да корны кодöскö отсöг  
вылö!» – воис юрас детинкалы, а син улас  
веськаліс дзик öти югззысь кнопка. Зонка  
личкыштіс югыд биа кнопкаас, здук-мöд  
виччысьыштіс. Бура кыліс сьölöмыслысь  
часі моз точкөмсö. Виччысигад кадыд тай

зэв дыр кыссьö... Кылісны кодлөнкө воськовъяс, и öдзöс воссис.

– Ну что, парень, застрял? Лифтом ведь нужно уметь пользоваться! – ропкигтыр рочөн сёрнитіс уска-тошка дядьö.

– Я... Я хотел... Вон мусор... – повзьöмысла да виччысьтöмысла мыкталöмөн рочасыштіс Ваня.

Зонка уйкнитіс-петіс лифтсьыс да котörtіс поскöдыс увлань. Ывлаас ёг шыблас чукöртанінö тыртöммöдіс ведрасö да подөн пошиктіс-кайис öкмысöд судтаöдзыс. Пиыслы воча нин петöма батыс.

– Тэ нö öкмысöд судтаöдзыс подөн кайин? – шензяна синъясөн батыс видзöдліс пиыс вылö. Сэсса бергöдіс юрсö лифтлань. – Тайö öд сы вылö и дасьтöма, медым вылыс судтаын олысь йöзыс вермисны мудзтöг лэччыны-кайны! А ёг шыблаланыс быд судтаын эм. Позис и сэтчö койыштны.

Ваня юрсö копыртöмөн чöv оліс.

1. Кутшöм виччысьтöмтор суис Ваняös об ордас да мыйла?

2. Мövпышт, кутшöм сёрни вермис лоны батяпиа костын? Дасьты пиыслысь висьталöмсö да батыслысь воча кывсö.

## Кремльса шензёданторьяс.

Москва карса нималана Красной площади Ваня унаысь аддзывліс телевизор пыр. А талун бать-мамыс шуисны петкөдлыны сылы Москвалысь сёлөмсө – Красной площадь да Кремль. Зеленоградсянь час сөмын и колө, медым веськавны Москваө, канкарө\*.

Красной площадь! Куимнанныс окотапырысь видзөдалісны канкарлысь меднималанаинсө. Тані уна йөз. Став мичнас петкөдчис Василий Блаженной нима вичко.

Чукөрөн-чукөрөн йөзыс мунісны мавзолей дорө. Зонка синмын быттьө ыпъяліс быдтор төдны көсьяна битор. Сійө сюся видзөдаліс и Кремль стенсө, и джуджыд башняссө.

Друг став изэрд\* пасьталаыс некымынысь кыліс гораа триньөбтөм. Сы бөрын сэсся ыджыд жыннянлөн\* гораа був-бовмунөмыс.

– Батьө! Мамө! Тайө нө мый татшөмыс?! – горөдіс шемөсмөм Ваня.

– Тайө Спасской башня вылын стөч кад йылысь юөртісны Кремлёвской курантьяс, – вочавидзис батьыс да индіс медджуджыд башня вылас.

Ваня нөшта син пырыс нуөдіс став стрөйбасө. Найө шемөсмөдісны мичлуннас.

Зонка зэв сюся видзёдаліс джыдж бөж кодь  
йывъяса гөрд стенсө.

– А мыйла тайö стенсө кыпöдлöмаöсь? –  
юаліс пиыс да юрсö чатөртöмөн видзөдліс  
судтасө. – Сы джуджда! Карса керка кодь!

Ванялөн мамыс велөдчигас унаысь вөв-  
лöма Кремляс да тшöкыда висътавлывліс  
Кремльлысь историясö велөдчысьясылы.  
Окотапырысь висъталіс и пиыслы:

– Ванюш, Кремль стенсö кыпöдлöмаöсь  
вөрöгысь дорйысьны. Башняссö да бердсö\*  
тэчöмаöсь дас во чөж. Мукöдлаас стенислөн  
джудждаыс дас сизим метра. Медводдза  
стенсö 14-өд нэмын кыпöдлöма Москваса  
князь Иван Калита. Стенсö вöчлöмаöсь  
тупуысь\*. Тупуыд пö медся ён пу. Уна  
буртор сэкса кадö вöчлöма йöзыслы тайö  
нималана князьыс. Уна во мысьт выль  
юралысь, князь Дмитрий Донскöй, стенсö  
лэптöма еджыд изйысь. Та вöсна весиг öнi  
на Москватö шуöны белокаменнöйөн.  
Бöрынджык нин, Иван III сар дырйи,  
выльысь тэчöмаöсь стенсö гөрд кирпичысь.  
Со кутшöм вөлöма Кремльтö кыпöдöмыс.

Сёрнитигтыр воисны Кремль пытшса  
площадьöдз. Сэни зымвидзис Великöй Иван  
нима зэв джуджыд көлөкөльня. Кык кыз  
көлеса вылын сулаліс ыджыдысь-ыджыд  
Сар-пушка. Сыкөд орчөн муас куйлісны  
ыджыд гөгрös лыйсьөгъяс – ядрояс.

– Мамö, а тайö ыджыд пушканас ёна лыйсьывлөмась? – көсийс тöдны зонка.

– Бур киподтуя морт вöчлөма та ыджда грöзсö. Но тайö пушкасьыс некор абу лый-



сьывлөмаöсь, – висьталіс мамыс да индіс серöдөм пасьяс вылө.– Со вöчысьыслөн кырымпасыс. Лыдды, Ванюш.

Зонка лыддис киподтуя вöчысьылысь овсö да нимсö: «Андрей Чохов».

– Ваньö, вай жö пуксьы тонна сьöкта шар вылас, ме тэнö снимайта. Мед казътылөм вылө коляс тайö Сар-пушка дорас волөмыс, – шуис пиыслы батыс.

Шемöсмöдіс Ваняöс и Сар-көлөкөл. Сійö дыр видзöдаліс жыннян дорсö.

Весиг кинас видлаліс жыннянысь чуктөм торсö.

– Тайö медся вына, ылөдз кылана көлөкөл вөлөма. И кызди сөмын вермывлөмаöсь кыксё тоннаа көлөкөлсö лэптивны эсытшөм выліас?! – шензис батыс. – Важөнтö öд эз на вövны вына кыпөданъясыс.

– Да, вермылөмаоьсь тай кызкө, – тшөтш жө ошкис коркө овлөм йөзлысь сямлунсө мамыс. – Сө мортлы пө ковмывлөма докк-йөдлыны жыннян кывсө, мед тоньөбтас гора шыыс.

– Мамө, а мыйла та ыджа көлөкөлсө вөчлөмаоьсь? – эз өвсы пиыс.

– Мед ылөджык юргис шыыс, кор вичко чуксаліс ас дінас йөзсө. Сөмын тай абу шуөма вөлөм сылы дыр шыавнысө. Москваас зэв ыджыд пөжар вөвлөма. Буретш сійөс кусөдігас васыыс и потас көлөкөлыс. Со мый ыджа тор чуктөма, – висьталіс мамыс да содтіс. – Öні оз юргы Сар-көлөкөлыс. Но быд мортөс шензьөдө сэкся сяма-киподтуя йөзлөн вөчөмторйыс!



1. Кутшөм могөн кыпөдлөмаоьсь Москваын Кремльсө?

2. Мый Ваня төдмаліс Кремль стен йылысь?

3. Мыйөн шемөсмөдісны зонкаөс важся вөчөмторьясыс: Сар-пушка да Сар-көлөкөл?

4. Мый тэ лыддылін Кремль йылысь? Мый нөшта тэ төдан Красной площадь да Кремль йылысь?

## Поклонной гора.

Москвао воысьяс век зильоны ветлыны Поклонной гора выло. Поклонной гора – чужан му дорйысьяслы памятник.

Ылісянь тыдовтчис салдат штык моз качом обелиск – юр копыртанінлөн медшөр юконыс. Ваня лыддяліс обелискас тодчодом кар нимъяс: Москва, Ленинград, Киев, Севастополь да мукод.

– Батьо, мыйла тайо кар нимъяссө гижалөмаось стенас?

– Война кадө медуна салдат усълөма тани пасъялом каръяссө дорйигөн, – висьталіс батыс да индіс шөр обелиск выло. – Со тайо вывланьө видзодысь ёсь штыкыс буретш петкөдлө мир дорйысьлысь ыджыд повтөмлунсө.

– Ветламөй музейяс, – нуөдчис мамыс. – Сәні висьталасны войнадырся төдчана тышъяс йылысь и унатор петкөдласны.

Музейын вөлі уна йөз: верстьояс и челядь, ветеранъяс, и том салдатъяс. Ваня казяліс весиг некымын генералөс. На пысь өти сёрнитіс кутшөмкө төдтөм кывйөн. Йөз муысь, тыдалө, локтөма мортыс.

Залъясын видзөдалісны войнадырся техника – тышкасян көлуй, салдатъясөн гижөм

письмояс, война кадö вöчөм снимокъяс. Зонка медсюся видзöдаліс лэбалаң техника: уна сикас истребитель, бомба шыбла-лысь самолётъяс да мукöдтор. Батьыс пи-ыслы ньöбис техника йылысь серпасъяса небöг.

Паськыд ота\* дöраяс вылын серпасалö-ма и Москва бердса тышъяс, и Ленинград дорйöм, и Сталинград гөгöрса косьяс, и Днепр ю вуджöм да Берлин босьтöм. Ловшы пыкöмөн йöзыс видзöдöны война пет-кöдлысь серпасъяссö. Войнаыд некор оз вун! А Поклоннöй гöраыс бур мывкыда йöзлы лои вежаинөн\*. Унатор тöдмаліс Коми му-ысь воём зонка. Аддзылöмыс сылы мөрччис вежөрöдзыс и сьөлөмöдзыс.

1. Мыйла москваса Поклоннöй гöрасö шуöны вежаинөн?

2. Тöдан-ö тэ мир дорйысьяслы сиём нöшта кутшöмкö памятник?

### **Москва са циркын.**

Цветнöй бульварвывса циркö воысьыс вöлі вывті уна. Тайö и гөгöрвоана: öд быдөн-лы окота видзöдлыны нималана артистъяс-

лысь пельклунсö, шмоня петкöдчöмсö да велöдöм пемöслысь сюсьлунсö. Ванякöд циркö вöзйысис ветлыны воча чойыс – Юля.

Циркыс ыджыд. Шöрас – дорöсалöм кытш, манежөн шусьö. Йöзыс пукалöны гөгöрыс радөн-радөн увсянныс вылöдз. Мед-вылö пуксьöдöма оркестрсö. Куполсянныс лэччöны кузь гезьяс, вомөн нюжöдöмаöсь сёръяс.

Рытыс воссис оркестрлөн гажа ворсöмөн. Недыр мысьт манежö петісны артистьяс – йöз да пемöс. Югыд биыс кусі, сöмын сылөн югөръясыс веськöдчисны вывлань, купол пыдöсас. Сэні лэбаліс нывка-гимнастка. Сійö повтöг вöчаліс шемöсмöданаторъяс, бобув моз бергаліс. Ваня пыкис лов шысö: поліс нывка вöснаыс. Видзöдысьяс клопайтісны повтöм артистьяслы.

Кутшöм нö цирк клоунтöг?! Клоуныс вöлі кык – мужичöй да ань. Виччысьтöм-торйөн да тешөн лои помланьыс «аньлөн» пөрччысьöмөн петкöдчöмыс. Нывбаба-клоуныс, вөлöмкö, мужичöй жö!

Öти бөрся мöд вежласисны манеж вылын артистьяс. Йöзкöд быдногыс шмонитöм бöрын клоунъяс корисны пемöс-артистьясöс. Медводз петісны тшап понъяс: мича бантаöсь, юбкааöсь. Найö тöдмавлісны лыд-пасьяс, артасисны. Гөгөрвоёмсö петкöд-

лісны увтёмнас. Клоун Шпунтик нимкодя-  
сис на вежөр-сямён. «Кыздз нё эськё понъ-  
ясыс велалёмаось артасынысё?» – шензис  
зонка.

Та бёрын кыліс  
скёра эргём. Оркест-  
рын ворсысьяс чоры-  
да кучкалісны бара-  
банё. Манежё петісны  
левъяс да тигръяс!  
Ваня весиг йёж-  
гыльтчывліс, кор  
найё паськөдлісны  
ёсь пиня вомнысё. Пе-  
талісны и ошъяс.  
Найё варгылясисны-  
йөктісны, патурликасисны, мачасисны.  
Тапикасис слён, некымынысь сувтліс бөр  
кок вылас, кузьысь-кузь нырнас куталіс  
мач.



Мойдын кодъ бурися вөвъяс, юрнас ми-  
чаа довкйөдлёмён, котралісны манежын. На  
вылын чеччалісны, сямнысё петкөдлісны  
пельк вёраса верзьёмаяс.

Медбёрын петкөдчис дзоляник Маша-  
гимнастка. Сійё збоя ветлөдліс зэвтём көв  
кузя да ас гөгөрыс бергөдліс дзирдалан  
асыкъяс. Гартчан асыкъясыс артмөдісны  
шензьөдана серпас.

Кылісны оркестрлөн медбөръя шыясыс. Видзөдысьяс өттшөтш сувтісны аттьөавны циркын татшөм чуймөданаторсө дасьтысьясөс да артистъясөс.

1. Кутшөм артистъясөс аддзылісны Ваня да Юля?

2. Вөлін-ө тэ циркын? Висьтав циркса артистъяслөн ворсөм йылысь.

## **Рома нима слөн.**

Ывлаын челядьөс виччысис Рома нима слөн. Збойджык челядь пуксьылісны сы вылө. Ваня эз повзбы ыджыд пемөсысь да матыстчис Рома дорө. Зонка да слөн видзөдлісны өта-мөд вылас – чолөмасисны, төдмасисны. Слөныс вөлі кывзысьысь, сюсь да рам. Рома нөшта өтчыд вежөра синнас видзөдліс зонка вылө. Ваня малыштіс слөнлысь ныр йывсө – хоботсө. Слөныс нуөдісисалис небыд нырнас том ёртсө юрсянныс кокөдзыс. Сэсся гогнитіс юрнас, чошкөдіс паськыд пельсө. Пемөс вежөрнас сійө гө-гөрвоис Ванюшөс да быттё шуалис: «Ме кыла тэнсьыд мөвпъястө, войвывса ичөт ёрт.

Тэ кө бур, и тэ дінө бурөсь. Эн вөч некор лёксö ни йөзлы, ни пемөслы. Тэ өд көсьян пукалыштны ме вылын? Пуксьы! Эн пов!»

Ваня быттё гөгөрвоис Ромалысь тшөк-төмсö: пуксис хобот вылас. Здук – и детинка вөлі нин слөн мыш вылын. Слөнсö бура велөдөмаось – ставсö вөчö колана ногөн. Сійö тэрмасьтөг, катласигтыр, воськов бөрся воськов мөдөдчис цирк гөгөр. Орчөн восьлаліс дөзьөритысьыс. Слөн вывсянь Ваня радлігтырйи видзөдлывліс Юля вылө.

– Ваня, а тэ он пов? Ме тэ моз тшөтш көсья!

Рома сувтыштліс, кывзыштіс челядь-лысь сёрнисö. Недыр мысьт Ваняос вежис Юля.

– Эн пов, Юля! Ромаыд зэв төлка да рам слөн!

Нывка первойсö, дерт, повзыштіс. Но вочасөн веніс полөмсö.

– Аддзысьлытөдз, Рома! – татшөм кывъяс шуисны челядь бур пемөскөд янсөдчигөн.

1. Кутшөм вөлі Рома нима слөныс?
2. Мыйла Ванялөн да Юлялөн артмис слөнкөд ёртасьöмыс?

## Зоопаркын.

Быдөн, коді волö Москваö, зильö весь-кавлыны зоопаркö. Ваня асывсяньыс ним-кодясис. Талун сийö аддзылас быдсяма пемöссö. Сийö тэрмöдліс сыкөд мунысьясös: мамсö да Юляös. Мөвпнас зонка вöлі нин зоопаркын.

– Мамö, а Рома кодь слöнтö ми аддзылам? Верблюдыд тайö зоопаркас эм жö?

– Воам – ставсö ачыл аддзан! Тайö зоопаркыс öд мян медыджыд. Быд сикас пемöсыс сэнi эм: и лунвывсаыс, и войвывсаыс.

Метроысь петöм бöрын недыр муныштісны подөн. Йöзыс люзьгисны-мунісны зоопарклань. Зонкалы окота вöлі ордйыны ставнысö да воны медводзөн.

Зоопаркын асфальта паськыд туйяс. Öти ордым кузяла гөрд краскаөн серöдöмаöсь кутшöмкö пемöслысь кок туйсö. Тайö пас сертиыс и мөдöдчисны зоопарк пытшланьыс. «Кытчö бара тайö кок туйыс нуöдö мянös?» – көсйис тöдны зонка.

## Облезянаяс.

Кок туйыс вайöдіс öблезянаяслы вöчöм йөрö. Йöзсыс найös вöлі торйöдöма сутугаысь кыöм прöшвиөн. На гөгөр век уна

йöза. Öблезянаяс видзöдöны кык кокаяс  
вылö да быдногыс вежнясьöны-чеччалöны.  
Томджыкъясыс тэрыба ветлöдлöны налы  
лöсьöдöм посьясöд. Вылö  
кавшасьöм бöрын пуля моз  
уйкнитöны увлань. Öти  
öблезяна вомас кутис сулея  
да юис.

– Мамö, позьö найöс  
вердыштны?

– Сет печенньötö. Со  
тай куш васö жö юö, –  
нюмъялöмөн шуис мамыс  
да сетис челядьлы печенньö  
пачка.

Зонка мыччис ва юысь пемöслы öти  
печенньö. Öблезянаыс дыркодь видзöдис  
Ваня вылö, мыйкö мöвпалис. Сэссия кыз тай  
тшапнитис кисыс юмовторсö! Нямлялис,  
юыштит васö. Радысла жермунис вомыс.  
Ваня да Юля вак-вакөн серöктисны. Че-  
лядьлань матыстчис мöд öблезяна. Юля  
сылы тшötш мыччис юмов печенньötö, эз  
удзöд. Пемöсыд зiля нямыльтис-сёйис да  
кватитис ёртыслысь ва тыра сулеясö. А  
йöзыдлөн серамыс!

Орчча вежöсас вöли пöрысь нин зэв  
ыджыд горилла. Сiйö вöли пемыдруд кузь  
гöна, жугыль синма. Кымöсыс пökата, син-



тасыс\* паськыд. Стрөг пөль моз пемөсыд  
скөрысь чөвтліс видзөдлассө челядьлань.  
Ваня жальпырысь видзөдіс горилла вылө.  
Тані эз нин кыв теш-серамыд.

### Верблюдъяс.

Джуджыд потшөс сайын олісны верб-  
людъяс. Чатөра юраөсь, найө зэв тшапа  
ветлөдлісны потшөс пөлөныс. Меліөсь, си-  
быдөсь, оз повны мортысь. Зонка казяліс:

найө вөліны и өти  
гөрбаөсь, и кык  
гөрбаөсь.



– Мамө, мыйла  
верблюдыслы колө  
гөрбыс?

– Верблюдыд  
век гөрба. Пусты-  
няад налы ватөгыд  
сьөкыд овнытө. А  
гөрбас сьлөн чу-  
көрмө колана мын-

даыс. Тайө запаснас сійө вермө овны некы-  
мын лун, – висьталіс челядьлы мамыс да  
содтіс: – Верблюдтө шуөны пустыняса ко-  
рабльөн. Пустыняын найө новлөдлөны йөзөс  
да налысь эмбур-көлуйсө.

Со өти верблюд нюжөдчис льобнас потшөс дорын сулалысьяслань. Кыліс гажа серам. Вөлөмкө, верблюдыд кодлыкө сьөлыштөма. Татшөм виччысьтөмторйид, дерт, абу любө.

Ваня да Юля сеталыштисны сөянтор. Верблюдьяс окотапырысь нюжйөдлісны кузь льобнысө да няклясисны-сөйисны.

### Крокодильяс.

Зоопарк ыджыд. Индөд пас серти корсисны крокодильяслысь оланінсө. Найө вөліны кыкөн. Öтиыс куйліс изьяинын, косінас. Сійө шонтысис шонді водзын. Крокодилыс вөлі кык метра кузьта, пемыдвиж, синмыс куньса. Мөдыс легөдчис ва веркөсын. Юрсө чургөдыштөма, син йөгыс да ныр йылыс ва веркөсас. Ачыс лапасө паськөдөмөн надзөн уяліс-вөрис.



Дыркөдь челядь видзөдісны на вылө. А куйлысь крокодилыс сідз эз и вөрзыв.

## Слөнъяс.

– Мамö, Рома кодь слөнтö талун аддзылам огöй? – дзайгана юасис Ваня.

Зоопаркын неыджыд кытшов вöчöм бöрын воисны слөнъяс дорö. Зэв ыджыд йöрын ветлөдлісны кык слөн. На дінö матыстчыны оз вöлі позь, öд найö эз вöвны циркса велөдöм слөнъясөн. Öти слöныс хоботнас паськыд воргаысь кыскис ва да резыштис ас вылас.



– Со кыдзи найö ыркөдчöны да мыськалöны асьнысö! – шензис зонка.

Мöд слöныс мыйкö исаис-корсис. Сэсся сюрöмторсö веськөдис вомас.

– Мамö, хоботыс слöныдлөн, сідзкö, кузь ныр лоö? – Ванялы тöд вылас усис Рома слöныс.

– Колö стöчмöдыштны. Слöныдлөн вылысса льöбйыс да нырыс йитчöмаöсь. Öтлаын и артмөдöмаöсь аслыссяма хоботсö. Хоботнас сійö и лолалö, и исасьö – корсьö сёян, – висьталіс мамыс. Сэсся индіс ворга дорын сулалысь слөнлань. – Со буретш

слёныс кыскё хоботнас васё. Сэссия веськё-  
дас вомас да шлангысь моз сэтчё и лэдзас.

– А ме, Ваня, слонъяс йывсьыд неважён  
небөг лыдди. Слёныд – вежавидзысь да  
мортлы отсасьысь пемёс. Хоботнас найё  
вермёны пөрөдны пу, дорйысьны вөрөгысь.  
Весиг кага видзны отсасёны, – висьталіс  
лыддьёмтор йывсьыс Юля.

### Юсьяс да павлинъяс.

Водзё мөдөдчисны ты пёлөн. Тыас  
уялісны ыджыд юсьяс, өвтчисны кузь борд-  
наныс да зілісны кыпөдчыны. Со берегсянь



неылын шлывгис-муніс лым кодъ еджыд  
юсь. Сійё сувтыштіс, нюкыльтіс кузь голясё  
да сунгыліс съөд нырсё ваё. Бөр лэптіс юрсё  
да нюжөдіс голясё вывлань. Сэссия кыдз тай  
швачнитас вына борднас! Ылөдз резөбтісны

ва войтъясыс. Недыр олыштөм бөрын заводитіс нырнас лөсьодавны дзугсьөм гөнсө. Мича серпас!

Туйыс вайөдіс павлинъяс оланінөдз. Да, оз, вөлөмкө, павлинтө весьшөрө шуны медся мича лэбачөн! Лөсьыд статя, ичөтик юра. Кокыс кузь. Юр йылас сувтса посныдик гөн.

Лэбачыд казяліс выльөн локтысь йөзөс. Нем виччысьтөг мичаа шевкнитіс паськыд бөжсө. Лөза-гөрда, виж да зарни рөма серьяс да кытшъяс артмөдісны син гажөдан мич! Павлиныд пыр тшапмис и тшапмис. Йөз водзын бергөдчыліс некымынысь: со пө ме кутшөм мича! А сэсся бөр тупкис бөжсө, дзебис мичасө, сайөдчис.

Мойдын кодь шемөсмөдана вөлі тайө серпасыс!

1. Кодөс аддзылісны зоопаркө волысьяс?
2. Мый шемөсмөдіс челядьөс?
3. Лөсьөд зоопаркын олысь пемөс йылысь ассьыд сёрни.
4. Вөлін-ө тэ коркө зоопаркын? Висьтав сәні олысь пемөс да лэбач йылысь.

## Вошлём.

Зоопарк кытшовтём бöрын челядлөн кынöмыс мöдiс нюкыртны-сюмавны. Шуисны сёйыштны кафеын. Сёян-юанiнын йöзыс вöли уна жö.

– Ваня, Юлякöд тi пукалыштöй ывлаас. Ме босьта сёян да кора тiянöс,– тшöктiс мамыс.– Сöмын некытчö татысь эн мунöй. Зоопаркыс öд вель ыджыд. Вошанныд!

Недыр пукалыштiсны чоя-вока. Син водзас пыр на сулалiсны аддзылём пемöсь-ясыс. «Миян паськыд му шар вылад, вöлöмкö, олö быд сикас пемöсыс»,– кывкöрталiс зонка.

– Юля, кутшöм бур, мый Москваад эм зоопарк – быдсяма пемöс видзанiныс. Быд морт вермö аддзывны и лунвывса, и войвывса пемöсöс,– шуис Ваня.

– А Сыктывкарад абу öмöй зоопаркыс? – кöсйис бурджыка тöдны Коми му йылысь Юля.

– Ыджыд каръясысь сöмын гожся кадö некымын лун кежлö вайлывлöны кутшöм-сюрö пемöсöс,– вочавидзис Ваня.– Юля, меным окота нöшта видзöдлыны тешитчысь öблезянаястö. Гашкö, удитам на дiнöдз котöртлыны пасъяс сертиыс?

Асфальт вылө гөрд краскаоӧн пасъялөм кок туйяс бара вайөдiсны челядьöс öблезанаяс дiнö. Кыкнанныс бара сьөлөмсянныс радлiсны накөд паныдасьöмлы. Гылыда сералiсны на вежнясьöм вылө.

Друг Ванялөн юрас визнитiс мөвп: «Мамö öд эз тшöкты некытчö мунны. Колö зiля бөр котöртны...» Сiйö повзыштiс, чужöмыс весиг кельдöдыштiс. Чоя-вока видзöдлiсны öта-мöдныс вылө, уськөдчисны корсьны туй пасйөдъяссö. Повзьöмвывсьыд налы некыдз эз сюрны тöдса кок туй пасьясыд. Дрөгмунiс Ванюшлөн дзоля сьөлөмыс, вунiс кынөм сямалöмыс. «Вошим! Эз öд прöстö найöс öлөд мамыс: вошны танi позьö...» Кыкнанныс мөдiсны котравны-корсьны сөянiнсö, көнi вöли гижöма «кафе». Роч Юляыд збойджык вөлöма. Сiйö тэрыба юасис йöзыслысь петанiн йылысь. Сэссия матыстчис неылын сулалысь милиционер дорö.

Кылис нывбабалөн зэв гора гөлöс: «Канев Иван из Сыктывкара и Нестерова Юля из Зеленограда! Вас ждёт мама возле выхода из зоопарка!» Тайö, вөлөмкö, радио пырнин найöс мамыс корсьысьö. «Колö кужöмөн овны тöдтöминад да уна йöзаинад!» – бара на усис дум вылас мамыслөн велөдöмыс.

Ылісянь Ваня казяліс мамыслысь мы-  
гöрсö. Сійö сулаліс зоопаркö пыран öграда  
дорас да синнас дзöръяліс-корсис вошöм  
челядьсö.

– Мамук, менам донаöй! – уськöдчис ма-  
мыс дінö пиыс.

Ваня казяліс мамыслысь кутны вер-  
мытöм синвасö.

– Прöстит! Ми мыжаöсь... – öттшöтшмоз  
артмис кыкнанныслөн.

Мам сьöлöмыд ставсö тай прöститас...

1. Мыйла вошлісны зоопаркын челядь?

2. Висьтыслөн кутшöм места вöрзьöдіс сьö-  
лöмтö?

3. Кыдзи тэ гөгөрвоан мамлысь велöдöмсö:  
«Колö кужöмөн овны тöдтöминад да уна йöза-  
инад»?

## Арбат.

Кык вежон чöж бать-мамыскöд Ваня  
оліс рöдня ордас. Быд лун найö ветлісны  
кутшöмкö нималана местаö, волісны театрö  
да музейö. Медбөръя луннас батыс ышöдіс  
Ваняös да мамсö ветлыны Москва шöрса  
öти улич вылö.

Арбат. Тані быдторйөн вузасьоны. Зонкалы синмас шыбитчисны са кодь съод чужома йоз – негръяс. Нюмъялөны, сөмын пиньныс еджвидзө.

– Здравствуйте! – нарошнө матыстчыліс съод йоз дорө коми зонка да чолөмасис.

– Здравствуй, мальчик! – рочасисны негръяс.

Өти мыччис Ванялы кисө. Негръясид, вөлөмкө, зэв шаньось да вежавидзысьось. Зонка эз виччысь татшөм бурлунсө, весиг шай-паймунліс. Сылы окота вөлі варовитыштны негръясыскөд. Но бать-мамыс тэрмөдлісны писө: «Мунам водзө, уна шемөсмөдантор на аддзылан».

И збыль, вөчисны дас воськов и веськалісны концерт шөрө. Грымакылө аслысыяма тэрыб, өддзана музыка. Улич вылас вит-ө-квайт зон шыльыд панера лист вылын петкөдлісны йөктана серпасъяс, куштшөмөс он аддзыв сцена вывсянь. Вежлалісны паськөмнысө, вежласис и йөктанногныс. Медся томыс на пиысь дурпоп моз бергаліс панера лист вылас, шензьөдіс йөзөс пельклуннас да винёвлуннас. Видзөдысьяслы кажитчис том йөзлөн йөктанногыс.

Бать тэрмөдліс: «Со водзын би өзталысь фокусник!». Фокус петкөдлысьыс вөлі том

мужичöй, коскөдзы пасьтөм. Сийö босьтліс вомас кутшөмкө кизьөрттор, өзтіс бедь. Сэссия өзйысь бедьсө матыстіс вом дорас да пöлыштіс. Ыпнитіс ярьюгыд би. Öти бөрся мөдөс вомсянныс лэдзалис сынөдас би сюръяяс. Дивө да и сөмын!

Сэссия сувтлісны нель морта сылысь котыр дорө. Нельнанныс ворсөны гитараөн. Гора шыыс чукөртіс ас дорас музыка радейтысь йөзөс. Ваня сувтіс ворсысь-сылысь зонъяскөд орччөн. Бура тыдаліс налөн ворсанногыс, кыліс сьөлөмө йиджана сыланкывйыс. Ванялөн батыс тшөтш сылыштіс.

Арбат помланыс öти чукөрын тэрыба варовитісны тшапа пасьтасьөм йөз. Ставныс сьөд öчкиаөсь, фотоаппаратаөсь. Ваня кывзыштіс налысь сёрнисө, но нинөм эз гөгөрво. Вөлөмкө, ылі муысь локтөм йөз. Видзөдалöны нимкодьпырысь гөгөрбок. Сідзкө, Арбатыд налы тшөтш жө воөма сьөлөм вылас...

Ванялы некор на эз удайтчыв аддзыны серпасалысьясөс. А тані джуджыд керка стен пөлöныс серпасалысьяс вөзйöны-вузалöны вөчөмторнысө. Тані жө, тшөктан кө, серпасаласны и асьтө. Тошка серпасалысь казяліс ошкана синмөн видзөдысь Ваняөс да чукөстіс ас дорас.

– Зонка, тэнад сэтшөм бур синвидзөдласыд!.. Көсьян, мед нэм кежлад коляс авъя чужомыд, нюм тыра мелі синмыд? – рочөн сёрнитіс ськөд серпасалысь.

Эз ковмы зэв дыр тшөктыны Ваняөс. Сійө пуксис улөс вылө. Час джын – и войвывса зонкалөн уна рөмөн вөчөм портретыс вөлі дась.

Арбат шемөсмөдіс Ваняөс аслыспөлөслуннас. И юрвежсьыс, дерт жө, дыр оз вушйы аддзылөмторйыс.

– Аддзысьлытөдз, Арбат! Гашкө, коркө бара лоө волөма татчө...

1. Мыйөн шемөсмөдіс Ваняөс Арбатыс?
2. Кызд тэ чайтан, кутшөмөн аддзис зонкаөс художник, кор серпасалис сылысь портретсө?



## Гажа челядьдырыд – медся бур кад



### Сарысь ворсём.

Гожся каникул помөдзыс Ваня оліс  
Кызрас грездас. Москва бөрад зонкалы  
торъя нин мусаөн кажитчис чужаніныс. Ас  
муад весиг чужан кывйыд мичаджыка  
быттё юргө. Лолыс кыпаліс зонкалөн: өд **207**

сійö гожöм помöдзыс кутас овны пöль-пöч ордас. Тöжд ни шог абу урок велöдöм вöсна! Некод сійöс оз мöд чуксавны водзысь водз школаö мунны. Чеччан, кор унмыд дзикöдз нин веськалас.

Гожöм кежлö Кыдзрас грездö воис Ванялөн воча вокыс – Дима. Сійö öти воөн ыджыдджык, вуджис коймöд классö.

Челядь дырйиыд пö и гажлуныс да ворсан кадыс! Кыдзрас грездса зонпосни уна ног кужисны ворсны. Чукöртчас томуловыд öтилаö – ворсöны-гажöдчöны, сералöны, содтöны вын-эбöссö, сöвмöдöны сямнысö.

Мишö да Öнью вокыс локтисны Каневьяслөн öшинь улö.

– Ворсыштам сарсыыд, – корис Ваняöс Мишö. – Петкöд мачтö!

– Пудъясям: кодi лоас сарнас, – сёрнитчисны челядь.

Мишö лыддис пудъясянкыв:

*Öти – мöти,*

*Квайт – няйт,*

*Кык – мык,*

*Сизим – мизим,*

*Куим – пуим,*

*Кöкъямыс – мöкъямыс,*

*Нель – моль,*

*Öкмыс – прöмыс,*

*Вит – низь,*

*Дас – пас.*

– Ваня, тэ лоан сарён, – стöчмöдiс пудъясьöмсö Мишö.

Медводз Ваня-сар быд ворсысьёс нимтіс пемёсён. Ворсёмыс заводитчис тадз: Мишё индö код вылö кö, а Ваня пемöс нимён сійёс шуö. Тадзикөн Мишö лои межөн, Дима – бычöөн, а Öньö – чошöөн.

Визьнитісны кытш. Ваня вайис джек да сар моз пуксис кытш шöрас. Аскöдыс орччөн муас пунктіс мачсö. Дима, Мишö да Öньö сувталісны бок ног кытш саяс. Сулалöны да сюся кывзöны сарöс: кодлысь нимсö сійö горöдас? Водзвыв урчитісны штрап лыдсö – куим.

«Бычö!» – горöдіс Ваня-сар. Дима тэрыба тшапнитіс мачсö да шыбитіс Мишöлы буретш мышкуас. Öти штрап лои «межлөн». Мач выльысь кытшын. Сар горöдіс: «Меж!» Мишö кватитіс мачсö. Но кодакостікö Дима да Öньö ылöдз нин вевъялöмаöсь пышйыны. Лыйис Дималы – эз веськав. Мöd штрапыс бара лои «межлөн».

Ваня мövпыштіс да выльысь горöдіс: «Меж!» Тайö здукнас Мишö вöлі дасьтысьöма ылöджык котöртны: мед пö меным эз вермыны веськавны ёртъясыс. Сійö öдöбтчис кытшсянь. «Меж» кывсö кылöм бöрын бөр ковмис косны. Кватитіс мачсö. Лыйис Öньöлы – бара эз веськав. Тадзи Мишöлөн лои куим штрап.

– А öнi ме тэнö мыжда! – чорыд гөлöсөн шуис Ваня-сар.– Бауөн кытшовт көза гидсö да меж моз баксы.

Мишö – инас öшййтöм, шмонлив зонка. Сийö пидзöсчанясис да гораа бакöстiс: «Бэ-э-э!» Сэссия меж моз мöдiс чотликтыны-мунны. Корсис турунаин да сарпыштiс веж йивъяссö, быттьö йирсис. Видзöдысьяс вак-вакөн сералiсны «межлөн» петкöдчöм вылö. Баксöмсö кылöма Люся көзаыс. Гогнитлiс юрнас: кутшöм нö пö пемöс воис миян йөрö? Воча шыясис: «Ме-э-э!» Нöшта гораджыка мöдiсны серавны-гигзыны челядь.

– Мыйсяма нин, мися, ыж-меж воисны миян йөрö? – баксöм шы вылö керкаысь петiс пöчыс.

– Ми сарөн ворсам,– нюм пырыс вись-талiс Ваня.– Мишö куим штрапысь мын-тöдчö, меж моз со петкöдчö-баксö!..

1. Кыдзи коллялöны прöст кадсö сиктса челядь?

2. Кутшöм ворсöм тэ нöшта тöдан?

3. Кутшöм мортөн лоö тэ серти Мишукуыс?

4. Тöдан-ö тэ пудъясянкывъяс?

## Туфик да пефик!

Недыр мысыт гажөдчанинө воисны Мишөлөн Аня чойыс да Наста суседкалөн пыскыль кывъя дзоляник Танюкыс. Сарысь ворсөм бөрын челядьлы нөшта на окота вөлі мыйөнкө ворсны. Сэк кості на дорө матыстчис Ванялөн пөчыс.

– Настояс дорөдз тіян серамныд кылө. А өні ме видзөдла, кызд ті верманныд чөла овны. Ми важөн тшөкыда серөктөмысь ворслывлім – казтыштіс томдырся ворсөмсө пөчыс да корис челядьөс кытшө.



– И ме көфйа вофны! Бофтөй менө! – тшөтш кытшө сувтіс дзоляник Танюк.

Ставөн нюмъөвтисны Танюклөн пыскыль сёрни вылө. Пөчыслөн важ коми ворсөмыс быдөнлы кажитчис. Со кызди ворсісны: квайтөн сувтісны кытшө да быдөн шуйга кинас орччөн сулалысьлысь босьтіс веськыд кисыс ыджыд чуньсө. Ньөжйөник бергалігтыр пөчыс бөрся шуалісны:

*Ас ки кикарнан,*

*Ки карнан,*

*Кодлөн водздзык*

Пинь воссяс –  
Дас тувик,  
Дас печик.  
Тю! Тю! Тю!

Сувтіс чөв-лөнь. Оз позь ни шыасьны,  
ни нюмъётны. Ставныс топөдөмаось вом-  
нысө, полөны өта-мөд вылас видзөдлыны.  
Сулалөны да виччысьөны: коді на пиысь  
медводз пиньсө петкөдлас-серөктас?

Друг насянь неылын кыліс Люсюклөн  
«Ме-э-э!» Көзаыд пыр на «межтө», вөлөмкө,  
корсьысьө. Нельнан зонкаыс өттшөтш



сярөбтісны-серөктісны, быттьо посни дрөбөн  
луйыштісны. Аня эз жө вермы кутчысь-  
нысө, прысьнитіс-серөктіс. Өтнас дзоля Та-  
нюк сулаліс вомсө тупкөмөн. Кор ставныс  
пөттөдзыс гигзисны, нывка фуфкис-шуис:

– Ме эг сефаф... А тіянлы туфик да пе-  
фик!

Ичөт Танюк витнанныслы печиктіс.  
Тадзи и колө тіянлы, ышмысьяслы!

1. Кутшөм важ ворсөм төдмалісны челядь Ваня  
пөчсянь?

2. Төдмав пөль-пөчылдысь кутшөмкө важ коми  
ворсөм йылысь да велөд ёртъястө.

## **Катьö тьötлы отсög.**

Гожся луныд тэрыб вөв моз гөнитө. Сик-  
тын олысьыдлы гортгөгөрсә уджыд пыр эм.  
Том зонкаясөс асывсяньыс нин пөльыс  
кесйөдлө:

– Ивө да Дима, Катьö тьötкаыдлы колө  
отсыштны. Вывті нин тай вөлі көсьянный  
тувьясны. Чипан йөрсө колө рейкаясөн  
вильмөдны.

Зонпоснилы тайö и колö. Найö öд уна-  
ысь нин пöлыслысь корлісны мөлöt да көрт  
тув. Лунтыръясөн мыйкö тувъясисны-вöча-  
сисны, потшöс дзоньтавны отсалісны.  
Пöлыс найöс велöдіс öтчыд кучкөмөн суй-  
ны көрт тувсö. Потшöссö дзоньталігөн Ваня  
некымынысь инмис мөлötөн чуныс. Дой-  
мыліс, дерт, но эз норась. Норасян кө öд,  
мöдысь пöлыд ни мөлötтö, ни чер-пилатö  
оз сет!

Сьорсьыс босьтісны көрт тув тыра доз,  
мөлöt да ножовка. Мөдөдчисны катыд помö,  
көнi оліс Ванялөн вежаньыс.

– Ивö да Дима воöмаöсь? Локтöй, пырöй! –  
радліс налы Катьö тьötка.

– Вежаньö, ми рейкаястö тувъявны лок-  
тім,– нюмдіс Ваня.

Зонкаяс зіля босьтчисны уджö. Öтиыс  
кутö, мöдыс тувъясьö. Синсьыныс би петö  
уджалöны-котшöдчöны.

– Со öд нин кутшöм киподтуяöсь Тат-  
тян чойöлөн пöчөн шуысьясыс! – ошкис  
найöс Катьö тьötка.

Татшöм кывъяс бöрад кыз он уджав?  
Кылö сöмын: тутш да тотш! «Кыкнанныслөн  
батьясныс моз жö водз удж дінад кыис си-  
балöма. Лöсьыда нин велалöмаöсь тувъясь-  
нысö»,– ас кежсьыс ошкис-сёрнитіс Катьö  
тьötка. Рейкаяс тувъялөм бöрын тутш-

тотшкерисны лосьодыштисны и дзиръясө, и кильчө поссө, и сарай өдзөссө. Сюрис тай, майбыр, налы тувъясян уджыд! Көрт тув видзан дозйыс тыртөммис – челядълөн уджыс помассис.

– Отсасысыяс ті менам, дона дитяяс! Чай ютөг он жө өд на мунөй?! Пыраламөй гортө, – корис найөс Катъө тьөтыс.

Чөскыд кампетнад морт кык чашкаөн чай юисны. Ванялы дум вылас бара усылі и өмидз сөйигад петшөрасьөмыс, и нывкаө пасьтасьлөмыс.

– Таттян чойлөн шудлуныс тай вөлөма, сөмайбырөй! А менам челядыд эз вөв... Да и пөчөн шуысыд со абу, – майшасис Катъө тьөтка. – Ті көть, дитяяс, отсаянныд... Сө пасибө!

Ывлаын кыліс чипанлөн гора котсөмыс.

– Ті пукыштөй, а ме колькла петала. Кытчөкө мудер Марьюшкоыд асьыс кольксө дзеблалө.

– Ми, вежань, кытшовтам йөртө, корсьыштам, – көсйысисны зонкаяс.

Сюь синма том йөзыдлы өдйө и сюрис чипаныдлөн дзеблаланіныс. Нюмъялігтыр Ваня мыччис вежаньыслы пес чипас костысь сюрөм нель кольк. Öти на пиысь абу на удитөма көдзавнысө.

– Тайö тiянлы гösнеч,– шуис Катьö тьötка да пукталiс кольксö кушмöм көрт тув видзан дозйö.– Эн жугöдöй. Аттьö, сёшайтъяс, ставсьыс. Волывлöй, энö вунöдöй. Том йöз дiнад и пöрысь мортыд тай том-мыштö...

Зонкаяслы вöли зэв нимкодъ.

1. Кыдзи отсасисны Катьö тьötкаислы Ваня да Дима?

2. Мыйла висьтыслы сетöма татшöм нимсö? Кыдзи тэ гөгөрвоан вайöдöм шусьөгъяс:

Уджыд вöчö морттö шудаöн.

Уджыд быд мортöс веськöдас.

Кöть и ичötöсь, а оз повны ыджыд уджö босьтчыны.

3. Вайöд удж йылысь мукöд шусьөг.

### Чом.

Рытнас мудз челядь эз нин петавны ывлаö ни мачөн ворсны, ни велосипедөн журъявны. Сёрнитчисны мöд асивнас вöчны горт дорас пöвъясысь чом.

Пывсян лэптöм бöрын вöли кольöма некымын пöв. Пöльыс найöс зэръясысь дзеблiс

кильчө пос улө. Пес чипас дорас тшөтш жө куйлісны важмөм пөвъяс. Сэссия вотчигөн вөрса туй бокысь Ваня аддзыліс энөвтөм пөв чукөр. Артыштисны кык вок: пөжалуй, артмас нин чомйыд.

Зонкаяслөн важөн нин чужис мөвп лэптыны аслыныс чом. Но кызд та йылысь висьтавны пөль-пөчлы? Гөгөрвоасны-ө?

А эз и мөд пыксыны пөлыс. Сійө бура гөгөрвоис: ичөтик чомсянь өд и заводитчө керкаөдз воөдчан сямыс.

Кык вок лунтыр чукөртисны пөвъяс. Сэссия пилитчисны-тотшкөдчисны. Ывлаыс пемдіс нин. Воис узыны водан кад. Пөлыс петіс корсьны вошөмаясөс.

Кык вок джынвыйө эштөдөм оланінө вайөмаөсь кос турун, важ эшкын. Узьмөдчыны лөсьөдчөмаөсь.

— Дедө, позьө, ми тавой тані узям?! — корис Дима.

Пөлыс ошкис зонкаясөс бура уджалөмсьыс. Зэв нимкодь сылы вөлі: внукъясыс быдмөны уджачөсь да нырччысьөсь. Но сёрнисө век жө веськөдіс колана вожө:



– Тiянлысь керкатö вевттыны на колö, öдзöстор вöчыштны. Эштöдтöм керкаас нö кыздз тi овмöдчанныд? Абу ни вевт, ни öдзöс, ни иган. Воймöдчанныд керкаад сэк, кор помöдз ставсö вöчанныд.

Пöльыс быдөнкөд кужö бура артмöдчыны. Челядь гөгөрвоисны ставсö, кыв шутөг пырисны керкаö да водисны налы лöсьöдöм вонйö.

1. Кызди челядь вöчисны аслыныс чом?
2. Кызди донъялис нылысь уджсö пöльыс?

## **Көдзид!**

Чомйыс челядьлөн артмис кыпыд. Оланінсö мичмöдыштöм могысь пöчыс зонкаяслы сетис öшиньö öшандöра да джодждöра.

Öти рытö кык вок мөвпыштисны спектаксыны: гажöдыштны ёртъяссö лягушаяс йылысь мойдөн. Чуньяс вылас дасьтисны паськыд вома, ыджыд синма лягушаясöс. Кыздз нö эськө вöчны турунвиж рöмаөн кынысö, мед нин дзык лягуша кодь лои вöчөмторйыс? Зонкаяслы шкапысь сюри

турунвиж рёма бурдөдчантор. Доз вылас ги-  
жёма «Бриллиантовая зелень». Тайё мича  
рёма ванас коркё мамыс мавтліс Ванялысь  
доймём коксё.

– Öні буретш серамбана  
лягушаяс кодь лоам! – рад-  
лігтыр зонкаяс мавтісны ки-  
нысё.

Воисны ёртъясыс. Чом-  
йын зэвтисны дёра. Лои  
быттё збыль театрын. Бы-  
дөнлы сёлём вылас воис лягуша ног гетш-  
кёмыс, морт моз ваын олысьяслөн тешкодя  
сёрнитёмыс. Кык лягуша öта-мөдыскөд не-  
дыр вензисны. Сэсся бөр бурасисны да  
сылісны шмонитана сыланкыв. Видзё-  
дысьяс ошкисны том артистъясөс. Бур пөт  
сералём бёрын разөдчисны гортаныс. А зон-  
каяс босьтчисны ниртны-мыськыны кияс-  
нысё. Найё öд пөль-пөчсьыс гусьён артис-  
талісны.

– Вай кепысясям! Некод оз казав, – чуй-  
діс воксё Ваня.

– Буртор тэ вөзъян! – ошкыштіс воксё  
Дима да мөдіс корсьны кепысь.

Гожся жар лунё кыкнанныс кепысясис-  
ны да пырисны керкаө. Сэсся öта-мөдсё  
мөдісны тойлавны-дурны. Пырис пөчыс.



– Өвсөй, том петукъяс! – өлөдліс зонкаясөс пөчыс. Сэссия видзөдліс ыззьөм внукъяс вылас да шензигтыр юалис: – Мый нө талун кепысясьөмныд?

– Кө-ө-өдзид! – тіригтыр шуис Ваня да джөмдіс.

– Ой! Киөй менам кынмө-ө-ө, – вокыслы отсыштіс Дима.

– Пачтө инө ковмас ломтыштлыны, – дыр падъявтөг кайтыштіс пөчыс да тшөктіс детинкалы пыртны пес.

Керкаас оняліс нин жарөн. Кык вокыд пыр на кепысясь.

– Челядь, мыськөй кинитө да пуксьөй сөйны, – кыліс пөчлөн мелі корөмыс.

Зонкаяслы ковмис пөрччыны кепысьтө. Пөчыс пыр жө и казяліс вижөдөм кинисө:

– А сө дивө тай! Мый нө кинидкөд лоома?..

– Тайө көдзидсьыс, бабук! Шоналыштөм бөрас прөйдитас, – личөдісны повзьөм сьөлөмсө бабыслысь кык вок.

Пөль-пөчыс, дерт, гөгөрвоисны налысь ышмөмсө да мудералөмсө. Пөчыслөн тырмө тай терпенньөйс. Рытивбыд меліа сөрнитіс. А пөльыс талун стрөгакодь шуалис:

– Ковмас, «артистьяс», керкаын талун узыны. Кинид со вижөдөма...

– Ми шоналім нин, пöльö! Кинымöс öд ми краситім... Асланым чом-театрын ки помысь лягушаясöс петкөдлім. Позьö, пöльö, вонйын узям?..

– Кынминныд кө, шоныдінас и узьöй! – крапнитіс-шуис пöль да вольсаліс зонкаяслы пыді вежöсö.

1. Кыдзи артисталісны кык вок?

2. Мыйла пöльыс эз лэдз внукъяссö вонъяс узьны?

3. Донъялöй Ванялысь да Дималысь вöчөмторсö.

## Полокалö.

Яра пöжис гожся шонді. Кисьмыны мөдіс градъяс вылын оз. Чöсмасьыштны сюралö нин. Аски-аскомысь позьö нин унджык вотны да варенньö пуны. Вокъяс садьмисны ракаяслөн кравзöмысь: «Крав! Крав!» Найö, вөлөмкө, лэбалöны-гöгралöны градъяс весьтын, гөрдөдөм вотөссö кокалöны.

Пöчыс асывсянныс мунöма пошта вылö. Челядь сөйисны пачын пöжсьөм чөскыд рок да петісны ывлаö.

– Слөймөмаөсь нин вөрөгъясыд гусясьны-кокасьны! – пинь пырыс сөдзөдіс Дима.

– А ми талун көсьям вөлі вотны. Со и вот... Да өд медся гөрдөдөмъяссө бөрйөмаөсь, – шогсис Ваня. – Кокалөм вотөстө он нин өд сэсся сөй!

Вокъяс котөртисны пөльыслөн вөчасян керка дорө. Пөльыс казяліс: зонпоснилөн гажа оланруыс вежсьөма.

– Пөльө, ракаясыд гөрдөдөм вотөссө град вывсьыд ставсө кокалөмаөсь, – юксис шогнас Ваня.

– Эк, полокалө кө эськө! – өттшөтш артмис вокъяслөн.

– Тіян пельпом выланыд тай абу на көчачмач! – ошкыштіс бур мөвпсьыс найөс пөльыс. – Важмөм паськөм сарайсьыд корсьөй да и сувтөдөй град помас повзьөдчысьөс.

Полокалөыс артмис серамтө петкөдланаөн: пөльыслөн киссьөм гача да кузь сос сера дөрөма, важмөм колошиа. Юр пыддиыс – розялөм ыджыд мач. Мачас төдчөдісны син, ныр. Розьтор лоис вом пыддиыс. Юр вылас сюрис идзас шляпа. Коркө тайө шляпасө Ванялөн мамыс новлөма лунвыв саридз дорын. Дөрөм соскас сүйыштісны кузь ньөр: мед пө повзьөдлө горшасьысьсө! Сырйысьөм дөрөм-гач дорас содтөд пысавлісны

сыри-летки вундалом шаракылысь уна рёма кабала. Тöлыс кокниа вөрөдө найос да кыша-кашакылöмыс бура артмө, быттьö скөрмөм морт сулалө да броткө-пинясьö.

Зонкаяс радлыштисны асланыс вөчөмтор вылө да пырисны чомъяс. Град вылө петис пöчыс, киас доздук. Пажын кежлө пöгырысьджык вотөссö бөр-йышта да вота. Сийö некымын во нин омöля вöли аддзö ылысьсö.

– Иван, мый нö сэни вöчан? – шыасис «пöль» дiнас.

Детинкаяс тайö здукас асланыс чомйын пукалисны. И кор кылисны бабыслысь полокалө дорö шыөдчөмсö, муртса эз серöктыны гораа. Но юрас вирдыштіс – часлы пö, пöльыд пыдди вочавидзам.

– Ракаясысь вотөстө видза! – пöльыс моз кыз гөлөсөн вочавидзис Ваня.

Вокъяс öдва кутчысьöны серамысь. Вомнысö кинаныс тупкөмаöсь.

– Ой-а-а! Збылысь тай ракаясыд кокасьöмаöсь, – казяліс джынъя тусьяссö пöчыс, видзөдліс пöльыслань да сувтовкерис. – Мый



нө сэтшөм шоныда пасьтасин? Кыськө тай важ дөрөмыд да шляпаыд тэныд сюрөма и?

– Стөрөжитігад мед гут-номйыс оз вильд! – бара кыліс чомсянь вочавидзөм.

Видзөдліс ас гөгөрыс пөч: некутшөм гутном оз лэбав, ни катша-рака оз тыдав. Мыйла нө верөсыс лун шөр луннас тані сулалө?

– Пыр да кроликъястө верд. Регыд пажнайтан кад, – эскана видзөдліс «пөльланыс» пөчыс.

– Ме кроликъястө верді нин, – шуис град йөрлань матыстчысь пөльыс.

– Бласлө кристос! Но и повзьөдін! – шлапкерис пөчыс. – А ме нө, пөдлино, кодкөд сёрниті? Эсійө град помас нө коді эськө сулалө?..

Кыкнанныс матыстчисны полокалө дорө. Чомйысь чепөсйисны гигзысь зонкаяс. Вак-вакөн серөктіс и пөчыс: со пө менө пөръялісны мудерпозъясыд! Пөльлөн тшөтш жө нюмыс петіс.

– Мастера нин кывберитнытө велалөмныд, – шензыштіс пөчыс. – Ышмөй, но сөмын садьтө төдөй! А полокалөыд – колантор. Мед мортөн и чайтасны ракаясыд.

– Видз вотөссө, Иван-полокалө! – шмонитігтыр шыөдчис градвывса «тьөзөёрт» дінас пөльыс.

1. Мыйла град йөрө йөзыс сувтөдлөны полокалөсө?

2. Висьтав, кутшөмөн полокалөыс артмис кык воклөн?

3. Мыйөн помасис пөчлөн полокалөкөд сёрнитөмыс?

4. Вөчлн-ө тэ град выв полокалөсө? Кутшөм сийө вөлі?

## **Көтасьөм преник.**

Пөльыслөн вөлі велосипед. Сылы кык көлесаа отсасьысьыс пөрысьладорыс, вөлөмкө, томдырся тэрыб кок пыддиыс колө. Тадз тай шуис-а. Кык вок радейтлывлісны ыджыд өдөн ветлөдлыны велосипеднас. Найө быд пөрийө стрөка корсьлісны, медым журъялыштны. Но пөльыс эз видлы таысь.

– Ивук, няньным ужнайтны абу. Велосипеднад, дитюк, ветлы лавкаө, – тшөктіс пөчыс да сетіс Ванялы сумка.

Зонка радпырысь журкнитіс няньыдла. Оз өд ков тай подөн шлөпиктыны. Лавкаас няньыс бырөма нин вөлі. «Куш киөн өд ог жө бөрсө мун? Кило джын преник көть

ньоба. Рытнас юмовторнад ставон чай юам!» – ас кежас мовпыштіс да тшөктытөм-торсө ньобис зонка.

Өшөдіс сумкасө велосипед рульө да ыджыд өдөн мөдөдчис гортланьыс. Друг мыйкө рутш-ратшмуні... Велосипед педальыс дугдіс бергавны. «Мый лои? Колө сувтөдны велосипедсө!» Но Ваня эз вевъяв ас кадө ни сувтөдны, ни веськөдны. Велосипеднас зонка шнөпкысис-уси няйт гуранө. Сумкаыс лэбзис туй бокас, а преникыс сьув-сявмуніс туй вылас.

Мый он виччысь, сійө и лоас! Ваня чеччис, чышкыштіс няйтөссьөм чужөмсө да кисө. Чукөртіс туй вывсьыс прениксө да подөн мөдөдчис водзө.

Дима виччысис воксө керка дорас. Велосипедөн жө көсйө журъялыштны. Сылөн вомыс калькмуніс, кор аддзис юрсө өшөдөмөн довгысь воксө.

– Эн шогсьы, – такөдіс Ваняөс Дима. – Велосипедтө ми аски дзоньталам. А прениктө позьө мыськыны да косьтыны.

Зонкаяс вайисны таз. Юкмөсысь сэтчө лэптисны ва. Сумкасысь ва тыра тазйө чөвталісны прениксө. Чайтісны, сөстөм ваас став лыаыс мынас. Но эз тай на ногөн арты! Тазсысь вокъяс лэпталісны небзьөм ёкмыльяс...

Сьолөмыс Ванялөн эз вөв асінас. Эз төд: мый и вөчны? Пуксис кильчө пос вылас, эз лысыт керкаас пырны. Ывлаө петіс пөльыс.

– Мый нө он пырөй? Ми пөчыдкөд нянь виччысям... – шыасис зонкаяс дорө пөльыс. Сэссия казяліс налысь шог синсө да содтіс: Мыйлакө тай шогө усьөмныд талун?

Челядь нинөм эз путьмыны шуны пөльыслы. Недыр чөв пукалыштөм бөрын Ваня сьөкыда ышловзис да висьталіс дедыслы лоөмтор йывсьыс.

– Няньыд, пөльө, эз вөв... Ме преник ньөби... – нурбыльтыштіс вомгорулас да синнас индіс вазьөм чукөр вылө.

Пөльыс пуктіс кисө Ваня пельпом вылө, пуксис орччөн. Сійө гөгөрвоис внукыслысь майшасьөмсө.

– Ачыд, Ивө, эн доймы и тайө нин бур. Жугалөм велосипедтө выльмөдам-дзоньта-лам. Сыысь эн шогсьы! А небыд преникнад Люсюктө талун чөсмөдлам... Аски юмовджык йөв тіянлы сетас! – шмонитыштіс шогө усьөм детинкакөд пөльыс. Сэссия содтіс: Тэ өд бур ногөн көсйин вөчны. Сідз нин тай артмөма... Нинөм. Бур көсйөмыд лөк вөчөмсьыд бурджык на!

1. Кутшөм неминуча\* суис Ваняөс лавкаө ветлігөн?

2. Кызди Дима вокыс көсйис отсавны Ванялы? Мыйла отсөгыс эз артмы?

3. Кызди тэ гөгөрвоан висьтсьыс медбөръя сёрникузясө?

## Лөгасисны.

Асыв. Канев гозъя шондікөд тшөтш чеччөны. А том войтырыд радейтө дырджык узыны. Вон пытшкад, майбыр, номъясыд оз дөсадитчыны. Пөттөдзыд позьө нистыны-узыны.

Кык лун вокъяс ноксисны, но жугалөм велосипедныс сідз эз на и артмы. Коймөд асывсө Дима чеччөмсянныс босьтчис дзоньтавны сійөс. Друг син улас усис туплясьыс мича кабалатор – кампет гартыштан кышөд. Босьтис киас да лыддис: «Мишутка». Дульваыс весиг петис. Татшөм кампетнас Катьө тьөтыс потшөссө вөчөм бөрын гөститөдліс. «Кытысь нө тайө кампетыс? – думнас корсис удзөдысьсө. – Ваньө, пөди, гусьөн бара лавкасьыс ньөбис да сөйис. Ме ськөд быд чөскыдторйөн юкся, а сійө со өтнас жөритөма!» Дөзмискодь вокыс вылө. Пырис гожъян жыръяс да тракнитис Ваня вылысь эшкынсө.

– Узьысь Вань, чеччы нин! – дзерөдіс воксö Дима.– Тайö тэ гусьон чöсмасин кампетнас, да?

– Кутшöм кампетон? – унзильвывсьыс эз гөгөрво воксö Ваня.

– Енэжсянь кампетыс уси? Рака сійöс кокалöма, а кышсö миян пызан улö и шыбитöма. Кутшöм мича мойдыс! Ха-ха-ха! – эскытöма чиктыліс да гораа серöктіс Дима.

– Эн серав, сера лоан! – öвсьöдіс воксö Ваня.– Эг, мися, кампетсö ме сей...

– Вомтö эн вежньöдлы! Велькыда сёрнит! – лёк ногон көрыштліс чужöмсö Дима.

– Нинöм тэ эн гөгөрво, Дима. Кампетсö отсасьöмысь меным козьналіс...

– Кодлы бара тэ отсасин? И кутшöм удж бара нин тэ вöчин? Лавкаö медасьлін? – эскытöма юалис Дима.– Ылөг поз!!

– А тэ кизьөр вема юр! – дöзмөмпырысь крапнитіс-шуис Ваня.

– Мый, мый шуин? – калькаліс Дималон вомыс.– Кывтö пыдынджык кут!

– Ачыд кут ассьыд кывтö да куж сёрнитнытö! Бура тöдмав медводз, кытысь тайö кампетыс! – мыжа морт моз нин сёрнитіс Ваня.

Тайö зык шöрас и суис вокъяссö пöчыс. Дима льöбсö нюжөдöма, оз сёрнит. Ваня уськөдчис-петіс ывлаө.

– Кутшөм чушканзи нө асывсяньыс тiяннөс чушкис? – шыасис дөзмөм внук дiнас пөчыс.– Мыйысь зыксө кыпөдид?

Пөчыс аддзис джоджсьыс кампет кышсө, гөгөрвоис зыксөмыслысь помкасө да висьталiс төрытья лоөмтор йывсьыс.

– Төрыт Ивөйд Катьө тьөтыдлы ыджыд буртор вөчис. А вөли со кыдзи. Кор тэ Мишө дорад мунiн, ми Ивөкөд градъяс мөдiм кись-кавны. Катьө тьөтыд котөрөн воис. Шог сийөс суөма: ыжъясыс йирсянiнсьыс абу воөмаөсь гортас, кытчөкө ылалөмаөсь. Ивө-ыд и котөртис ыжъяссө корсьны. Часысь дырджык кытшлалөма грездгөгөрсa видзьяс вывти. Пашө видз вылөдз кайлөма. Сэ-тысь и сюрөмаөсь вошлөмаясыд. Вежань-ыд Ивукиды кампетсө гач зептас и суйыштас чөсмасьыштны, пөсь петтөдзыс ыжъястө корсис да. А рытнас мянө Наста суседкаыд ичөт нылыскөд волiсны. Буретш Танюкыслы нель арөс тырөма. Ивөйд именичаыдлы и козьналіс кампетсө. Юмовтортө Танюкыд пыр жө вомас и суйыштитiс, радліс-кекеначасис. Тадзи со кампет кышыс пызан улас и кольөма...

«Со тай кыдзи вөлөма? А ме, вемтөм юрид, Ваняөс мыждi-видi!» – майшасис

**230** Дима. Сы син водзө киноын моз сувтис во-

кыс: ывлаас рөмдө нин, а Ваня тэрыба вөтлө ыжъясөс. Сылөн дөрөм-гачыс көтасьөма, пөсьыс шорөн лэччө...

Дималөн чужөмыс ыпнитіс. Эз ло лөсьыд сылы сьөлөм вылас.

1. Мый вөсна кык вок костын артмис зык-шумыс?

2. Кыдзи тэ донъялан Дималысь сямсө?

3. Мыйысь позьө ошкыны Ваняөс?

## **Выль велосипед.**

Челядь дырйиыд зонпоснилөн быдсямаыс тай овлө – лөгасьлан и бөр бурасьлан. Тадз жө и кык воклөн лои. Дима да Ваня өта-мөдыскөд пыр на ладмисны. А төрыт со на кості быттьө сьөд кань котөртөма. Дима дась бать-мам дінас мунны. Ваня чөв пукаліс пыді жырыын. Эз тырмы тайө здукас мелі гөлөса мамыс, сылөн бур вылө велөдан сёрниыс. Гажыс бырөма нин веськыд сёрниа батьсьыс.



– Олігад быдсяма гөгөрвотомыс тай овлө, – такөдыштөмпырысь сёрнитіс пөчыс. – Йөз пөвстад олыштанныд да төлкаджык лоанныд.

Дима Мишөкөд муніс вадорө. Ваня подөн ветліс лавкаө. Гажтөм... Лун шөр каднас триньөбтіс телефон. Ваня уськөдчис, босьтіс трубкасө. Кыліс төдса гөлөс. Да, тайө муса батыс! Зонка чужөм вылын тыдовтчис рад-лун. «Бать-мамөй локтөны! Виль велосипед ньөбөмаөсь!» – вом тырнас гажаа нюмдіс сійө.

– Бабук! Батьө звөнитліс, тшөктіс пыв-сянтө вөдитны. Рыт кежлас воасны! – рад-пырысь висьталіс виль юөрсө пөчыслы да шөпнитіс пеляс: «Виль велосипед ньөбө-маөсь. Татчө ваясны!»

– Оз өд прөстө асывсянныс веськыд пельөй тінгы. Збыльысь тай бур юөр и лои! – нюммуніс пөчыс да видзөдліс внукуыс вылө. – Нимлун өд регыд тэнад, дитюк! Вунөдін өмөй?

Ваня босьтіс кык ведра да котөртіс юкмөс дорө. Сы дінө матыстчис Дима.

– Ваня! Ме өд эг төд ыжъястө корсьөм йывсьыд. Меным бабөй ставсө висьталіс... Ме и збыль кизьөр вема юр! А тэ молодеч вөлөмыд! – ошкана видзөдліс вокыс вылө Дима. – Тэ өд он скөрав ме вылө?

– А ме эг и скöрав! Кампет понда огö жö мөдöй öта-мөд вылö лöгавны! – веськыда сёрнитіс воыскөд Ваня. Сэсса пунктіс воыкыс пельпом вылö кисö: – Бурасим!

Личалис Дималөн сьөлөмыс. Радліс и Ваня: «И батьö, и мамö, и выль велосипед... И тайö ставыс öти лунö!»

– Менам бать-мам талун локтöны. Колö пывсян ломтыны, – чепняөн юкмöсысь васö лэпталігмоз сёрнитіс Ваня.

– Ме инö тшöтш васö ваяла. Кыкнад öдйöджык лоö, – шуис Дима да котöртіс ведраясла.

Рытгорув кыліс Бусколөн увтчөм. Воисны карсаяс. Ванялы сэтшөм нимкодь вöлі. Видлаліс-малаліс выль велосипедсö. Рама вылас гижöма «Кама». Пöльыслөн кодь жö, сöмын выльдзык. Кор ковмас, и пöльыс тшöтш мөдас ветлөдлыны выль велосипеднас.

Мамыс ыджыд сумкаысь перьяліс чөскыдторьяс. Сэсса зонкаяслы мыччис кулөк тыр мича кышöда кампет:

– Тайö тiянлы, чөсмасьöй!

– Мишутка! – нюм пырыс горөдсис Ванялөн. Сэсса видзөдліс Дима вылö да кампетсö нөнялігтыр содтіс: «Мишуткаыд – миян медся радейтана кампет!»

1. Висьтав, кызди бөр бурасисны кык вок.
2. Мыйла Ваня сэтшөма радліс выль велосипедлы?

### **Пач тэчысьяс.**

Уна вонад пөль-пөчыслөн пачыс важмөма, корсюрө тшынөдө. Тайө гожөмнас найө шуисны тэчны выль пач.

Водзвыв ньөбисны кирпич, дасьтисны сөй да лыа. Лунтыр разисны важ пачсө, а мөд лунас асывсянь локтис пач тэчысь. Ванялөн батыс да сийө медводз лөсьөдісны пач подсө. Сэссия Микулай дядь кужөмөн пукталіс-тэчис быд кирпич. Батыс помөдз отсасис сылы. Но уджыс вичмис быдөнлы: пөльыс сөй гудраліс, мукөдыс кирпич пыртлісны. Кык вок тшөтш отсасисны и зэв сюся видзөдісны Микулай дядьлысь пач тэчөмсө.

Ваня да Дима мыйкөдыра вашкөдчыштисны. Сэссия мунісны важ пывсян дорө, көні стен бокас вөлі тэчөма косялөм пачсьыс бурджык кирпичсө. Кык вок тыр-бура панісны асьыныс удж.

Матысмис пажын кад. Керкаө пырис са сьөд чужөма Ваня.

– Бабук, вай меным истөг да пусян доз-мук. Картупельтө пуам! – нюмъялігтыр корис зонка.

– Көн нө ті кутанныд пуны, дитяяс?

– А мян пачыд дась нин! – өдйө аддзис воча кывсө Ваня.

Пөчыс матыстчис пывсян дорө, а сэні...

– А сё дивө тай! – сөмын и сяммис шуыштны пөчыс.

Саөссьом да сөйөссьом киаөсь, вокьяс помалөны нин вөлі тэчны важ кирпичысь ывла пач. Да өд бура артмөма! Зонъяс өзтісны сямөд. Трубасыс мөдіс петны тшын. Челядь пуктісны пач вылас чугун тыр картупель да чайник.



Недыр мысыт пызан вылө Ваня вайис руалысь пөсь картупель да чукөстіс гырысьясөс. Ставөн азыма сөйисны да ошкисны том пач тэчысьясөс.

– Ме өд аслам батылысь велөдчи пачтө тэчны. Содтөд небөгъясысь пач тэчан удж йылысь лыдди, – варовитіс пызан сайын Микулай дядь. – Медводдза пачсө лои тэчөма аслам выль керкаын. Квайт во нин со сулалө, бура-крепыда артмөма. Сэсянь ме-

ным Пач Микулай ним и кӱвъясис. Йӱзыд тай корсюрӱ чукӱстлывлӱны, медым отсалӱ пачсӱ тӱчны. Он ӱд ӱткажит!..

– Миян том йӱзыслӱн артмӱма жӱ тай пачыд! – авъяа шуис пӱлыс.– Мортыдлӱн ӱд сямыс артмӱ том дырйиыд. Сямлунтӱ, том войтыр, ӱнисянь и колӱ сӱвмӱдны. Сямакиподтуя йӱзыдлы и овнытӱ долыдджык!

1. Висьтав пач тӱчан удж йылысь. Аддзылӱн-ӱ тӱ пач тӱчӱмсӱ?

2. Кыдзи тӱ гӱгӱрвоан тайӱ сӱрникузясӱ: «Мортыдлӱн сямыс артмӱ том дырйиыс»?

3. Кыдзи тӱ донъялан кык воклысь вӱчӱмторсӱ?

## Турун пунктӱм.

Турун пунктӱмыд абу кокни удж. ӱд колӱ ытшкыны, куртны, юравны, зорӱд места вӱчны да зорӱдсӱ кужӱмӱн тӱчны. Пӱчыс тшӱкыда шулывлӱ: «Йӱлыд – медся кола-на вӱлӱга. Йӱвнад и пӱжасыд чӱскыдджык артмӱ. Ковмас на таво кӱзаыдлы турунтӱ заптыштны».

Пуксис жар поводдя – буретш турун пунктан кад. Грездянь неылын пӱч-пӱль-

ыслөн эм нейджыд видзтор. Кык лунён Ванялөн батыс ытшкис вель ыджыд пласт. Жар поводдянад туруныс зэв бура кось-мөма.

Ыджыд котырөн петісны куртны да зорөд чөвтны. Дедыс батыскөд дасьтісны зорөд места. Мукөдыс тэрыба куртісны кос турунсө. Сэсся өтияс лёддзалисны, мөдъяс юрасисны. Вөчалісны

нейджыд турун юръяс, медым Дима да Ваня кык зіб вылын вермисны котрөдлыны найөс. Пөльыс да батыс чөвтисны.

Видз шөрын кыптис нель пинькоста зорөд.

– Колө эськө кос турунтө талялыштны, – шуис пөчыс.

– Коді тані медповтөмыс да медтомыс? – шыасис пөльыс зонкаяс дінө. – Коді зорөд вылас кайлас?

Ванялы эз ков мөдысь шуны: тэрыба кавшасис зорөд вылө. Гөгөрбок видзөдліс: кутшөм мичаа шыльквидзис ытшкөм виддзыс! Ылөдз тыдалис енэжтасыс! Видзөдліс Лыаюлань. Сэні, ю мөдарас, кыпөдчис сьөдов кымөр.



– Батьö! Дедö! – горöдiс сийö да индiс пемдысь енэж вылö. – Зэран кымөр таланьö матыстчö!

– Аттö, мокасьтö! Кötöдас кö татшöм кос турунтö?! Колö зэрмытöдз зорöдавны! Зильджыка! – кутис тэрмöдлыны пöльыс.

Тэрыба ваялисны медбөръя юръяссö. Ванялы мудзтöдзыс лои талаявны турунсö. Кор зорöдсö сигöртiсны, шарöбтiсны медводдза зэр тусьяс. Сэссия шливöбтiс-зэрмис. Котөрөн сайöдчисны. Быдөнлы талун сьөлöм вылас вöли долыд: öд зорöдö лои иналöма кос да мича турун.

– Тэ талун, Ивö, медся колана морт! Аттö тэныд! – ладөн сёрнитiс внукукскöд пöльыс. – Ёсь синнад ас кадö казялiн зэра кымöрсö. Тэрмöдлыштiн мянöс, да и зорöдавсис зэрмытöдзыс.

1. Висьтав турун пуктан удж йылысь.
2. Мыйла турун пунктiгөн колö уджавны öт-сöгласөн?
3. Мыйысь пöльыс ошкис Ваняös?



### **Геология музейын.**

Бөрө колис куим велөдчан во. Уна төдчанатор вөліс Ванякөд тайө воясө: и нималана йөзкөд аддзысьлөм, и ордйысьөм-ворсөм, и вөр-ваөн нимкодясьөм, и шойччан кадө пөль-пөчыс ордө ветлывлөм. Нельөд классын велөдчан воыс лоис зонкалы медся

кывкутанаён. Мукöд урокысь öтдор содiс нöшта öти урок – чужан му туялöм. Велöдчысьяс окотапырысь тöдмалiсны-лыддисны асланыс чужан му йылысь.

Велöдчан во заводитчигöн Нина Павловна кöйысис: «Таво став классöн кутам ветлывлыны карса да сиктса музейясö. Талун урокъяс бöрын мунам Сыктывкарса геология институтö».

Геология музейö пыранiнын эм ыджыд дзирдалысь из. Нывбаба-геолог челядьлы медводз висьталiс сы йылысь. Сэсся мупытшкöсса уна сикас озырлун йылысь висьтавлiс. Велöдчысьяс быттö веськалiсны пещераö – сэтшöм кужöмөн дасьтöмаöсь музей жырсö. Ваня зiлис кольны юрвежас из нимъяссö: алмаз, изумруд, кварц, хрусталь, опал, сердолик, яшма, гранат, рубин, сапфир...

Медся шемöсмöданаторнас вöли Коми мулөн ыджыд мусерпасыс\*. Стенын öшалысь картасö чутöдöмаöсь лампочкаясөн. Мусерпасыс югзис уна пöлöс биён! Быд югзянин – кутшöмкö озырлун пас. Сэтшöм ясыда сэнi вöли тöдчöдöма ю вожъяс, тынюр, вөр быдманiнъяс, Из гöра\*, тундра!.. Мыйыс сöмын абу вөлöма миян чужан муын: зарни и эзысь\*, мусир\* и изшом,

биару\* и ыргөн\*, дона изъяс и вөр, быдся-  
ма мувердас\*. Ок и озыр жö вөлöмыд, миян  
мам муным!

Мамыслысь Ваня тшöкыда аддзывліс  
дона изйысь вöчöмторъяснас нимкодя-  
сьöмсö. Зонка öні тöдіс нин налысь нимъ-  
яссö: тайö эзысь чеп да зарни чунькытш;  
гранатысь, сердоликысь да яшмаысь вöчöм  
исергаяс да сикötшъяс.

– Мамö, а ме öні тöда тэнад изъяслысь  
нимсö, – окота лои висьтавны аддзылöмтор  
йывсьыс мамыслы. – Ме татшöм жö дона  
изъяс аддзылі геология музейысь. Сэні жö  
вöлі Коми мунымлөн мусерпасыс. Озыр тай,  
мамö, вөлöма Из гöраыс!

– Да, зэв озыр миян чужан муным, Ва-  
нюш. Из гöрасыс уна сикас из перйöны.  
И Уралысь, и мукöдлаысь перйöны дона  
изъястö. Наысь вöчöны быдсяматорсö. Ма-  
стерыдлөн тай кийс, майбыр, вермö вöчны  
шензьöданторъястö. Ачyd со аддзан! –  
висьталіс мамыс да тшötш видзöдаліс ас-  
сьыс мичмöдчанторъяссö. Сэсса чöv олыш-  
тöм бöрын содтіс: – Кужöмөн кө вöдитчы-  
ны, дыр на тырмас миян муын куйлысь  
озырлуныс. Колö сöмын пиук, видзны  
сійöс!..

1. Мый төдмалісны Ваня да сылөн ёртъясыс геология музейысь?

2. Мый төдмаліс зонка мамыслөн дона изъяс йылысь висьталомысь?

3. Төдмав, мупытшкөсса кутшөм озырлунөн нималё талун Коми муным.

## Арся кадö.

Матыстчис град выв пуктас идралан кад. Карсаяс воисны отсавны пöль-пöчлы кар-тупель керны.

Луныс мича, гожся кодь шоныд. Та-тшөм поводдянад быдөн ас вöлясьыс уджалö град йöрас. Ваня отсасьö, тэрыба чукöртö пузувтöм картофельсö. Сылы медся виччысяна здукыс – пöжалöм печенчаөн чöсмасьöм! Картофель печенчатö, майбыр, курчавны-няклявны весиг оз ков – ачыс кылалö!

Картофельсö идралöм бöрын шкапысь пöльыс кыскис виж коркаа кызіник тет-радь да мыйкö артыштöмөн пасйыштіс сэтчö.

– Буртор ми вöчим. Дзонь во кежлö гөбöч

**242** гуын дась колана вöлöга, – радпырысь сёр-

нитіс пöльыс. Сэссия мыйкö артыштöм бöрын стöчмöдiс: – Воддза во серти таво картупельыд уровйö\*. Кызь ведраөн унджык лои идралöма. И куйöдыд лöсяліс, и зэръясыд тырмисны.

Ванялы окота лои тöдны, мыйсяма гижöдъяс дедыслөн кыз тетрадяс. Сійö кыйкнитіс-видзöдліс пасйöдъяссö. Пöльыс гөгөрвоис внукусылысь тöдны көсйöмсö да висьталіс:

– Тайö тетрадяс менам уна вося пасйöдъяс: кор медводдза лым усьö, кор лымйыс заводитö сывны, кутшöм лунö медводдзаысь гымыштö. Тані жö и пуктас вöдитöм йылысь гижыштöма менам. Войвылын öд ас кадö быдтастö колö и кöдзны, и идравны. Тадзи со ми пöчыдкöд быдтор артыштöмөн став уджсö ас кадö и вöчам.

Сэссия ая-пия дыркодъ варовитісны. А помас пöльыс содтіс:

– Аслым лоö карад ветлыны. Ставсö, Николай, öтлаын видзöдлам. Дача керкаад меным окота ветлыны. Ивö внукöйлы музейысь мыйсюрö колö петкöдлыны. Быдмысь-сöвмысь войтырыдлы öд колö жö важся олöм йывсьыс висьтыштны.

Рытьявыв пуксисны машинаö: водзас бать-мамыс, бöрас Ваня да пöльыс. Бөрö **243**

колис Кызрас, идралом картупель муяс.  
Туй полонис, увтасинъясас ошалис еджыд  
тшын кодь ру.

– Руалома со кутшөма. Весиг туйыс омө-  
ля тыдалө, – надзмөдіс мунан өдсө батыс.

– А кытысь нө руыс лоө? – индігмоз  
юалис дедыслысь зонка.

– Тэ өд казялін: луныс талун шондіа  
вөлі, муыс бура шоналис. А рытланьыс  
ыркалыштіс. Со и паныдасис вывладорса  
көдзыд сынөдыс му веркөсса шоныдыскөд.  
Та вөсна увтасинас и өшйис руыс. Асывнас  
лысва лоө. Вөр-ваад өд ставыс өта-мөдыскөд  
йитчөма. Қор быдмыштан, Ивө, ачыд төдма-  
лан и йөзлысь, и вөр-валысь олан сямсө.

1. Кутшөм выльтор Ваня төдмаліс пөль йыв-  
сыс?

2. Мыйла йөзыс вөчалөны колана пасйөдъяс?

3. Мый төдмаліс зонка пөльыслөн висьталө-  
мысь?

4. Висьтав, мыйөн торъялөны ру да кымөр.

## Кулөмдінсалөн сарлы паныд кыпөдчылөм.

Урокъяс бөрын Ваня тэрыба котөртис гортас, өд пөльыс көсйысис нулыны сійөс карса музейө.

Деда-внука матыстчисны юркар шөр площадь дорсянь неылын сулалысь кык судта керка дорө. Улыс судтаас сэн зонкалы синмас шыбитчис нель көлесаа, кабинатөм көрт трактор.

– Тайө медводдза трактор, – казтыштіс ассьыс томдырсө пөльыс. – Ме ичөт на вөлі, кор Кыдзрас грездад вайисны дзик жө татшөмөс. Тулыс и ар тракторнад упкисны-гөрлісны. Төвнад сійөн кыскавлісны кер да турун. Весиг вартан машинаяс бергөдлісны.

Пөль нуөдіс Ваняөс мөд судтаас: адзылан пө ыджыд пөльыдлысь чужан сиктсө. Панорамаын вөлі петкөдлөма важкадся Кулөмдін. Со вичко дор. Тані сиктса паськыд мир туй да туйбердса керкаяс. Быдлаын уна-уна йөз. И ставсө вөчөма збыль моз!

Ваня син вештывтөг видзөдіс шызьөм йөзөс. Найө зоръяөсь, вилааөсь, паличаөсь. Өти морт ружьеа. Ывлаө өттшөтш петөмаөсь

и нывбабаяс, и пöрысь йöз, и зонпосни. Ставныс öвтчöны, мыйкö горзöны.

– Дедö, мыйысь нö тадзсö шызьöмаöсь йöзыс? – юалан синмөн видзöдліс пöльыс вылö зонка. – Мыйла найö сэтшöм скöрöсь?

Чöв олыштöм бöрын пöльыс ышловзис да пондiс висьтавны:

– Батьöй тай тадз висьтавліс сійö кадся лоöмтор йывсьыс. Сы чужан сиктын крестьяна кыпöдлöмаöсь бунт. Кулöмдiн сиктса управаас вöлöмаöсь сöмын озыръяс. Налы паныд и кыпöдчылöмаöсь гöльджык йöзыс.

– А мыйла, дедö? – кöсйис нöшта на унджык тöдны важся олöм йылысь зонка.

– Важөн озыръясыд гöль йöзлысь перйылісны содтöд вот\*. Коді оз вермы вöлі мынтыны вотсö, мырддöны сылысь керкакартасö, скöтсö. Нöйтöны плетьөн, мөдöдöны тюрмаö.

– Мыйла нö эськö йöзыс скöрысь шыблалöны да таялöны бумагасö?

– Быд крестьянинлысь вотсö пасйылісны-гижлісны бумага вылö. Важ комияс бумагатö шулісны кабаляөн. Кабалаö гижöм-шедöм сиктса гöль йöзыс и кыпöдчывлöмаöсь озыръяслы паныд.

– А мыйөн нö помасис тайö бунтыс?

– Уджалысь мортыдлы абу зэв нимкодъ, кор юралысьясыд озырмөдчөны сиктса уджалысь йөз помсьыд. Найө сэки асьныс бөрийөмаөсь выль юралысьясөс, бырөдөмаөсь вот пасьян кабалаяссө. Но лёка помассьө-ма налөн асшөр олөмыс. Нартитысьясыд вермөмаөсь уджалысьястө, бунтуйтысь йөзтө...

– Кутшөм бура петкөдлөма тайө важся вөвлөмторсө! – выль пөв видзөдаліс панорамасө зонка.

– Кулөмдінса бунт йывсьыд карса драма театрын ме видзөдлі спектакль. Коркө, Ивө, ветлы бать-мамыдкөд театрас да видзөд, – содтіс пөльыс. – Сэки бурджыка гөгөрвоан бунтыслысь помкасө, аддзан коми йөзлысь важысянь нин бур олөм лөсьөдны көсьөмсө.

1. Мый вөсна гөль йөз кыпөдчывлөмаөсь Кулөмдінын?

2. Висьтав «кабала» кывлысь вежөртассө.

3. Юав пөль-пөчыдлысь коми йөзлөн важся олөм йылысь.

## Пöльлөн гусятор.

Музейын бура петкөдлөма крестьяна-лысь важся овмөссö: кыскасян додь, корадодь\*, пу дадь, сийöс-завод\*, ветки пыж\*, куөн кышöм лызь, уна сикас уджалан да вöччан паськөм. Пу көлуйсö ставсö мичмө-дöма-вольөдöма. Ваня вежавидзөмөн тöдмасис важ йөзлөн кипом вöчөмторъясөн.

Со пöчыслөн кодь печкан да чöрс. Зонка медводдзаысь аддзис гыр\* да тоин\*, шердын\* да сьöктан\*. Синмө шыбитчисны пусь да сямöдысь вöчөм дозъяс. Тыдаланінын сулаліс вундалөмөн серөдөм зэв мича куд.



– Ивö, ме тэныд висьтала öти гусятор. Тайö мича кудйыс менам батылөн, – вашнитіс Ванялы дедыс.

«Вот кутшöм гусятор вөлөма пöльыслөн! Колö быдөнлы висьтаваны тайö гусяторсö. Со менам пöрысь пöльöй кутшöм киподтуя вöвлөма!» – нем виччысьтöг поздысис сьö ошйысьны кыскан мөвп.

– Дедö, кызди тайö кудйыс веськаліс

– Некымын во сайын Кыдзраскад волісны музейса уджалысьяс. Коді налы ме йылысь висьталёма, өнөдз ачым ог төд. Видзёдалісны найё сямөдысь да пуысь вөчалөм уна сикас доз да куд. Сэсся бөрйисны со тайё кудсё. Музейё пö сувтөдам. Мед быд волысь аддзас кипода\* коми мортыслысь кудсё да нимкодясяс мичнас!

1. Кутшөм гусятор йылысь төдмаліс Ваня?
2. Мый зонка аддзыліс музейын?

## Ордйысигөн.

Во чөж нин Ваня да Вова дасьтысисны лыжиён ордйысьөм кежлө. Со гоз-мөдысь нин вермылісны мукөдсё физкультура урок дырйи. Но тайё сөмын на дасьтысьөм вөлі кывкутана ордйысьөм кежлас. А талун Вова да Ваня кутасны ордйёысьны школа вөснаыс.

Карса школаясысь нельөд класса велөдчысьяс чукөртчисны вокзалсайса лыжня вылө. Здук – и ставөн ыджыд өдөн веськөдчисны лызь туйөд. Водзынджык котөртө Ваня, и Вова сыысь оз кольччы. Öдөбтчыв-

лөны туйбөр, надзмөдлөны кыр паныд.  
«Мед эськө оз жө прөстө ло вынөс песөма!  
Тэрыбджыка!» – личлэдзлытөг аскөдыс  
сөрнитіс Ваня.



Тэрыбджыкъясыс  
котөртісны панласиг-  
тырйи. «Гоп!» – кыліс  
Ваня лызь туй корөм.  
Зонка сетіс панйысьлы  
туйсө: вешйыштіс бокө.  
Ордйысь зонкаыс, Ваня  
бокті төвзиг, кызкө  
төдлытөг зургис туй  
сетысьыслы. Бөрын  
котөртысь Вова казяліс  
ёртыслысь лым пытшкө

сунгысьөмсө. Кык ёрт корсюрө и петукась-  
лывлөны, но өта-мөдсө унаысь нин пикысь  
мездывлісны. Вова сувтовкерис, отсаліс  
Ванялы чеччыны да пысавны лызьысь  
мынөм ботинкисө.

Тайө усьлөмыс падмөдіс Ваняөс. Сьөлөм  
пессьөм вөснаыс сійө эз вермы содтыны  
өдсө. Колис котөртны неыджыд кыр да чу-  
кыль. Вова котөртіс водзас. «Зільджыка! Эн  
кольччы!» – ышөдіс сійө ёртсө. «Тэрмасьышт!  
Содты өдтө!» – быттө шөпкөдісны еджыд  
эшкынөн вевттысьөм туйбокса пуясыс.

Ванялөн чужис кутшөмкө пытшкөсса вын. Лызьыс бура кывзысис да кокниа тюрөдіс шылөдөм туйті. Со и виччысына здук! Мудзөм челядьос такөдө-ошкө велөдысьныс: мөдөд места пө босьтіс миян школаным.

– Менө өти зонка панйигас тойыштіс, – синва сорөн сёрнитіс Ваня. – Эг куж кутчысьнысө... «Колө эськө тойласьысь детинкасө корсьлыны», – бергаліс сы юрын мөвп.

– Вова, со эсіё зонкаыс панйис миянөс, – индіс Ваня ярьюгыд костюма ордысьысь вылө.

Кык ёрт матыстчисны төдтөм детинка дорө. Дерт, эз вөв окота талун зыкө пырны, но лоанасө сідз кольны эз жө позь. Пансис сёрни. Петя, вөлөмкө, медтэрыб нельөд класса велөдчысьяс пиысь.

– Иван, ме тэнсьыд прөща кора! Ме өд зэв тэрмаси.. Виччысьтөг тай со тойыштөмыс менам лои, – шуис Петя төдмасьөм бөрын.

Лызьөн медбура котралысь Пётр Налимов бура гөгөрвоис кык ёртлысь дөзмөмсө.

– А ті бура котраланнуд! – ошкыштіс найөс Петя. Сэсся видзөдліс детинкаяслысь лызьяссө да бара шыөдчис: – Коді нө тіян тренерыд?

– Школаса велодысь, – вочавидзис Ваня. – Быд шойччан лунё ми котралам.

– Сідзкё, мёд шойччан лунёдз! – прöщайт-чис Петя. – Лыжи база дорын ме мёда тiянöс виччысьны.

Колис вежон. Ёртъясöс виччысисны кыкөн, Петя да сылөн тренерыс. Вёлөмкө, Петяös кык во чöж нин велөдö нималана вöвлөм спортсмен. Недыр сёрнитыштöм бöрын сiйö казяліс зонкаяслысь лызьөн бура котравны көсiйöмсö.

– Ме босьта тiянöс аслам секцияö, – кывкөрталіс тренер. – Бөръя ордiйсигөн тiян вермөм йылысь меным висьталіс нин велодысьныд.

Кык ёрт некыдз эз кужны и мөвпыштны та йылысь. Налы сетісны бурыйсь-бур лызьяс да колана паськөм. Тадзи лои позянлун водзö сөвмөм вылө.

1. Кутшөм неминуча суис Ваняös лыжиөн ордiйсигөн?

2. Мый верман шуны Петя йылысь?

3. Кутшөм лача кутö зонкаяслөн выль тренер?

4. Висьтав аслад школаса ордiйсьöм йылысь.

Кутшөм спорт тэ радейтан да мыйла?

## Бур кывйыд – меддонатор.

Школаысь локтөм бöрын Ваня норасис мамыслы: веськыд бокин пö бытшкö. Колис час, а дой некыдз эз лöнь. Бать-мамыс эз пондыны нюжöдны кадсö да пырысь-пыр нуöдiсны писö бурдöдчанiнö. Сэни бура видлалöм бöрын врач шуис: «Ковмас вöчны операция, сытöг оз бурд».



Челядыдлөн быд шог инмö медводз бать-мам сьөлöмö. Ванюшлөн бать-мамыс öта-мöдсö вежöмөн куим лун да вой пукалисны пиыс крöвать дорын. Найö видзöдiсны висьысь бöрся, кыдз вермисны отсалiсны-такöдiсны сийöс. Висьöмсö лои венöма, но бурдöмöдзыс колö нöшта на куйлыны куим вежон. Шогыс нюкрöдлiс висьысьöс. Больниччаад куйлiгөн и луньясыс быттьö кузьджыкöсь. Кöть палатаö и волывлiсны велöдысьяс, Ваня майшасис. Ёртъясыскöд öтувъя велöдчöмысь полiс кольны.

Öтчыд лунся узыштöм бöрын Ваня сöмын на восьтiс синсö, а Вова да Павлик

еджыд халатаоьсь пырöны нин. Чолöмасисны. Ёртъясыс вайисны чöсмасянтор, небөг. Но медся нимкодъыс вöлі альбом козьналöм.

– Унаоң көсйисны на волыны тэ дорö, но оз позь. Нина Павловна тэныд ыстис ыджыд чолöм. А миян класса велöдчысьяс гижисны письмöяс, – альбомсö мыччигмоз юөртис Вова. – Бöрас ачылдыдьян. Серпаса письмöясыс альбом дасьтим.

Ёртъясылөн мунöм бöрын Ваня видзöдис бурсиймъяса альбомсö. Шмонитана серпасөн да сы динö гижöдөн челядь зильöмаоьсь кыпöдны висъысьлысь оланрусö. Зонка мөд пөв лыддис быд письмö. Син водзас быттё бара сувтлісны гижысьясыс. Ваня нюмъяліс. Талун сійö кыліс сьөлöмнас, кызди гажтöмтчöмаоьсь сысыс и Вова – сьлөн медбур ёртыс, и збодер Павлик, и вежöра Никита, и сибыд Юра, и быд вöсна тöждысьыс Витя, и вильшасъыс Сергей. Гижöмаоьсь и нывкаяс. Нюмсера висът да серпас ыстöма Катя. Öнi, көнкö, сійö öтнас... Дум вылас уси Виль вося гажöдчöмыс. Катякөд Ваня сэки сьыліс асногалöм сьыланкыв. Сэсся кыкөн йөктисны. «Ыджыд дой тэ вермöмыд пыкны. И кыз тэ сöмын вермин кутчысьнысö? Тэ, Ваня, молодец! Öдйöджык бур-

дөдчы! Ми виччысям тэнө!» – кык-ө-куи-мысь лыддис зонка Катялысь пось кывъ-яссө.

Ыджыд нимкодълун шымыртіс талун зонкаос. «Бурда! Ме өдйө бурда!» – шуис аслыс том морт. Рытнас воисны бать-мамыс. Найө казялісны пиыслысь вежсьөмсө. Ваня кыпъялө, нюмъялө. Сійө петкөдліс пись-мөяссө. Мамыслы да батыслы тшөтш жө вөлі зэв нимкодъ.

1. Мый позьө шуны Ванялөн ёртъяс йылысь?
2. Кыдз тэ гөгөрвоин висътыслысь нимсө?

### **Ваня вөчис самолёт.**

Матыстчис мужичөйясөс нимөдан лун. Классын шуисны дасътыны ас киөн вөчөмторъясысь выстав-ка. Ванялы син улас веськалісны мичаа стру-житөм пөвторъяс. «Праздникыс өд матын нин, – мөвпыштіс зон-ка. – Мыйкө колө вөчны. А мый?.. Видла масте-



ритны самолёт, кутшөмөс аддзылі Москва-ын Поклонной гөрөвөсө музейысы!»

Шуома – керөма. Ваня пукталіс джоджас көрт тув, мөлөт, лобзик, лэчюд пурт. Босьтіс пөвъяс. Мыйкө дыра вөчасис-ноксис: вөласис пуртөн, пилитіс, лемаліс. Сэсся тувъяліс некымын кузь көрт тув. «Самолёт дасы!» – радліс том мастер да пуктіс сійөс пызан вылө. Видзөдліс өтар боксяньыс, сэсся мөдар боксяньыс. Гыжйыштіс юрсө, сэсся броткыштіс ас вылас: «Мыйся нө самолёт тайө менам артмис?!» Кыпид руыс зонкалөн дзикөдз кусіс: «Татшөм самолётыд выставка вылад оз туй!..»

Рытнас батыс казяліс: пиыс кыввортөм, шөгө усьөма.

– Абу на тай тэ, Ваньё, тырвыйё бурдөмыд? – шыасис пиыс дінө батыс. – Мыйкө талун зэв нин жугыль.

– Праздник лун кежлад зонкаяс быдөн мыйкө бурөс вөчасны, а менам со мый артмис, – нюмыртчыштіс зонка да индіс вөчөмтор вылас.

– Бур, асьныд вөчанныд да! Но тэнад, Ваньё, абу на тыр-бура артмөма. Тэрмасьыштөмыд, тыдалө. Да и быд боксянь мөвпышттөг уджтө оз панлыны, – пиыслысь вөчөмторсө донъялігмос сёрнитіс батыс.

Ваня босьтис Москваын ньöблөм небөгсө, кöнi вöли серпасалöма уна сикас воуйтан техника.

– Пöльөлөн мыйлакö быдтор бура артмö. И тэнад, батыö, ставыс жö бура артмö,– майшасьöмөн сёрнитис пиыс да индис небөгын серпасалөм самолёт вылö.– Со ме кутшöм истребитель кöсийи вöчны. Мыйлакö менам эз артмы...

– Эн шогсьы! Менам öд эз жö быдтор öтчыдысьөн артмыв,– бурöдис писö батыыс да содтис: – Мыйкö бур нога вöчöм вылö этш да терпенньö колö. Уджтö панигөн медвойдөр колö ставсö артыштны. Вöчанторсö бурджык серпасавны да сы серти сэссия и вöчны мөвпыштöмсö.

Аскинас батыыс вайис стружитöм пöвторьяс, лемень сутуга. Кыкөн видзöдалисны небөгсьыс серпасьяссö. Сэссия бөрйöм серти дасьтисны чертёж.

– Быд удж, Ваньö, колö вöчны сьөлөмсянньыд,– велöдис писö батыыс.– Мортыд öд удж сертиыс тöдчö!

Некымын лун чöж зонка ноксис истребительнас. Батыыс отсасис.

Воис праздник. Зонкаяс вайисны школаö асьыныс вöчöмторьяссö. Мыйыс сöмын эз вöv: и машинаыс, и танкыс, и корабльыс,

и лэбаланъяс... Велөдысьлы да челядьлы  
вөлі зэв нимкодъ. Ставыслы кажитчис Ва-  
нялөн истребительыс – сынöd дорйысьыс.  
И збыльысь, сійö вөлі синмö шыбитчана!  
Бура мольödöма-стружитöма, колана ног  
мавтöма. Сулалö пöвтор вылын да дзирдыш-  
талö йитан проволоканас. Збыльмис зон-  
калөн көсйöмыс. Видзöдан да, быттö сылөн  
самолётыс ньöв моз лöсьödчö вылö-вылö  
кыпöдчыны...

1. Мыйла медводдза вöчöмторйыс Ванялөн эз  
артмы öтнаслөн?

2. Кыдз тэ чайтан, мыйла батыскöд сёр-  
нитöм бöрын Ванялөн самолётыс артмис кола-  
на ногөн?

3. Кöни да кор зонка велалис вöдитчыны уджа-  
лан көлуйнас?

4. Кыдзи тэ гөгөрвоан батыслысь кывъяссö:  
«Мортыд удж сертиыс тöдчö»?

### **Важ пещера.**

Ас му тöдмалан урок дырйи Нина Пав-  
ловна нуöдiс челядьöс карса музейö. Сэни  
**258** Ваня вöвлiс нин пöльыскöд.

Музейса уджалысь вайөдіс челядьөс панорама дорө, көні вөлі петкөдлөма важ пещера. Велөдчысьяс водзын воссис ёна важ олөмысь өти серпас.

...Зөм\* сулалан кырта\* пытшкын артмөма ыджыд потас, кытчө и овмөдчөмаось зэв важся йөз. Шөрас ломалө бипур. Пöрысьджыкъяс пукалөны дзык бипур дорас да видзөны бисө. Важ йөзыдлөн өд биыс вөлөма медся коланатор: сы гөгөр шонтысьлісны, би вылын дасьтывлісны сёян, биыс видзлывліс йөзсө лёк зверысь. Кырта пытшкас и пескыс. Бипур дорын пукалысь нывбаба дзоньталө пемөс куысь паськөм. Ем пыддиыс киас ёсь лытор. Дінас дзоля кага ворсө-луасьө. Ай морт кыскө пельпом вылас пес. Куимөн өтсөгласөн вөчөны сёй гырнич. Пещера пельөсас уна шыпурт да палич.

Ю ковтысын\*, уліас, гызьө мөд сикас олөм. Кыйсьысьяс сюся видзөдөны лөзалысь юлань. Веж луд пасьтала ветлөны-йирсьөны өти чукөрын – көръяс, мөдын – бизонъяс. Ылөдз лөзалө юыс. Ю пөлөныс буретш вөлөма важ олысьяслөн кыйсянінъясыс.

Сэки мортыд унатор на абу кужлөма вөчны. Вөдитчан көлуйыс вөвлөма изйысь да куысь. Со татшөм вөлөма мортыдлөн олөмыс комын сюрс во сайын...

Ваня сюся видзодіс ёртъясыскөд важ йозлысь пещераса олөмсө да шензис: «Со, вөлөмкө, кызди пансывлөма му вылас öнiя олөмыс!»

1. Кутшөм вөлөма олөмыс йөзлөн комын сюрс во сайын?

2. Мый йылысь висьталө пещераын ломалысь биपुरыс?

3. Мыйла сийө кадас ставыс вөвлөма изйысь да куысь?

4. Кызд тэ чайтан, мый сөйлісны сэкся кадө йөзыс?

5. Кутшөм вөлөма паськөмыс пещераса олысьяслөн?

## **Важ календар.**

Музейын челядь сюся видзөдалісны и зэв важөн овлөм йөзлысь көлуйсө. Öтилаө вөлі чукөртөма бронзаясь вөчөмторъяс: мич-мөдчан кольчаяс, исергаяс, паськөмө вуран ыргөн баситчанторъяс.

— Челядь, кымын төлысь öти воас? — шыөдчис велөдчысьяс дорө музейса уджалысь.

– Дас кык төлысь! – нюмдыштөмөн вочавидзисны велөдчысьяс кокни юалөм вылад.

– Тайөс ті, дерт, бура төданныд. Быд календарын индөма дас кык төлысь. А важөн коми йөзыд воыдлысь кадсö лыддывлөмаөсь ас ногныс. Ставыс вөлөма во чөжнас өкмыс кадколаст. Быд кадколаст йитчывлөма кутшөмкө пемөс олөмкөд.

Челядь сюся видзөдалісны вөралысьлысь важ календарсö. Сійөс кисьтлөмаөсь бронзаысь, плавкөс кытшысьлысь шөрсö перйөмаөсь. Сэтчө серпасалөма өкмыс пемөсөс: ош, көр, съөдбөж\*, сан\*, йөра, вурд\*, руч, ур да тулан\*.

– Кутшөм төлысьянь өні заводитчө воыс? – юалис Нина Павловна.

– Медводдза төлысьыс – январ, төв шөр, – кыліс челядьлөн вочавидзөм.

– А важөн кадсö заводитлөмаөсь лыддыны тувсов шонді бергөдчөмсянь. Тайө каднас буретш пиянасьö ош да петö гусьыс. Заводитчө выль олөм. Вежсьö-ловзьö вөрва. Ставсö ловзьөдö тувсовъя шонді!

Велөдчысьяс гөгөрвоисны аслысьяма календарлысь төдчанлунсö. Коми йөзыд




вогөгөрся кытшсö юккывлöмаöсь ассьыныс  
медшöр уджсö тöд вылас кутöмөн.

– Тайö календар сертиыс бура тыдалö  
войвывса йöзлөн вöрпалысь оланногсö  
тöдöмыс да колана кадö пемöссö кыйöмыс,–  
водзö висьталіс велöдысь.– Коми вöралы-  
сьыдлы некутшöм оланпас\* эз ков, медым  
колана ног ставсö вöчны. Кыйсьысьыд не-  
кор абу торклöма вöрпаыдлысь олöмсö, абу  
вöрзьöдкывлöма ичöt пияна звер-пöткатö.  
Пармаыд морттö и вердлöма, и кöмöдлöма-  
пасьтöдлöма. Коми мортыд овлöма вöр-ва-  
ыскöд топыд йитöдын.

1. Мый урчиткывлöмаöсь важ комияс кален-  
дар лöсьöдигөн?


2. Орччöд вöрпасö да тöлысь нимъяссö.

ОШ рака тöлысь 22 лун – кос му 27 лун  
КÖР кос му 28 лун – лöдза-номъя 2 лун  
СЬÖДВÖЖ лöддза-номъя 3 лун – сора 4 лун  
САН сора 5 лун – моз 9 лун  
ЙÖРА моз 10 лун – йирым 4 лун  
ВУРД йирым 5 лун – öшым 19 лун  
РУЧ öшым 20 лун – тöv шöр 24 лун  
УР тöv шöр 25 лун – урасьöм 21 лун  
ТУЛАН урасьöм 22 лун – рака тöлысь 21 лун



## ТӨЛЫСЬ НИМЪЯС

январ – төв шөр	июль – сора
февраль – урасьём	август – моз
март – рака төлысь	сентябр – коч төлысь
апрель – кос му	октябрь – йирым
май – ода-кора	ноябр – вольгым
июнь – лөддза-номъя	декабр – ошым



### Перым Степан гуйөд.

– Челядь, көсьянныйд төдны, мыйла миян юркаrsa шөр площадьыс шусьё Стефановскөйөн, либө Вежа Степан изэрдөн? – юалис Нина Павловна. – Талун миян аслыспөлөс урок. Станциясянь станцияө мунигөн ти унджык төдмаланныд Перымса Степан йылысь.

Урокыс пансис школа залын. Жынынянлөн шыалөм бөрын челядь быттьө веськалісны дас нельөд нэмө. Нина Павловна висьталіс тайө кадколаст йывсьыс. Квайтсё во сайын парма-вөрад овлөма быдсяма звер-пөткаыс. Миян Эжваным вөлөма паськыд, джуджыд да зэв озыр черинад. Вөр-вайд и вердлөма коми войтыртө, и пасьтөдлөма.

Сійö каднас Эжза вож шусьывлöма Эжва Перымön, Ичöt Перымön. Югдінын\* чужлöма Степан нима зонка. Мамыс вöвлöма коми ань. Батыс – роч поп. Со кутшöм казтылöм воис миянöдз сійö кадсяныс.

«Оліс-выліс Устюгын Мария нима том ныв. Сылы сюри бур верöс – Симеон. Öтчид, вичкоö ветлöм бöрын, паныдасис ветлысь-мунысь морт, корысь, нимыс Прокопей. Кывсьö сійö вöлі тöдысь мортön. Аддзис сійö Мариятö да и туналіс: «Тэ, бур ань, чужтан нималана пиös, ен нога олысьös. Уна бур сысянь петас йöзлы. Ёна нимöдасны сійös бур вöчöмсьыс».

Сідз и артмöма. Степаныд лоöма выль олöм лöсьöдысьön. А нимсö сылы сетлöмаöсь Великомученик Степанлысь. Степантö шулöмаöсь и Храпön. Роч «храп» кывйыслön вежөртасыс – «окотапырысь, сьölöмсянь». Вежөра Степаныд и збыль окотапырысь велöдчывлöма.

\* \* \*

Челядь веськалісны «Коми анбур» нима сувтланінö. Пöвйö вöлі гижöма важ коми шыпасъяс. Велöдчысьяс сюся видзöдалісны важ шыпасъяссö, орччöдісны найös öнія-ыскöд. Ваня лыддис важ ног гижöм кывъ-

яс да шусьог. Челядь  
шензисны да нимко-  
дясисны: од найо вер-  
мисны лыддыны важ  
шыпаса гижодъяс!

Сюсь да толка Сте-  
паныд ыджыд баты-  
ыскод воывлөма  
коми йоз ордө. Сийо  
казялөма налысь уна-  
тор тодны көсиймсö,  
кутшөмсюрö гижан  
пасөн вөдитчөмсö. И  
Степаныд, коми пасъ-  
яссö тод вылас бось-  
төмөн, лөсьодлөма  
коми йозлы бурджык анбур. Эжва Перым-  
са олысьясос велөдөма гижны, восьтөма  
школаяс. Бөрыннас сийос кутисны шуны  
Перымса Степанөн.



\* \* \*

Челядь мөдөдчисны коймөд сувтланінö.  
Нина Павловна петкөдліс Емдін\* сикт йы-  
лысь серпасъяс. Емдіныс сулалö Емва да  
Эжва өтлаасянінын, зэв мичаинын. Коми-  
яслөн сийö вөлөма юркарөн\*. Важөн сэтчö  
сөмын ва туйод вермывлөмаось воодчыны.  
Сэкса кадö Емдін гөгöрыс вөлі кыпөдөма

стен. Гөгöрыс нöшта рöv кодйöма. Уна вөрöг видлöма босьтны мичаинтö. Сöмын коми йöзыд абу сетчылöмаöсь.

Перымса Степаныд Емдінас кыпöдлöма медводдза вичко. Сэсса восьтöма школа, мөдöма велöдны коми йöзöс аслас анбур серти.

\* \* \*

Со и медбөръя сувтланін. Стенын öшались мусерпас отсөгөн челядь индалісны каръяс да сиктьяс, ю вожъяс, көні вöвлöма Перымса епископ Степан. Велöдысь висьталіс Степанлөн гырысь каръясö волөм йылысь. Мусерпасын öзъян бияс серти тыдаліс сылөн ветлан туйыс: Устюгын чужлöма, Ростов Великöй карын велöдчöма, Пырасын панöма ен нога удж, Емдінын бөрйöма епископ оланінсö да велöдлöма коми йöзöс, Новгородö ветлöма бурöдны йöзсö, Москваын кувсьöма.

Кыліс жынняян шы. Заллөн Изэрд моза лөсьöдөм юкöнын помасис челядьлөн «Перымса Степан туйöд ветлөм-мунöмыс». Быдөнлы козьналісны Вежа Степанлысь мича кабала вылö артмөдөм портретсö. Челядь сьөлөмö вужъясис выль аскылөм, важ олөм гөгөрвоны зільөм.

1. Мый төдмалісны челядь аслыссяма урок дырйи Перымса Степан йылысь?

Мыйла Степансө шуоны Перымсаён?

Кутшөм буртор Степан вөчлөма коми йөзлы?

Кутшөм сикт Коми муын медваж?

Кутшөм каръясын вөвлөма Перымса Степан?

2. Лыдды небөггяс да содтөд төдмав Перымса Степан йылысь.

### **Уллына манастыр.**

Челядь дыр нин виччысисны тайё лунсө. Школа дорын сулаліс небыд пуклөсьяса ыджыд автобус. Челядь, бать-мам да велөдысь пуксялісны автобусө. Лөсьөдчисны кузь туйё. Мунигчөжыс сьылісны да шмонитісны. Автобус матыстчис Уллына сиктлань. Медводз тыдовтчис көлөкөльня йылыс, син дойдана югнитіс шонді водзас.

«Манастыр!» – өттшөтш артмис челядьлөн горөдөмыс. На водзын воссис шемөсмөдана серпас. Паськыда тыдаліс Эжвалөн ковтысыс. Кыркөтш йылас петкөдчис Уллына манастыр. Ставөн нимкодясисны дыр виччысяна аддзөмторнас. Зымвидзис-сулаліс джуджыдсьыс-джуджыд көлөкөльня. Сійö петкөдчис лым кодь

еджыд юсьөн. Юрыс лöz енэжас тшукöма-  
лэбö!

Некымын нэм сайын на Эжва пölöныс  
ветлöмаöсь йöгра\* котыръяс да мырддяв-  
лöмаöсь сэнi олысьясыслысь эмбурсö. Öтчид  
найö гусялöмаöсь сэтчöс попыслысь Улля-  
на нима нывсö. Лёк йözсьыд нылыд көсьяс  
пышйыны. Пыжсяньыс шыбитчас юас да  
вöяс. Тайö вölöма буретш öнiя манастыр  
весьтас. Та понда и манастырсö кутöмаöсь  
шуны Улляна нимөн.

Карысь воöмаяс медводз ветлödлыш-  
тiсны манастыр йöрас, а сэсся пырисны  
часовняас. Танi вöлины енлы кевмысьяс.  
Ваня кывзiс вежа айлысь\* бурвисьталöмсö.  
Зонкалы сьölöмöдзыс мөрччисны сылөн лов  
кыпöдана, вежавидзана кывъясыс.

Челядьлы окота лои кайлыны көлö-  
көлня йылöдзыс. Полöмсö венёмөн Ваня  
кайис пыр вылö и вылö. Тасянь ки пыдöс  
вылын моз тыдалiс манастырдорса сиктыс.  
Кутшöм ылöдз тыдалiс Эжва ковтысыс! Зон-  
ка кылiс ассьыс сьölöм тiпкөмсö. Бытьöкө  
кымöрыскöд öтлаын сiйö шлывгис-лэбис му  
весьттiыс. Сэтшöм дзоляöсь петкөдчисны  
пуясыс, керкаяс. А Эжваыс лöзов визьөн  
вошис кытчökö.

Мичлуннас да кыпыдлуннас Улляна ма-  
настыр быд волысьлы сетö выль вын да вежа

олөмө эскөм. Тайө вежаинас недыр олыштөмыс и Ваня пытшкын чужтіс кутшөмкө гөгөрвоны позьтөм кыпыд аскылөм, бурлуно эскөм.

1. Мыйла Уллына манастырсө тадзи шулөмаось?

2. Кыдз тэ чайтан, мыйла мортыслы колө вежа му вылас олыштөмыс?

3. Төдан-ө тэ кутшөмкө мукөд манастыр йылысь висьталөмьяс?

## **Көрткерөс – Көрт Айка.**

Уллына манастырысь челядь автобусөн воисны Көрткерөсө. Нимыс сиктыслөн йитчөма Көрт Айка йылысь висьталөмкөд. Тайө сиктсө Ваня бура нин төдіс. Өд сәні оло сылөн Дима вокыс, коді унаысь висьтавліс Көрт Айка йывсьыс.

Көрт Айкаыс нималөма коми йөз пөвстын лөк тунөн. Сылөн пө ставыс вөлөма көртысь: и дөрөмыс, и шапкаыс, и көмыс. Вир-йайыс пө весиг көрт вөлөма. Оланінсө Көрт Айкаыд көртысь жө вөчлөма. Бур дорчысьөн нимавлөма. Сыөдз некод на абу

кужлӧма дорччан уджсӧ вӧчны. Некод абу венлӧма ён морттӧ. Эжва вомӧн сійӧ нюжӧдлӧма кӧрт чеп да сувтӧдлывлӧма быд кывтысь-катысьӧс. Быд мунысь-ветлысь, кыйсьысь-вӧралысь веськавлӧма сы киӧ. Скӧр туныд уськӧдчывлӧма да мырддявлӧма йӧзыслысь эмбурсӧ, а сэсса вӧйтлӧма найӧс юас. Лӧк ногӧн овлӧма! Тадзи вӧлӧма дыр кад, кытчӧдз Коми муӧ абу локтӧма Вежа Степаныд.

Челядь пырисны сиктса музейӧ. Тани Ваня эз на вӧвлы. Сылы медводз синмас шыбитчис ӧти ыджыд серпас. Тани бура петкӧдлӧма Степанлысь шензьӧдана вынсӧ да



Көрт Айкалысь лёклунсö. Велöдчысьяс тöдмалісны Перымса Степан йылысь нöшта öти висьталöм. Перымса Степан катö вөлөм Эжваод. Ю вомөн нюжөдөм чепыд и сувтөдöма сійöс. Молитва лыддьöм бöрын Степаныд босьтöма вежа крестсö да кучкöма сійөн көрт чептад. Көртыд орöма да вöйöма Эжваас. Скөрмөм Көрт Айкаыд вордкыв\* лыддьöма, медым гыяс юыс да путкыльтас Степаныдлысь пыжсö. Эжва вылад кыпөдчöмаöсь ыджыдысь-ыджыд гыяс... Но и гызьöм ютö Степаныд вермöма лөньöдны. Сэсся Вежа Степаныд и сувтөдöма ассьыс пыжсö буретш Көрт Айкалөн оланін весьтас. Көрт Айкаыд чернас уськөдчöма Степаныд вылө, көсйöма керавны сійöс. Но лёк мортыд абу вермöма Вежа морттö. Со тадзи коми йöзыс и мездысьöмаöсь лёк тунсьыс.

Ванялөн классыс көрткерөсса музейын тöдмаліс Коми му сөвмандырысь нöшта öти-тор. Чужан муыдлысь историясö тöдмалöмыд, дерт, озырмөдö-сөвмөдö быд мортöс. А öд быд кар, сикт да грезд нимлөн аслыспөлöс артманног.

1. Мый тöдіс нин Көрт Айка йылысь Ваня?
2. Мый зонка содтөд тöдмаліс лёк тун да Степан йылысь?
3. Кыдз тэ чайтан, кыззи муніс веныс Вежа Степанлөн Көрт Айкакөд?

## Видзöй бур нимнытö!

Бөрö колис нель велöдчан во. Челядь олöманыс вöчисны зэв тöдчана тшупöд. Но бать-мамöс майшöдлö, кызди артмас ныв-пилөн водзö велöдчöмыс: ковмас öд ладмöдчыны оз öти велöдыськöд. Челядьлы абу кокни янсöдчыны Нина Павловнаыскöд.

Мам-батыскöд öтвылысь челядь дасьтисны гижöдъясысь аслысьяма небöг – муса велöдысьыслы козин. Нина Павловналы сьölöмöдзыс мөрччисны велöдчысьяслөн серпаса висътъясыс. Челядьлөн гижöдъясыс уна во кежлö лооны бур казътыланторөн. Велöдысьыд öд быд челядь котыркöд олö быттö торъя олём.

Ваня гижис öтув небөгö дона велöдысьыслы радейтана кыз пу йылысь:

«Менам пöч-пöльлөн керка дорас быдмö ыджыдысь-ыджыд кыз пу. Ылісянь тыдалö сійö аслас джуджда вöснаыс. Кыз пуыс пашкыр увъяса, мича. Гожöмнас радейта шойччыны кыз пу вуджөр улас. Кор локта чужан грездö, сійö ловъя морт моз быттö шенасьö, чолöмалö менö.

Муса кыдзöй во гөгөр мича! Гожöмнас сійö веж корнас меліа шöпкөдчö, мукöдысьсö быттö сьылö-мойдö. Арнас кыз пу

вöччö шондi рöма сарапанö. Зарни рöмнас сiйö ылисянь шыбитчö синмад. Сёр арын кызным гылöдö вижöдöм корсö да тупкö ас гөгөр мусö тöv кежлас мича эшкынөн. Тöвнас кыддзыслөн быд чаль эзысьөн пöртмасьö. А тöла лунъясö йизьöм вожъя-сыс тiльгун моз зельöдчöны. Тулыснас, дыр узьöм бöрад, кыз пуным бара ловзьö-садьмö. Заводитö лолавны тыр морöснас. Но медъяна унзильсö торкöны лунвылысь воём лэбачьяс. Найö дзольгöны-сьылöны водз асывсянь сёр рытöдз, радлöны шоныдлы.

Öшинювса кызным кыпöдö мортыдлысь аскылöмсö, ловсö. Став рöдвужлы сiйö зэв ёна кажитчö!»

Медбөръя велöдчан лунö челядьлы вöли дасьтöма гаж. Пöль-пöчыс да бать-мамыс вайисны классö и пöжас, и юмовтор. А велöд-чысьяс вайисны ас киён вöчöмторьяс. Концерт дырйи и челядь, и верстьö петкöдлісны асьыс кужöмсö: йöктісны, лыддисны сьөлöмö воана кывбурьяс, сьылісны. Быд велöдчысь вöли дасьтöма козинтор. Сы йы-лысь эз тöдны ни велöдчысьяс, ни бать-мам. Капеллаас Ваня гусьөн велöдöма асьыс сьы-ланкыв. Лов шысö кутöмөн ставөн кывзiсны гитаралысь шыалöмсö да зонкалысь мыла сьылöмсö:

*Чужан му! Сяммам славитны тэнö.*

*Дона мамöс моз ыдждöдлам пыр.*

*И кор гажöдчам ми, и кор сьöкыдлун венам,–*

*Тэөн сьölöмным тыр!*

Помланьыс нуöдiсны шмонитана юалöм-вочавидзöмысь ворсöм. Челядьлөн юалöм вылö медводз ковмис вочавидзны мам-батьлы. Кыввидзисны и асьныс велöдчысьяс. Быдөнлы вöли гажа. Сэссия классын кылис Нина Павловналөн шыödчöмыс:

– Дона челядь да бать-мам! Тi олöмад вöчинныд зэв ыджыд воськов. Нель воөн миян лои унаторйö велалöма, унатор тöдмалöма. Ме талун сьölöмсянь нимкодяся тiянөн. Көть менам и лоасны мöd велöдчысьяс, но школа помавтöдзныд лоа тiянкöd орччөн. Пöся аттьöала ставнытö и талунъя гажсьяс.

Челядь, тi – выль олöмлөн петасьяс. Колö тiянлы пöртны олöманыд став бур көсйöмнытö, медым збыльмис мövпаланаыд, мед эськö аддзинныд олöмас ас туйвизь. Көсьяс, медым тi лоинныд унатор кужысь йöзөн, аддзинныд радейтана удж. Видзöй ассьыныд бур нимтö, лоий шудаөн!

1. Кутшöм козин дасьтiсны велöдысьлы челядь?

2. Уськөд төд вылад, кутшөм висьтын нөшта серпасалөма пөч-пөль керка дінын быдмысь кызсө. Пыртөма-ө гижөдас Ваня кутшөмкө мича кывъяс?

3. Мый дасьтөма Ваня ичөт школа помалан лун кежлө?

4. Мый позьö висьтавны Ванялөн велөдысь йылысь?

## **Кызраскын рөдвужкөд аддзысьлөм.**

Кызрас грездө, аслас чужан позйө, чукөртчис Каневъяслөн ыджыд рөдвужыс. Тайө луныс вөлі зэв төдчана, өд Ванялөн пөль-пөч өтувъя олөмлы тырө ветымын во! Гозъя быдтөмаось куим челядьос. Öнi быдөнлөн нин на пиысь эм ас семья. Но чужан позйид век тай дона. Куим котыр өтувтчисны недыр кежлө муса грездас, батымам ордас. Мыйта радлун быд сьөлөмын! Пуксялісны радейтана кыз пу улын сулалысь пызан сайө. Гажмөдчисны, казътылісны томдырся олөмсө. Варовлун во часөн содіс.

Пөчлөн дасьтөма пызан тыр чөскыд сөян-юан.

– Таттян, шуда ки чышкөдтө тай вунөдін өшөднүтө, – казтыштіс пөльыс.

Пөч пырис гожся жырйө ки чышкөдла. Сійө перйис кудсьыс сыръя ки чышкөд, дыркодь видзөдаліс гөрдөн вышивайтөм шонді югөръяссө. Чөв олыштіс. Жыръяс пырис Ваньө. Сійө казяліс бабыслысь син дорас югъялысь синва моляс.

– Бабуш, мый нө тэкөд лои? – повзөмпырысь юаліс зонка. – Ми гажөдчыны да тіянөс чолөмавны воим, а тэ со шогсян?

– Ки чышкөдыс тай со том кадөс дум вылө уськөдіс, – нормыштіс пөчыс.



Мича серъяса ки чышкөдсө өшөдісны медся тыдаланаинас. Керкаас таысь лои нөшта на гажа. Во часөн воалісны корөм госьтъяс. Быдөн висьталісны бур кывъяс, сиисны олөма гозъялы кузь нэм да бур шуд.

Гажөдчыштөм бөрын Ваня бара матыстчис пөль-пөчыс дорө, видзөдліс ки чышкөдсьыс крестөн вышивайтөм серсө.

– Тайө ки чышкөдыс зэв нин ыджыд арлыда, – висьтасис пөчыс. – Менам батьмамөйлы на ен бурөн сетлөмаөсь тайө дона

козинсö да тшöктывлöмаöсь ладön, сьölöм серти овны, рöдйыны\*. Найö мянös буретш ветымын во сайын тайö луннас благöслö-витлисны, вöзйисны шуд да бур öтувъя олöм. Казьтöд вылö ки чышкöдсö и козьнавлисны мянлы.

– Ми Таттянкöд, збыль, шудаа олам! Олöмад, дерт, уна вож да чукыль паны-дасьлис. Быдсямаыс вöвли... Вöвлöмторйыс тай вöлöма, а ковтöмторйыс – бөрö кольö-ма! Ветымын во сайын ми öта-мöдлы мус-мим. Пöчыдкöд и öнi на ми öта-мöдös ра-дейтам! – сьölöмсяньыс сёрнитiс пöльыс да кутлыштiс пöчсö. Сэсся содтiс: – Мед эськö мян моз жö ладön олiсны быд том гозъя!

1. Мыйла уна во чöж гозъя видзöны ки чыш-кöдсö дона козин моз?

2. Уськöд тöд вылад, кызди паськалис Каневъя-слөн вужйыс?

3. Позьö-ö шуны Ванялысь пöль-пöчсö шуда йöзön?

## КОМИ-РОЧ КЫВЧУКӦР

**Авъя** – приветливый, вежливый, внимательный

**Айморт** – мужчина

**Алькӧс берег** – река с пологими берегами

**Аньтуй** – умение рукодельничать; **аньтуя** – умелая

**Берба-баля** – ива

**Берд** – стена

**Биару** – газ

**Вежа** – святой

**Вежа ай** – святой отец

**Вежадыр** – святки

**Вежаин** – святое место

**Вежань** – крёстная мать

**Вежӧс** – помещение за перегородкой

**Ветки пыж** – маленькая долблёная лодка, рыбацкий челнок

**Воль** – шкура; **кӧр воль** – шкура оленя

**Вордкыв** – заговор; **вордiс** – произносил заговор

**Востым** – зарница; **востымасьӧ** – сверкает, сияет

**Вот** – налог

**Вӧрт** – ткац. нитченка

**Вурд** – выдра

**Грезд** – деревня  
**Гыр** – ступа  
**Дзав, чёлнөк** – ткац. планка, линейка, продаваемая между парными нитями основы  
**Дзавъян** – ткац. прибор для наматывания пряжки на цевку  
**Дзавйыны** – ткац. скать; мотать на цевку  
**Дөрапас** – флаг  
**Емдін** – Усть-Вымь  
**Енбиа** – талантливый, одарённый  
**Енэжтас** – горизонт  
**Жыннян** – колокол  
**Жыннян турун** – колокольчик круглолистный  
**Жыр** – комната, **гожъян жыр** – летняя комната, **төвъян жыр** – зимняя комната  
**Зөм** – круто, крутой  
**Из гөра** – Уральские горы  
**Изэрд** – площадь  
**Ичмонь** – молодая невестка, молодлица  
**Йир** – омут  
**Йöгра** – обские угры  
**Канкар** – столица, город царя – Москва  
**Кедзovтны** – обижать, недолюбливать  
**Керöс** – возвышенность  
**Кипода** – искусный  
**Киподтуя** – мастеровой  
**Кимöститчан** – волшебный  
**Кись** – ткац. бёрдо

- Ковтыс** – долина реки
- Койбедь** – охотничье копье
- Корадодь** – лёгкие пошевни (сани с коробом или корзиной, с двумя сиденьями)
- Көдж** – выступ берега, образуемый излучиной реки
- Кывт** – часть избы перед печью
- Кырта** – скала, утёс
- Лаз** – лузан, накидка охотника
- Лёдз** – вал сена
- Лэч** – силок, **лэч туй** – охотничье угодые с силками и ловушками
- Мокота розь** – дымовое отверстие, дымоход в чуме
- Мөтыр** – таган, таганок для подвешивания чайника над костром
- Мувердас** – удобрение
- Мусерпас** – карта
- Мусир** – нефть
- Мылөдвуж** – герань луговая
- Набелка** – деталь ткацкого станка, то же набойка
- Нальк** – ловушка для маленьких зверей
- Нáрт** – нарты
- Неминуча** – несчастье, беда
- Низь** – соболь
- Нöрыс** – холм, пригорок
- Нырвизь** – направление
- Нюдз** – гибкий

- Об** – тётка, сестра отца  
**Оланпас** – закон  
**Ордым** – тропа  
**От** – ширина  
**Обича** – нрав, характер  
**Петель** – фитиль  
**Пеша** – светец, подставка для лучины  
**Пучер** – ствол дерева  
**Репас** – лёжка лесной птицы зимой в снегу;  
**репны** – закопаться в снег  
**Рой** – древесный мох  
**Рөдйыны** – завести семьи  
**Рөштво** – Рождество  
**Сан** – росомаха  
**Свөлөк** – ткац. навой, катушка, вал для на-  
вивки нитевой основы  
**Сийөс-завод** – упряжь  
**Синтас, синкым** – брови, бровь  
**Сьөдбөж** – горностаи  
**Сьөктан** – инструмент для плетения лаптей  
**Сьөмөс** – сердцевина дерева  
**Сюри** – уток, намотанный на цевку; **сюри**  
**дзавйыны** – мотать пряжу на цевку  
**Таяян** – педаль, подножки в ткацком стане  
**Тоин** – пест  
**Томулов** – молодежь  
**Тун** – колдун, **тунавны** – предвещать  
**Тулан** – куница  
**Тупу** – дуб

**Уровйö** – вдоволь, вволю

**Чалькост** – промежуток, промежек между  
двумя стожарами

**Шердын** – берестяной лоток

**Шылад** – мелодия

**Шыпурт** – меч

**Ыргön** – медь

**Эзысь** – серебро, серебряный

**Югдін** – город Великий Устюг

**Юра нöш** – ткац. пришва, навои

**Юрвеж** – память

**Юркар** – столица

**Юркытш** – венок

## ЮРИНДАЛЫСЬ

### Дзолядыр

«Я» шыпас . . . . .	5
Медводдза артасьом . . . . .	8
Том космонавт . . . . .	11
Мыйысь пасьмуні ва доз? . . . . .	13
Часі . . . . .	14
Пустыняса быдмөг . . . . .	16
Шоколад кампет . . . . .	18
Выль телефон . . . . .	21
Тувсовъя ваын «пыртчөм» . . . . .	23
Берба лунö . . . . .	25
Этнография музейын . . . . .	28
Пеша би да лампа . . . . .	30
Чум дорын . . . . .	32
Кыдз пу . . . . .	34
Буско . . . . .	36
Киподтуя пöль . . . . .	40
Ваня ветліс бөрйысьны . . . . .	44
Салдат рок Победа лунö . . . . .	46
Юны позьтөм ва . . . . .	49

### Гожся серпасьяс

Гожөм чуксалö . . . . .	52
Вильыш Прошка . . . . .	54

Ёртасьём . . . . .	56
Кыдзи Кузьпель асьсё бурдөдіс . . . . .	59
Мелі кывйыд быдөнлы лөсялө . . . . .	60
Зепта гач . . . . .	63
Бурдөдчан лапкор . . . . .	66
Зэра лунө . . . . .	67
Рытъя өшкамөшка . . . . .	71
Ёг турункөд венласьём . . . . .	74
Иван лун паныд . . . . .	76
Пывсяныд зэв коланатор . . . . .	79
Вөрса компасьяс . . . . .	82
Мудер лэбач . . . . .	85
Кодзувкоткар . . . . .	86
Лёкгаг коли бөжтөг . . . . .	89
Чөдъяин . . . . .	90
Пельсаын олысь «вакуль» . . . . .	92
Вуграсьём . . . . .	95
Дона гоб . . . . .	98
Вөрса мича прөшви . . . . .	100
Көні дзебсясьө йөлөга? . . . . .	102
Видз выв мич . . . . .	104
Пожөмлөн паспорт . . . . .	106
Вежань ордын . . . . .	108
«Чөскыд» шыд . . . . .	112
Ас быдтөм анькытшыд чөскыдджык . . . . .	115

### Лунвыв саридз дорын

Вөтыд збыльмис . . . . .	118
<b>284</b> Саридз гыясын . . . . .	121

Лунвыв чушкысыяс . . . . .	123
Саридздорса изъяс . . . . .	125
Нептун лунö . . . . .	127
Змей петкөдланінын . . . . .	130
Дельфинарийын . . . . .	133
Ракпаньяс . . . . .	137

### Велөдчөмын медводдза воськовьяс

Төдөмлун нимөдан гаж . . . . .	140
Сөр арын . . . . .	143
Том бурдөдчысыяс . . . . .	146
Карса вартчанінын . . . . .	149
Коді мыжа? . . . . .	152
Гөрд яблөк . . . . .	153
Лэбачлы сөянін . . . . .	156
Төвся кызьяс дорын . . . . .	158
Пера кодь ыджыд пөль . . . . .	160
Вурун кепысь . . . . .	162
Гажа праздник – вежадыр . . . . .	165
Пач дінад шоньд . . . . .	170
Джодждөра кыан удж . . . . .	173
Медводдзаысь артисталөм . . . . .	175

### Москваын некор вунөдлытөм луньяс

«М» шыпасыд – метро . . . . .	178
Лифта джуджыд керка . . . . .	180
Кремльса шензьөданторьяс . . . . .	184

Поклонной гора . . . . .	188
Москваса циркын . . . . .	189
Рома нима слон . . . . .	192
Зоопаркын . . . . .	194
Облезянаяс . . . . .	194
Верблюдьяс . . . . .	196
Крокодильяс . . . . .	197
Слоньяс . . . . .	198
Юсьяс да павлиньяс . . . . .	199
Вошлом . . . . .	201
Арбат . . . . .	203

### Гажа челядьдырыд – медся бур кад

Сарысь ворсом . . . . .	207
Туфик да пефик! . . . . .	211
Катю тютлы отсөг . . . . .	213
Чом . . . . .	216
Кодзыд! . . . . .	218
Полокало . . . . .	221
Котасьом преник . . . . .	225
Логасисны . . . . .	228
Выль велосипед . . . . .	231
Пач тэчысьяс . . . . .	234
Турун пункт . . . . .	236

### Школаын велодчом йылысь казтылом

Геология музейын . . . . .	239
<b>286</b> Арся кад . . . . .	242

Кулөмдінсалөн сарлы паныд кыпөдчылөм .	245
Пөльлөн гусятор . . . . .	248
Ордйысигөн . . . . .	249
Бур кывйыд – меддонатор . . . . .	253
Ваня вөчис самолёт . . . . .	255
Важ пещера . . . . .	258
Важ календар . . . . .	260
Перым Степан туйөд . . . . .	263
Уллына манастыр . . . . .	267
Көрткерөс – Көрт Айка . . . . .	269
Видзөй бур нимнытө! . . . . .	272
Кызраскын рөдвужкөд аддзысьлөм . . . . .	275
Коми-роч кывчукөр . . . . .	278

Допущено  
Министерством образования и  
высшей школы Республики Коми

*Учебное издание*

**ПОЛЯКОВА ЭЛЬВИРА ИВАНОВНА**

**РОДНАЯ ЗЕМЛЯ**

*Книга для дополнительного чтения  
учащимся 1–4 классов общеобразовательных  
учреждений Республики Коми*

*На коми языке*


Художник **В. А. Клейман**

Редактор **В. М. Грабежова**  
Художественный редактор **В. Б. Осипов**  
Компьютерная верстка – **З. А. Поздеева**  
Корректор **А. И. Игушева**

Подписано в печать 13.02.2006. Формат 60×84<sup>1</sup>/<sub>16</sub>.  
Бумага офсетная. Шрифт «Komi SchoolBook».  
Печать офсетная. Усл. печ. л. 16,74. Уч.-изд. л. 9,0.  
Тираж 2000 экз. Заказ № 1933

Коми книжное издательство  
167982, г. Сыктывкар, ул. Карла Маркса, 229

Отпечатано в ОАО «Коми республиканская типография»  
167982, г. Сыктывкар, ул. Первомайская, 70





Коми небӱг лэдзанін  
2006